



水





止園集卷二十一

延陵吳亮采于甫著

贊

懷古陳公像贊

藹乎貌之春陽也卽之溫然而其衷則堅見好色而不能遷觸乎志之秋霜也持之介然而其神則恬當赫聲而不敢先置恩怨于弗校蹈禮義而無愆依依孺慕儼羹墻于堂構翩翩僊舉藏丘壑于城廛名埒汝南德媿潁川不言備四時之氣無懷游三代之前覩斯像者必曰古之人古之人吾願爲之執鞭

山園集 卷二十一
懽喜地主入贊

意得軒渠意不得軒渠蓋無不可乎一世而又奚碍乎六虛其志徐徐其樂于于清風移如何可一日無其此君之徒與

文峯圖贊

董氏舊有文武二峯其以邦大夫意輸之學宮者武峯也文峯尚存後圃世世守之先王父尚寶公會爲說以貽兩峯翁今八十五年所矣一再傳而汝龍兄以文峯自號蓋取諸峯以自况而復作圖以昭世德命余題數語以志世講余不敢以不斐辭贊曰

誰鞭海東樹之廣除匪繡匪雕壁立負隅風稜戍而衷則虛武能飲羽文堪覆書疇謂此君爲耳目娛矯矯元龍其文炳如典雲蔚蒼飛霞鬱紆爲鵠之印爲驪之珠貽厥子孫比于貞瑜拜而頌焉亦猶吾祖之緒餘

文

晉陵公建賢侯祠上梁文

六龍振鐸禮樂弘先進之規五馬褰帷豪傑應中興之運蓋經術飭吏行將崇雅黜浮祀典徵賢寧止合

聖學渙愛遺東里真一代之惠人政美西門後百年

而思我稽信史稱潁川之四長傳德更列儒林者三
人與校華心榮陽無並遺之欲開周思過高陵有共
棄之田召父文化成禮蓋兩郡文翁教治蜀建專祠惟
二千石之良係億兆人之命凡茲處宿靡不承風欲
旌往以詔來每居今以考古恭遇太府歐陽公神峯
瑤峻學海珠登萊額千乘尚書譜傳六一居士建侯
未縣移守朱方鹿逐熊以隨轡馬如羊而却廐政先
舉廢理鑄復于藜藿德尚闡幽振衣冠于草莽講堂
肇啓將經正以興民寢室宏開更洗心而藏密少長
咸集彬彬然尚齒尚賢經史間陳颯颯乎言詩言禮

臯比乍設欣逢百世之師隼節遄膺莫借一年之冠
先生自此升矣小子又何述焉歸而求之有餘肯教
墜地學然後知不足恐廢半途向後同心願吾儕常
如此日從前屈指任斯道凡若而人稽文獻而足徵
邇典刑之尚在輿情允協欲報政而未能廟貌聿新
各捐金而無恡乃堂乃構幸塗墍之旣勤彼几彼筵
諒潢汗之可薦禮崇尸祝神遇羹糈或聞而知或見
而知道脉相承于從政乎何有爲鄉之士爲國之士
古人可論是尚友者宜然會精意于兩楹之間九原
復作悟微言于一室之內千載如存維時月應斷壺

星臨管室周官授矩以揆日郢人運斤而成風櫨榻
環縈納流雲于上棟桁梧綺錯挹明月于中庭特宣
都許之勞用代奚斯之頌梁之東吳峯高倚聖人宮
秋風萬寶歸金母春雨羣芳藉木公梁之南鐘聲遙
和白雲端惟馨俎豆傳千禩有美冠裳共一龕梁之
西辛水朝堂六秀齊勿剪甘棠常蔽芾無言桃李自
成蹊梁之北斗山在望爲民極謚衢擊壤樂年豐鑿
井耕田忘帝力梁之上太史占星于氣象當年修德
未生塵此日緇衣重授祭梁之下大明揭日無長夜
風聲特樹狄公碑月旦同歸梁氏社伏願上清之

人稽旣徃吏習已成式瞻簞簋之光益普弦歌之化
招攜白屋闢道岸以同登獎誘青衿窺義園而遐集
徐孺下陳蕃之榻無植私人單父聞宓賤之琴尚求
益友欵龍門以霧會安得鸞其翰而威鳳其音附驥
足以雲蒸矣取蝨于庭而陽鱗于室善政寧如善教
勉追渤海之縱愛道尤甚愛身恪守澹臺之節過我
門不入我室豈憾于無刺無非行其庭不見其人一
在乎時行時止前有父後有母凡血氣莫不尊尊親
親上爲德下爲民長國家庶幾樂樂利利邁德音而
遠嗣衍道化以宏敷無負徽猷永垂懿範

祭文

祭鄂國公文

惟神英智絕倫勇畧冠世委身惟一盡心無二錫封
鄂國發跡鄩陽功垂保障代享蒸嘗其以巡方拜于
祠下低回有懷馳驅靡暇綱維大節卓爾精忠庶幾
文德寧詎武功議祀賢祠躋之俎豆厥伐開先其儀
啓後繫神如在鑒此微誠適逢大比忽顯異徵闡棘
深嚴排簾直入黜頭朱衣彈指柳汁雲中諸士三年
不鳴陰騭默佑二僑同升其忝衡文快觀生色豈其
之能惟神之力特陳醴齊式薦明馨興文偃武永著

神靈

鄉同年合祭沈韞所文

人亦有言君相造命命之不猶誰執其柄或使而行
或尼而止止庸何傷胡乃遄死嗚呼仲玉玉質金相
穆如條風藹若春陽入對大廷出爲循吏蔽芾甘棠
單赤思庇其衷肫肫其象閭閻有魚斯懸有雉斯馴
貞不絕俗介不矯世清與和并仁以義濟尚書尺一
簡召蓋臣庶幾拔茅依然積薪兩詔重申一官虛擬
聖明進賢如不得已維我仲玉能忠能良淵停嶽峙
鳳瑞麟祥其維不言言必有中其維不爲爲必有用

荏苒歲月浮沉京華資窮斧罄塗泣朝嗟顯晦有時
予奪惟令無位匪患莫容何病所可憾者韞抱弗酬
所可慟者殄瘁是憂天之生材實爲社稷若時登庸
君相之責進退躑躅禍福紛糾天奪之年人亦奚尤
其等昔附賢書今聯仕籍惠而好我匪朝伊夕共懷
轡臆均軫痛腸灑茲兩行酌兄一觴神游帝庭巫陽
可問天聽若聰兄死無恨科第鵲起箕裘象賢其誰
不悉又曷贅焉

舊寅合祭呂天池夫人文

嗚呼情有特至數有適然詞未及陳淚如涌泉疇不

有配惟士作匹晨曰宵燈吹齋絢縉疇不有家惟宦
攸羈南馳北驟左挈右提疇不有職惟翰司染開局
浮湛清時偃蹇疇不有病惟醫無良秦越卻走刀圭
漫嘗疇不有死惟旅逢逆楸樹寧周衿襚匪襲嗚呼
安人豈命不同宜膺多福迺罹百凶夫子嗜學靈相
其勤拮据絲麻洗腆藻芹夫子通籍靈相其慎雜佩
表莊投瓊比潤夫子裊躬靈相其謙恭德是其基禮度
罔愆夫子操修靈相其儉饗醴裁豐綺統謝豔展矣
夫子蔚譽鳳池晉秩蘭署待簡楓墀數載淹留一墨
躑躅鞅掌爲勞進退維谷豈靈不待溘爾相捐匪直

也命不憖者天矧歲龍蛇先殞喆愛抱痛思斯鍾情
我輩盡焉心傷竟以身殉是女是母異鄉同盡酷烈
滋毒徂暑增悲河山迢邈風雨凄其奄棄藐孤誰依
誰恃黃腸易枯紅顏忽逝慟哉夫子莫贖百身拭淚
力疾疏叩九闈嗟乎噫嘻人貌榮名天親骨肉何物
風塵隨波沉陸暫請洗沐以圖安窀會見拔茅升茲
積薪贖有瑤芝翱翔雲路默相陰騭克昌胤祚某等
辱在舊宗誼切情真幽思莫闡鬱臆難申效虔束芻
薦馨用缶靈爽如存鑒茲清占

祭封侍御湯簡菴文

惟翁上古淳龐當今耄耄完璞未雕素貞弗泯
能謙與世無涉里閭頌聲邑庭屏跡葆是天倪
人傑起家科第報國忠節銜金擬剛瑩冰比潔豕
龍章鸞書炳揭迢迢雲中表表風烈庭訓聿昭親心
孔悅移按閩海洗沐子室依依孺慕載疏陳乞翁爲
勸駕匪朝伊夕爰示嬰鍊于焉拮据父命方嚴王程
且迫脂車戒途含情賦別持斧入境元克首燈山嶽
屹搖風雷迅疾貪墨解綬黔黎帖席方期大行胡聞
永訣雪涕遄奔匍匐衰經八閩夫天萬姓均咸矧奉
姻聯通家義切宦邸遠歸寸心如結報誅聊敷束芻

載蕤臨風薦觴九京何質嗚呼哀哉

舊寅合祭章通叅懷惠文

國重股肱卿先喉舌制沿三不
咨爾納言登聞敷奏簡畀名賢
惟公毓靈降精鼎族起家通籍
長茂祥策名高第
遴運滋昌鰲禁掄材鳳池載筆
清華蔚騰英標迥立
既膺妙選升華掖垣辰猷補衮
夕拜彈冠入叅諷議
出董將作言則朝陽動而摧轍
邦之骨鯁卓爾不羸
凜乎秋霜剗以春溫通典典兵
垣爰司文柄淮南寔
冀北顧俊優游禁闥補過拾遺
龍圖鳳尾青瑣黃

行懋望崇銀臺晉秩夙夜惟寅
出納靡忒時聞推轂
歲若積薪行歌四牡託于勞臣
畏此簡書庶幾靡及
中道馳驅倏忽一蹶清源之許
朝露溘先皇華未屆
廣柳言旋瓦缶喧虺鍾呂委歎
惟公大雅逢時之闕
豈無牖下飾巾待期蕭蕭丹旆
望望素輻覓無不之
公神栩栩何必首丘總歸逆旅
所可慟者老成云亡
九京可作百身願償其等造迹
筍班追蹤薇省忽聞
流訃相嚮咽哽束帛加爵合跽
陳詞矯首南雲愀然
寄思

展先墓文

男自十歲學爲文章服聞嚴訓愛勞備嘗迨二十而廩于庠三十而舉于鄉四十而戰勝于春官之場對大廷而靖獻遙臚傳而首倡不入青藜之館猶列紫微之堂愛男者謂男續豹尾而微倖惜男者謂男望龍門而愧惶益福難渝量澤本發祥凡聽命于天者男不敢讓而竭一日之長其聽命于人者男不敢知而安素位之常非不屑乎柔翰其無忝乎剛腸卽爲構之弗肯亦詒穀之有方奉詔遄歸君命是將陟西山而瞻慈圖南溟而翱翔茲當展墓來此荆陽眺焉罔極盡然永傷塚尚缺乎麒麟禮兼用乎豕羊敢敷心腎式薦馨香

誄

少司徒王公誄

有序代作

歲在甲辰月維丙子明正議大夫資治尹戶部左侍郎見峯王翁捐館舍爾時長公中丞節秉西川終天永抱叔子進士錦游東土愛日彌留存切備夫榮哀拔赴兼乎慶吊九京難作百身曷贖嗚呼哀哉翁諱某字某濟南之新城人也葆胄殷宗錫胤望族系傳臨濟居徙瑯琊明經肇業于潁川嗣緒叅藩于邗水德門旣啓慶祚滋昌惟翁教秉鯉趨資雄駿發魯賢

甫薦忽嚙指而愴神黔計遘聞乃悼心而擗踊迨夫
戊榜登于甲科筮仕李官明刑荆服識袁州之司法
頌定國之在宥褒剡婁上徵書特簡升華左省傑直
西掖批敕尾以復入封詞頭而不下黃扉動色白簡
騰譽其最著者固邦本則獨疏安民者四事議邊防
則衆推覈實爲一策抑罪勲之驕恣律以小心寬罷
相之指摘存其大體盈庭畫一通國折衷賴仁人溥
利之言覩儒者給事之効辛未晉太僕寺少卿隨轉
鴻臚寺卿秩未越乎尋常顏不違乎咫尺維時長公
且成進士子能紹父長豈慚卿旣聯佩以趨朝乃分

符而領邑盛美有赫雅懷無兢甲戌擢大理寺少卿
改南京太僕寺卿當開府而推讓勿違睠舊都而留
滯靡憾召還問伯旋躋京兆丁丑始以副都御史巡
撫湖廣前茅甫臨全楚底定精覈察吏江漢凜其澄
冽慷慨嫉邪山岳劃焉震動庚辰擢戶部右侍郎尋
協理戎政癸未擢戶部左侍郎兼總督倉場允武允
文折衝寓于樽俎足兵足食彈壓先于輦轂方需大
用頓懷遐舉疏榮寵渥借言省覲怒焉念報劉之日
歸歟發反魯之歎蓋是時翁方六十而太淑人劉已
登大耋加進七箸一日之養三公不易諸子及孫以

入計出使便道就舍若江右長臬鉅鹿太守計部儀
部兩尚書郎寧晉陽城兩大令印纍纍而綬若若洗
盞更酌舉觴迭上而翁以華顛在侍奉太淑人千秋
懽以此言樂樂可知矣若乃創祠萃渙贍族益損軫
藜莪罔極之思敦葛藟猶庇之義下車過里扃戶避
詬躬御疏布居鮮僕妾又所謂國爵屏貴家獲忘貧
者矣至于庭聞禮詩世篤貞亮急湍勇退華塗踐更
父教之忠子能其任中丞公敷歷疆場保釐介藩垂
三十年旣以牂牁匪茹疆理未綏適奉簡書經畧草
昧翁年望八送子萬里分手銜涕拭血共訣驅征馬
而不顧叱奔馭而若失豈期一赴絕國永辭子舍國
恩矢報家禍忽罹嗚呼哀哉某也同里後生通家末
屬載附年籍夙稱世講橋覆梓承梁頽木壤天不憖
遺良非細故念久敬而悌營撫長往而悲隕爰狗舊
典用作誄辭曰

於赫瑯琊遙遙萃冑渤海肇基臨沂毓秀顯允始祖
厥有姱修徙居新城奕葉綢繆高曾纍仁臚載邑志
啓佑鴻儒首稱國士頴川司教逢掖擅場一經所貽
五世其昌樹惇靡允聿維燕翼起家高第先此閩閩
閩閩伊何洊歷叅藩以一死勤事展職用殫恩恤泉扃

介卿太僕惟我司徒掄魁東服方宅苦塊阻對公車
槁外柴中念此居諸爰及壬戌南宮升儁試理荆襄
由獄明慎六條廉察五服允明乃膺妙選迺簡掖庭
門下馭違殿中司直進參諷議退思補拾明維穆王
啓泰方亨昌言固本用咎昇平虜陷石州邊患旣棘
責寔圖功力屈羣策世祿勲裔怙侈宣驕匪霜而寒
見規則消前有海陵後有新鄭無黨無偏不練不競
萃亭罷相吹毛孔多人情若此國體謂何惟公片言
默而調護豈日委蛇老成之故橫空雕鶚或爲鸞翎
在山虎豹亦著麟祥分佐罔伯乃離青瑣尋遷容臺

似右實左憎茲強項瘁以鞠躬句傳惟謹夙夜在公
更陟廷尉茲當開府捷徑推賢榮塗郤武一麾留罔
暫滯周南有馬班如涖止江干追鋒北指爰作大正
寮簡儉壬后襄齊聖載從人望擢尹王畿寧循趙轅
洵握尹釐清詭消奸捐苛滌冗輦轂肅清貴戚震悚
帝睠南服填撫楚邦惟予湯沐藉爾助勦絳節碧幢
繡裳銀鉞躡領百城提衡三尺立剪荆棘坐起瘡痍
貪墨惴避單赤歌嬉擿伏盜儒平亭宥黨市虎辨讒
池魚釋枉寢園旣葺抑讓居勞奏績馳榮奕世爲昭
入貳地卿踵躋九棘國之大事惟兵與食亦司廩庾

亦詰戎兵文武爲憲社稷是憑翁方顯庸遂請歸省
親調一菽甘踰五鼎爰降溫旨式鑑悃誠虛位以待
行且召卿嬰孺孺慕有母垂白乞骸至再聚順惟百
玉樹盈城金緋滿床爛斑竝舞悅豫且康自有子孫
自有昆弟孰如我翁倫全社備自有甲第自有書香
孰如我翁源深流長從良赤松開度綠野登臨侍郎
起居司馬矧有令子嗣起中丞王國屏翰公侯干城
遠塞遐衝雲中上谷趣駕去秦驅車入蜀念彼夜郎
厯我宵衣移季作忠自東徂西洒淚永泣絕意及顧
業已委質不遑將父亦有叔子斂錦南宮方願色養
乃奉考終子姓家號行人路泣絕地承諱昊天銜恤
翁之生死旣哀且榮翁之存沒亦順且寧漆園大年
栢房長夜音徽雖邈典刑弗謝某之視翁實大父行
家聲遜美仕籍踵芳先公先君附驥以起惠而好我
暨及叔子追悼靡及敬圖不刊託手彤管播之素旃
嗚呼哀哉

陳母沈宜人誄

有序代作

萬曆乙巳秋某月誥封宜人沈太君卒太君余同舍
郎陳君承一之母也承一分權虎林報竣燕邸居無
何念太君輒心動卽移疾歸而太君已捐帷矣嗚呼

哀哉繼配封公誕育繕部稱貴母矣而再膺綸誥則
以前宜人冢嗣憲副後梅公郎刑曹考績推恩等於
所生竝稱宜人云憲副公色養太君無二也以故承
一卽踵貴太君依依子舍不欲爲遠遊承一亦不敢
家于官子身守闕下者三載惟是權之役以板輿奉
太君權祿養怡顏僅僅卒歲云何不吊遽及閔凶鳴
呼哀哉不佞同官爲僚共戚若母敬吊承一而誄太
君誄不及閨帷古之制也人又有言婦人之德非誄
不顯爰作誄辭其辭曰

婦王宗曾不虛中壺繼室有聲陰教所本猗歟太君

柔嘉挹損嬪于德門言無出闈鳳占旣協如鴻儷光
鸞膠允緝如媿嗣皇蒹葭竝倚蘭蒨襲芳承家不造
夫君溘亡呱呱遺孩問誰卒蓄冢嗣亢宗實惟家督
委命從子伯仲以續

承一幼育于伯兄後梅公

遑閱我公伶仃躑

躑所不卽歿以是藐孤形影相吊攻苦茹荼晨霜冬
絮飲淚咽鳴願肉白骨用答黃壚伯氏登庸書勲冊
府譽命自天施及後母禴翟馳樂厥品惟五度幾怡
愉迓此純嘏厥子燕翼聿稱鴈行聖善受矩克比元
方兩戌起家後先頡頏甲第策名數亦適當

後梅甲戌承一

戊戌俱二甲
二十一
惟伯之劬繁母之教伯返丘園仲登廊

廟母曰俞哉國恩矢報子舍優游勿謂余髦仲旣服
采職典玄熊帝曰咨垂其若予工權政弗飭物力漸
窮往慎攸司惟爾之功萊服始娛潘輿乃御西湖弭
節南新分署一日之養百順斯聚瓜期旣及王程且
遽別母就道方還闕庭噬指心動五內屏營移疾徒
跣軌弗及停邁茲大恤皇天杳冥我聞母德惠問孔
淑遺澤留捲徽音式穀載享榮華兩膺章服人誰不
死母死無恧何以報母移孝作忠何以貽子清白自
躬慟真罔極滄匪無從我陳斯誅託管惟彤嗚呼哀
哉

啓

請胡座師啓

同門十五人

衡鑑無私拔十而兼得五旃幪有造事一合而生三
惟門牆荷剪拂之恩敢奕世忘結銜之報捫心永矢
矯首齊鳴恭惟老師名重斗山功垂河洛搖筆魁三
象煥乎有文勒史成一經行其無事流沉白馬安瀾
興瓠子之歌水見青龍利涉起輿人之頌特當帝簡
載典朕虞矧叅奎壁之藏爰主文章之命辨練光于
曳馬五色不迷識寶氣于連牛一毫莫爽詎意樗蒲
之品獲收桃李之班求賢意在得賢心惟爲國知我

恩同生我身幸及門曷飲食之已抱先施之愧式泮
渙矣敢希下濟之光謹涓吉以肆筵擬輸誠而羞藻
節當鶉首慚無消暑之珠時借燕閒幸有繞梁之玉
冀領書紳之雅教願聞曳履之先聲伏候俯俞曷勝
仰企

候申相公啓

代馮老師作

振鷺克庭俊士策名于上國漸鴻在陸元臣繫望于
東山幸觀濟濟之人文益仰休休之相度旣通仕籍
咸屬公門恭惟閣下上德下民先憂後樂奮庸宅百
揆旁招何止千人寅亮弼三朝平定永貽萬世身雖

暫引明俊民而不丕讓于仔肩心如有容好彥聖而不
啻其出口伏念某高山景行流水蒙知兩紀甫逾歲
適周而在丑十科載啓時承乏于同寅濫厠提衡猥
叨涉筆僅按圖而索駿詎發亦以解牛簡厥修簡厥
不修識必資于藻鑑觀其主觀其所主進有類于茹
征儻五色之眼不迷期一毫之心必盡知人則哲敢
希歐陽子之明取友必端肯負尹公他之直何幸三
千禮樂已歸此日之鑪錘苟得一二英賢豈惜當年
之衣鉢仰體同升之誼大夫薦爲大夫俯酬異等之
恩國士報以國士敬託魚鴻之便式陳羔雁之羣因

思動植肖翹盡是鴻鈞之覆燾譬如榱楹棟桷更需
大匠之裁成敢因敦勸以盟心尤切勤思而翹首蚤
就蒲輪之召尚宏薪糲之途有如一藝之不庸亦是
匹夫之弗獲共集多士維貞之慶丕建萬年純佑之
基

候林大僕啓

代

彤庭薦引夢依天上之龍綠野優游身伴雲間之鶴
惟家食無忘戀主乃邦植必係思皇矧登延出大君
子之門豈稱塞在庸衆人之列恭惟門下績偉辰猷
名高夕拜閱人數百輩獨持西省之權衡去國十五

年共仰東歸之袞繡意者耻一夫之不獲欲其收多
士以攸奔伏念某幸列門墻得通版籍既承夏屋感
晉接之渠渠謬典春闈慶泰來之濟濟風簷易失公
求士甚士之求公星紀載周後視今猶今之視昔既
按圖而索駿豈愛屋而忘烏哲愧知人更歸恩于知
已取期端友敢負學于端人極知桃李之無私始識
菁莪之有造德不報者非人也惟我二天道將行歟
其命耶以吾一日幸免不公不明之誚當思爲剪爲
拂之由網羅幸辱于品題衣鉢恐沿夫故事文章祇
爲餘技未足酬知道德莫負初心尚期竭節共利大

人之見無忘小子之裁仰冀憐悒獲聞馨歎俾庶士咸遵規矩不致貽門下之羞則衆人盡剖藩籬猶勝作廁中之報敬因尺牘罄寫寸衷

賀朱相公啓

代

青宮定策共瞻日月之重明黃閣宣麻忽睹乾坤之交泰惟天啓百年之運乃后求一德之臣朝野均懽簪紳胥慶恭惟閣下嶽誕申精星鍾說秀道膺天壽一身恒繫乎安危德爲帝師四海每占其出處乃者宸衷默牖聖政倏新升儲慰九廟之靈置輔備三台之象慶吾君之有子朝覲訟獄咸歸爲天下而得人

麴蘗鹽梅竝用商山重望坐收羽翼之功涓水情殷特簡腹心之任中國相司馬允符夢卜之人情天上集夔龍會見奮庸乎帝載蓋置諸左右亦沿每朝爰立之常儀而需以歲年遂侈盛世舉行之奇事人皆曰賢選于衆聖心自秉乎權衡官不必備惟其人公輔聿新乎鼎鉉在昔熙寧之虛席數月竝拜王韓景德之缺位累旬同除畢寇未有久延曠歲師錫崇朝若相公之于今日者也適當簡注必幸遭逢帝舊學于甘盤奚待肖夢中之象君親見乎堯舜奚忍愛覺後之身已知幣聘之幡然遙想繡裳之顯若伏念某

山園集 卷二十一
向貳銓曹茲塵華貫與聞推轂雖爲國而薦賢循分
據牀實通家之猶子班隨末品喜越恒情敬摠雀躍
之私肅附鴻飛之便沃朕心用作舟亟濟百川之陷
溺聞君命不俟駕蚤登十里之沙堤佇看三節之星
馳行望九闈之日近

復陸宗伯啓

代

恭惟門下天上星精雲間人瑞社膺仁壽四夷亦問
其起居學爲帝師九列共欽其丰采矧以步趨瞻若
仰伯夷之直惟清至于典禮闕然羨仲山之明且哲
廼者宸衷默啓儲位倏升雖九天原廟之靈或四皓

商山之力聿修彛典特眷元臣遙想皇華六傳之榮
垂及白首百齡之慶嘗考鴻恩孔厚間一修憲老之
儀未聞鶴笑彌高能三致命官之寵如門下者也某
聳觀盛事忻遡高風豈荷謙光忽承晉接詎謂循牆
之職敢徼下逮之仁傾嚮徒勤感藏曷旣廸惟子保
方國家卜世以無疆貽厥孫謀知福祿引年之未艾
亟精鼎食以副巖瞻

謝唐王啓

千載風雲瑞氣鍾靈于崧嶽九重雨露奎光映彩于
薇垣桃李悉在公家薪樞聿稱盛典恭惟殿下南服

分藩東平樂善桐圭胙土沿唐叔之舊封栢嶺開邦
膺皇明之新命更好賢而禮士乃造俊而作人茲當
闡棘之秋實有拔茅之慶伏念某斗筭末品襪線微
材謬典賓興偶乘人乏謹按圖而索駿詎辨氣于連
牛幸報賢書仰酬帝簡豈意咸登之日猥蒙晉錫之
恩極荷謙光可勝震惕謹銘心而戴德敢稽首以颺
言某無任感激屏營之至

復王代巡啓

振鷺克庭桐栢祭生花之筆乘驄載道菁莪承偃草
之風咸屬公門久欽仕國恭惟臺下廟廊重噐海岱
奇珍近聖人之居宗師一世代天子之狩整肅百僚
寧詎爲墨綬之儀刑抑且作青衿之楷範高山仰止
東與泰以俱登中土甄陶甫及申而竝降已慶泰來
之濟濟猥叨晉接之渠渠伏念某襪線微才章縫末
品偶緣人乏謬典賓興恐五色之眼易迷期一毫之
心必盡黜浮薄如王旦明公正其人矣薦洛陽之賈
生不佞豈其裔乎尚藉旃幪共襄薪樗譬如榱楹棟
桷紛紛匠使更需衡度于主人且思動植肖翹種種
萌生總賴栽培于造物因承筐而鳴謝謹伏軾以披
衷仰冀淵涵可勝水暢

候王相公啓

伏以星臨南極明王發黃耆之思雲臥東山太傅繫
蒼生之望應五百年而名世與處台垣衍八千歲以
爲春成登壽域恭惟閣下鳳麟協瑞河嶽儲精四海
具瞻萬邦爲憲歷三遷而入相取日虞淵同一德以
格天作霖商野迺袞衣信宿西人寄慨于鴻飛而綸
綍傳宣中使特修乎燕饗十年休沐而大臣法小臣
廉甫介懸車之日且一疏陳情而周公前魯公後允
諧戲彩之權共仰碧山學士之生申寧止絳縣老人
之紀亥凡叨門屏竝侍尊罍而某奉簡書未遑華祝
遙指海東而企望恍若方平之往來新從塞北以言
歸但詢君實之安好特馳一介之使敬上萬年之觴
伏願順時節宜爲國珍重就車輿以應召賜几杖而
乞言壽考百年詎止武公之睿聖弼亮四世永作康
王之父師

答撫院霍南溟

以下按部

辟臺望著飭紀法以憲四方制闡名高端表儀而糾
庶案矧荷雲中之重寄實關天下之具瞻恭惟台臺
文武壯猷安危注意籌邊禦虜已奏偉伐於玉門疏
爵通侯宜被隆恩於金闕佇崇登乎八座將永勒乎

山園集 卷二十一 三十一
千秋某以庸流獲叨共事幸龍光之日近辱駿惠之
時頒拜手登嘉汗顏矢謝欲報之德何以爲期謹伏
軾以颺言容執鞭而請益伏惟台炤未旣敷宣

答總督馬鳳麓

決策樞庭四表仰安攘之烈宣威沙漠九夷聞元老
之名再辱謙勞不遑異謝恭惟臺下羽儀經國閎闕
名家西楚封疆久藉保釐之寄北門鎖鑰更崇節鉞
之尊威凜上谷風霜恩自九天日月惟茲狐嶺龍門
之巨鎮必需麟符豹略之元臣華夏交懽文武爲憲
伏念某猥以非材偶叨簡命幸通家之世誼微共事
之末光未收空北之竒式賴指南之誨屢承鸞睨兼
荷溫詞誦以廻環拜而登受惟深銜結未罄敷陳伏
冀台慈俯垂原照

答霍南溟

龍韜豹略久垂塞上之勲虎節魚符迭聽師中之頌
謙勞再辱異謝不遑恭惟台臺帝倚金湯時資霖雨
文經武緯鞏泰山之四維外攘內安屹長城之萬里
淨妖氛而捲甲倒銀河以洗兵麟閣名高疏爵宜同
博陸龍門績茂論功寧數嫖姚行且帶山而礪河詎
止賜金而橫玉不佞某猥以非劣奉此簡書愧未展

夫一籌乃頻承乎三錫有懷悚及徒自勞惶附申感
激之私莫致覲縷之悃仰祈丙焯不任寅忱

答餉部曹還素

恭惟老年文臺下文源翻浪學海驚濤嗣有家風寧
數河東三鳳蔚爲國器共稱魯國一儒濯從秋水之
塵玉瑩不染照入寒潭之徹冰鑑無私惟茲塞北之
全儲實倚雲中之半壁駕朱軒而辭輦轂分玉節以
佐軍興士飽馬騰內安外攘若論功其第一知佐國
之無雙不佞弟幸附同登更叨共事式藉指南之誨
聿收空北之奇載辱謙光敢稽異謝附致覲縷之悃
益深銜結之私欲報未能有懷不盡

答山西按院喬鶴臯

風清烏府山河壯振肅之威塵偃龍沙邊微藉澄清
之澤猥慚後乘幸賴前茅恭惟臺下河洛精英斗山
重望筆端颺起長驅憑社之狐袖裏風生直作朝陽
之鳳持三尺堅如金石陰見睨而已消察百僚平若
權衡木從繩而自直甘雨隨星輶而普渥行邊免恤
恤于露根陽春從霜斧以豐施過處盡怡怡以平葉
雖竣雲中之狩爭懷日下之思伏念某翹首瞻惟追
踪綱紀法星移次已違兩舍之遙福曜載涂僅阻一

山之隔未遑濡削載荷隆儀徒踏地以懷慚且循墻
而知懼拜而登受誦以迴環尺械耶附于回翔寸抱
第增于搖曳尚容端布統冀炤原

答山西撫院李玄石

辟車峻秩夙推文武之兼材專席雄班式荷保釐之
重寄山川改色士庶騰懽恭惟臺下聖傾朝野聲溢
華夷才猷益暢于綿更勲業茂揚于歷試聿隆與望
簡在帝心緬惟西土之照臨實係中朝之砥柱指日
傳晉公之新命普天誦方叔之壯猷不佞某猥以豎
儒偶叨巖鎮懼顛躋于蚊負幸密邇乎龍光曾濡削
之未遑荷瑤函之先及拜而登受誦以周環尺械聊
附于回翔寸抱第增乎搖曳仰祈崇炤未罄下忱

與喬鶴臯

列栢宣猷山右普澄清之績及瓜報命朝端崇侍從
之班頌謠已洽于吏民登對且孚于君相恭惟臺下
瑞鍾嵩嶽望重斗山豸一角而觸邪威生採藿鳳千
仞而下德澤遍芾棠豈三晉之獨有二天乃兩鎮之
戴如一日行行且止長安爭避花驄皇皇者華上黨
共攀車馬風清驛路春滿河汾伏念某叨附後塵幸
徼餘庇飛騰漸遠時瞻瑞鳥之儀慕戀彌深聿記神

止園集 卷二十一
羊之迹敬馳尺素肅布寸忱捧日彤庭望斗曷勝其
仰北觀風紫塞臨岐尤切於指南統冀台慈俯垂鑒
炤

與餉部楊華毓

恭惟臺下德重岷峨文昭參井趨鯉庭而承學瑞起
鳳毛接烏府以齊名光生鴈序特被中朝之簡弔司
上谷之儲關西奚愧四知一塵不染塞北共遵三約
伍卒無譁縉弁均懽邊庾永賴弟某夙叨教愛今喜
追陪萍蹤幸聚於他鄉芹獻擬將於別署三薰以候
廿日爲期伏冀寵臨可勝榮藉

與督撫回賀

節鉞拜金門安攘素雄於九塞兼葭倚玉樹紀綱寔
藉於三台屢塵溢美之詞更荷錯珍之惠感鏤肺腑
報乏瓊瑤恭惟台臺天挺人傑聖世文宗體象黃裳
共仰匡時之略樞分紫塞聿兼獨坐之尊卓哉當代
夔龍允矣禁中頗牧某樗櫟末品襪線微才祇奉宸
綸最苦激揚之典專銜簡命更難經緯之功夕且乾
乾日惟凜凜佩折衝於尊俎今固無期洒籌畫於珠
璣心懷至願敬修魚素用申趨步之誠溷賫龍光敢
謂報施之稱伏希台鑒曷任歡騰

與曹還素回賀

才裕邊儲偉略獨雄於塞上情殷年譜豐儀先下於
雲中五內難忘八行莫罄恭惟臺下清時砥柱名世
寶臣緝武經文走龍蛇於筆底安邦裕國富兵甲於
胸中宣德三雲敷恩九塞貔師萬旅曾無枵腹之虞
虎甲千屯其戴投醪之惠蓋民生國計之宜灼如觀
火而士飽馬騰之績捷若應機某襁線微才樗櫟未
品茲承簡命共事疆場乃辱高情先施朔漠未效瓊
瑤之報聊申藜藿之私伏惟莞存曷勝忻慰

答霍南溟賀大閱

壯猷夙抱廟堂隆推轂之權鉅鎮孤懸帷幄仗迥
之畧鞅譯載涂而輸欵旃裘交臂以乞降恭惟台臺
匡國盡臣應時名世敦詩書悅禮樂窺聖域之妙而
探其心安邊境立功勲塞武夫之口而奪之氣允矣
北門之鎖鑰巍然上國之長城某海濱豎儒菰蒲下
士綉斧叨承庸駑是懼榆塞觀風方媿澄清之未效
楓宸懸日何堪簡閱之再承忽驚珍貺寵頒遠厓溫
詞再辱瑤函璀璨恍挹台光深荷注存曷勝鐫刻謹
望風而登受聊據案以攄忱伏惟崇炤不任神馳

答曹還素賀大閱

恭惟臺下望隆山斗聲著巖廊緯武經文允矣士紳
推重安邦定國衰然年譜增光爰簡注於朝中來督
儲於塞北邊庾有賴伍卒無譁某海濫豎儒菰蒲下
士綉斧叨承庸駑是懼榆塞觀風方媿澄清之未效
楓宸懸日何堪簡閱之再承忽驚珍貺寵頒遠厯溫
詞再辱瑤函璀璨恍挹台光深荷注存曷勝鐫刻謹
望風而登受聊據案以摠忱伏惟崇炤不任神馳

答山東按院蕭念野

白簡時巡彈壓夙嚴於霜斧彤庭報命澄清允協於
天閣龍節增輝烏臺生色恭惟臺下天鍾黼黻性裕
經綸威稜凜烈於風霜獻納高懸於日月暨泰岱一
聞郢調而海表遂失齊雄厚德回春立起納溝之瘠
直聲動地行贍避路之驄駿猷再著於名藩鴻望久
推於內席帝心簡在士類皈依不佞某猥以菲材肩
茲重鎮愧激揚之無術矧戇直之難容稅駕何時僨
轅滋懼過承珍貺屢辱溫詞勤施已被乎再三報塞
未伸於萬一勒微衷而志感拜尊命以懷羞肅布謝
私仰祈台鑒

賀蘇松按院鄧來沙

璇霄明法象光膺玉綵以觀風
蕭斧肅清霜瑞擁花

山園集 卷二十一 三十一
聽而按部懽騰遐邇慶溢簪紳恭惟老公祖臺下正
氣峻峭貞心粹白讜論力扶國是英華丕振臺綱結
帝深知聿掄材於中秘代天巡狩爰執法於南邦百
城草木增輝一路風雲動色將爲社稷之重寧止山
嶽之摧伏念某蚊負微能鵠班弱羽舍膏執簡虛叨
共侍螭頭攬轡登車更幸追隨貂尾斗山仰止竊私
淑於受屢雲樹蒼茫愧希申乎賀厦敬裁不腆肅致
未將輶賁爲慚鑿涵是荷

答真定撫院趙見田

碎車峻秩風推文武之兼材專席雄班式荷保釐之
重寄騰以股肱之首地宜求心膂之世臣寵錫巖廊
懽騰瀛海恭惟老年伯臺下名世宗工清朝舊德巖
巖特立操持素秉乎剛方濟濟同升進退必依於孝
友蓋當東山之愛口已需北闕之甘霖允協輿情晉
膺簡命寧詎聯塤篳以合奏且將躋鼎鉉以咸登何
意明時覩茲盛事不肖某才同樗櫟臭附芝蘭遙瞻
父執以景行久佩師言而祇服昨從驛傳獲傾三十
載之闊悰茲荷駿頌復塵八百里之厚貺拜嘉有愧
銘鏤無涯遙望洪涵敬申謝悃臨楮不勝感仰瞻依
之至

與撫院連少嵩回席

行役塞垣攬轡愧澄清之烈遭逢幕府披帷升樞密
之堂寵溢登龍喜同豫燕恭惟臺下泰階申甫熙世
夔龍節鉞獨膺丕振六師之壯氣甲兵滿腹永堅萬
里之長城某久慕下風殊勤山斗冒承榆塞獲遂荆
瞻徼某事於一時慶良緣於千載謹涓日肅治賓筵
祇迎法駕席前僭筋精神折樽俎之衝柱後彈冠談
咲仰步趨之矩順風而請卜日以頒伏冀俯俞可勝
仰跂

與李玄石回賀

國家居重馭輕肩背卽懸於絕塞都護臨邊拱闕
肱斲事於登壇爰咨國老之番番來鎮巖關之翼翼
恭惟台臺學蔚儒宗才優王佐秋風笳管曾無孺子
彎弧春雨犁鋤惟有牧人驅犢不獨三晉雲中赫濯
聲靈盡消反側遂使雲谷上谷跳梁凶醜頓息烽塵
其自仔肩於朔漠得承懿於風華倚玉誠深懷帡良
厚頃拜瓊瑤之貺感切銘心茲申芹藻之儀敬將藉
手伏惟慈炤不任光榮

與曹還素回賀

足兵先足食主計良艱理財在用人出納惟允若師

不宿飽奚可責之禦侮一方必行有裹糧乃可使之
宣威萬里根本重寄邊徼先圖恭惟老年文臺下珪
璋奇質金玉令音大國雄飛雅負安邊之志三雲督
餉遂司經國之權貴粟實邊必鼂錯能開一時之利
計口給餉如鄒候克成萬世之功其自負重於朔漠
得承懿於風華倚玉誠深懷悌良厚頃拜瓊玖之施
銘鏤心肺茲肅芹藻之悃敬謝光榮伏惟慈涵可勝
感哉

答霍南溟

樞分紫塞聿兼獨坐之尊體象黃裳爰篤同舟之誼
恭惟台臺間值忠貞性生骨鯁鑑明而塵垢不止黑
白昭彰旌指而腥羶莫逢妖氛屏跡虎豹之威逾振
犬羊之魄潛消是爲聯方呂之蹤而接范韓之武者
也某惟末品猥佐下風夙駕星輶殊慚風節最苦激
揚之無術更難安攘之周防詎意寵施頻加菲劣覩
瑤華之飛墜惟覺目眩神搖承筐篚之儼臨直用銘
心感德三薰勒狀九頓陳詞餘俟面宣伏祈心照

與山西按院劉貞一

璇霄明法象光膺玉綍以觀風綉斧肅清霜瑞擁花
驄而按部權騰遐邇色躍河山恭惟臺下命世人豪

山園集 卷三十一
凌霄品格讜論力扶國是英摹丕振臺綱結帝深知
從日邊而授鉞代天巡狩向重鎮以揚旌紫氣遙臨
三晉屏藩轉壯紅雲浮動十連兵甲增雄軍民欣見
乎節旄首虜驚聞乎姓字某夙叨肝鬲之愛不減手
足之情咫尺龍光阻修魚素聊陳賀悃肅候台禧望
重澄清鴈代幸瞻真御史勲隆輔弼槐扉佇拜大天
卿某臨楮曷勝忭仰之至

與楊萃毓賀壽

景星耀彩欣逢鶴算之初長計府懸弧喜見鴻禧之
倍錫歡騰中外慶動華夷恭惟老年文藝苑飛英蓬
萊毓秀經文緯武裒然邊塞干城足國籌邊允矣朝
方鎖鑰茲當萬類發揚之會值嶽神誕降之辰浮瑞
氣於雲中茂衍無疆之祐光紫微於天上長膺不老
之符第某情深昆季喜倍尋常欲效華封之祝莫遂
見趨謹陳沼沚之毛用伸燕賀伏惟鑒納不既光榮

答劉貞一

擁旄榆塞欽持斧之芳名畫輪相臺荷祝金之殊寵
光增白磧感勒丹衷恭惟臺下勳力回天忠心貫日
栽花滿縣夙稱一路福星贊畫中臺特被九重湛露
秉衡三晉已看山岳之動搖折衷兩京行見風波之

偃息憂國共期于師濟當官力挽乎紛紜一鳳自鳴
羣狐悉屏不佞弟心懷獨往義切同舟偶致芹將旋
煩遽使華槭燦琳瑯之簡佳貺倍瓊玖之儀拜以迴
環愧而增結附申謝悃伏冀台涵

與趙見田回賀

節鉞拜金門安攘素雄於九塞兼葭倚玉樹紀綱寔
藉於三台仰辱溢美之詞更荷錯珍之惠感鏤肺腑
報乏瓊瑤恭惟老年伯臺下天挺人傑聖世文宗冠
冕人倫聲價允推月旦羽儀中外勲名直上凌煙卓
哉當代夔龍允矣禁中頗牧某樗櫟末品襪線微才
祇奉宸綸最苦激揚之典專銜簡命更難經濟之功
夕且乾乾日惟凜凜佩折衝於尊俎今固無期酒
畫於珠璣心懷至願敬修魚素用申趨步之誠涓
龍光敢謂報施之稱伏希台鑒曷任歡騰

答原任大同撫院張助所

卿月騰輝西塞褫旃裘之膽德星反照中州修初服
之心澤潤蒼生席虛紫塞恭惟台臺跨海羽翰昂霄
棟榦憲萬邦而作范合三省以揚休決策運籌寢四
郊之多壘定盟合欵堅千里之長城豈期痛抱於終
天遂爾遄奔於不日人傳純孝帝鑒精忠方推轂以

上園集 卷三十一 三十一
登壇復懸車而旋里共嘆干戈之未息冀看衮繡之
重來不佞叨役邊陲夙欽山斗未遂登龍之願忽承
繫雁之章拜以迴環對之皇悚謹循墻而登領祗踏
地以懷慚肅勒蕪詞恭陳謝悃伏祈崇炤不宣

答楊華毓回壽

老年丈毓山川之靈秀應運肇生協麟鳳之禎祥際
時現瑞安邦裕國風清榆塞之塵永錄添籌光藹蓬
萊之島其猥以凡庸夙叨恩庇密瞻型範幸竊甄陶
喜遇令辰媿寸忱徒抱遙申華祝冀百禩方祈松栢
之禮尚虛介壽之祈正切詎期野獻復辱珍頒華札
起居臨風瞻切

答楊餉部賀端陽

拭露和津命縷應天中之節折花競巧長絲逢地臘
之辰惟昌時協景物維新故令德與陽明並盛某雲
中瞻睇幸芳蕙之將承塞上奔驅慚盤菰之未展迺
辱台眷枉塵鴻倅筐綺羅珍拜命如承蘭沐華絨麗
潔著心何啻靈符謹勒蕪函用鳴謝悃伏冀電炤曷
任屏營

答督撫賀端陽

青園列嶂槐榆蔚蔚映堯天綠遍芳洲杜若依依披
 舜日苜華泛酒千家齊醉太平年楚粽傳香萬竈咸
 歌豐樂歲竊念某徒負激揚之任慚無振肅之能仰
 元老之餘休救補不逮荷台臺之渥惠戴履何堪龍
 鑑無私合照乾坤俱作鏡鷺陂已廢放生江海盡為
 池賜並玉壺水豈靈符神印之可擬德茂金莖露何
 長絲細葛之能酬捧寶軸之雲來荷珍遺於日下戒
 涼殊歎飯賜增慙九頃登嘉一言申謝某無任懷仰
 感之至

與督撫賀端陽

刻蒲紀節芳馨清徹於初晨採艾懸門淑氣鬱陰
 華府况茲邊徼之地更當虜狄之秋沙漠庭空奚待
 辟兵書鬼字垣城鎖固何須神印記靈文嘉景難逢
 良時不偶某涉遊川谷祇聞鼙鼓之聲感荷光憐有
 愜奉衣之願望轅門而烹鶩思獻隔雲天而宴玳無
 從九子粽傳走一介之行李五色絲燦兆千歲之遐
 於是惟俯效暴誠故敢冒陳芹菲伏祈台鑒曷勝邇

止園集卷二十一終

止園集卷二十二

延陵吳亮采于甫著

啓

賀南直學院史武麟

道啓昌期萬里慶風雲之會天開文治三吳愜山斗
之瞻樹物表之型模動區中之踴躍恭惟臺下氣肥
河山節堅金石鳳千仞而下德大吐氣於君子正人
豸一角而觸邪惟正色於險夫媚士肅在山虎豹方
埋都下之輪除當道豺狼宜攬留中之轡共仰在淵
之砥柱矧推名世之宗工繡節耀南都棧樸菁莪十

四郡之奎光增煥文旌麗東井詩書禮樂二百年之
泰運宏開寧詎國是攸關實爲道脈所係法星初耀
羣材濟濟領春風化雨均沾多士彬彬歸大造伏念
某倖隨臺案今屬塵氓榮命初聞皈誠尤快肅修短
幅少伸燕賀之忱祇獻崇階仰竇龍光之重伏祈俯
鑒曷任顛瞻

答撫院劉健菴

辟車峻秩夙推安攘之勲專席雄班式荷保釐之寄
睠以股肱之重地幸求心膂之世臣寵錫岩廊惟薦
寰海恭惟老年伯臺下名世宗工清朝碩望安危注
意威稜遠聳乎三階文武壯猷譽命已躋于八極元
戎受制未雨徹桑土之防桀虜跳梁先聲奪旆表之
魄聖明簡在恩眷鼎來以我公歸入領北軍之重自
天子所遠昭南仲之威此儒者之極榮亦國家之盛
事不肖某才同樗櫟臭附芝蘭遙瞻父執以景行久
佩師言而祇服重厓鼎翰更辱豐儀謹拜手以登嘉
敢齋心而矢謝揄揚莫罄銘鏤無涯臨楮不勝感仰
瞻依之至

答史武麟

恭惟臺下海內龍門河東鳳羽剛大而養以直氣塞

兩間高明而道則中蒙開闢古帝念祖宗棧樸之地
實關英俊薪禎之途須藉鴻儒特隆駿命望聽行于
白下俄驚漢代威儀震虎踞于金陵寧效隋朝詞賦
以馭吏之心馭士品題高下掃除月露風雲由掄文
之法掄材殿最低昂相盡驪黃牝牡于今獨盛亘古
有光乃當駢駢靡及之時猶荷眷眷不忘之寵豐儀
申錫鼎翰遠頒慚芹曝之未伸辱瓊瑤之再報感惟
踳地懼且循墻尺牘難宣寸衷易結唇咳暫違于兩
地併懔永戴乎二天

與工部左堂王弘陽

聖崇九寓升華允若乎予工位近三台渙寵旋然乎
帝載慶貽宗社歡洽朝紳恭惟老年伯臺下百年名
碩一代具瞻正氣凌霄屹中流之砥柱清風振世聳
東魯之高山輿論共推宸衷獨簡雅望方資于定辟
新綸暫借以司平肅六府而用修宅百揆以時敘國
崇元老將鼎鉉自此而允升朝用正人庶泰茅從茲
而彙進帝聞曳履士用彈冠伏念某才不如人分叨
猶子素佩師言而祗服遙瞻父執以景行盛事躬逢
懽情倍切叩九闈而馳候希一介以攄衷莫罄菲忱
仰祈茹納

與吏部孫立亭

治均四海元勳冠八座之尊望重三台太宰列六卿
之長帝惟求舊邦用維新恭惟台臺嶽瀆真精乾坤
間氣確然不拔操持特秉乎剛方公爾無私權柄肯
移于宵小久結知于日月猶待感于風雷十五年暫
卧東山寤寐弗告四千里復還北闕夢卜九賢正士
升華將泰茅從茲彙進元臣彌直惟師言誰不欽承
國是永清世道攸賴伏念某下僚末品遠塞孤踪遙
瞻鼎鉉之崇徒切升階之仰敢謂託身于後武庶幾
拭目乎太平肅具荒函恭申賀臆

與順天撫院劉健菴

龍節高懸威望夙隆于薊北麟符特昇聲華久著于
師中勲垂瀚海陰山名覆金甌玉檢萬殊闔懌九鼎
尊疆恭惟老年伯臺下堪輿間氣社稷元僚身係安
危寢四郊之多壘才兼文武作萬里之長城芝檢屢
膺樞庭迅陟自天子重北門之鎖鑰已寬東顧之憂
而胡人憚西府之運籌敢縱南下之牧有世臣之謂
也舍我公其誰哉伏念某辱以通家芘于宸宇茲奉
邊陲之役益勤巖石之瞻敢介不腆之儀用伸未將
之敬有如懽覲未旣敷陳

與吏部蕭玄圃

玉堂隆重銓卿已屬于鴻儒水鑑清通法從仍推夫
少宰並陟崇巖之地特兼華要之階簪笏騰權冠裳
胥慶恭惟台臺經綸學術黼黻才猷草視鑿坡金蓮
徹御前之燭麻宣鰲禁瓊花錫掖左之春膺帝簡以
握銓衡代天工而司黜陟智巧無留于根柢賢愚共
效其涓埃玉燭自調金甌已覆伏念某猥以凡庸濫
叨任使心懸仰斗徒厯想于龍門職繫觀風愧羈踪
于雁塞敬陳荒啟聊布芹忱恃明信之可羞幸汪涵
之用鑒

請撫院霍南溟

三雲星聚寧詎微十日之驩兩地萍分當且抱三秋
之感擬申下悃載設初筵恭惟台臺氣涵剛大性秉
中和庭下芝蘭已作傳家琬琰邊頭節鉞遂成奕世
弓裘當安危注意之時須文武兼資之略蠢虜盡縻
戎索名王將受綸封卽晉秩于中樞方書勲于上考
不佞猥奉邊陲之役益隆岩石之瞻分手有期傾心
無既謹詹甲日肅效寅忱難輸報李之私未卜班荆
之日仰祈光賁益重皈依

與漕撫李脩吾

台垣著望位躋八座之尊開府崇勳寵荷九重之眷
眷紳胥慶寰海均瞻恭惟台臺道裕經綸氣完剛大
玉瑩冰鑑大肝豪傑之衡芒刃斧斤盡褫姦邪之魄
兼濟于撫藉畢公之保釐者十一年觀水于源倚神
禹之莫敷者數千里惟台履已徧豐沛蕭礪之境乃
廟堂特總吳越齊楚之權姓名久覆于金甌勳業永
調乎玉燭想人情賢于夢卜佇望黃扉惟德望重于
斗山旋膺紫紱當俊明時之盛事可稱曠古之奇逢
伏念某辱以通家庇于宸宇况在受廛之列益塵仰
廈之私敢介不腆之儀用伸未將之敬有如權觀未

賀撫院霍南溟

生第七子

台臺勳茂麒麟祥生鸞鸞襲六為七寧數郭令之
蕃則百斯千應衍姬孫之昌熾若不佞多男實為累
徒詒豚犬之嗤而生子如仲謀乃見貂蟬之盛適當
彌月竊拜下風敬因下逮之仁輒效上交之賀儀雖
藉手感實銘心不任悃誠伏惟涵鑒

賀山西撫院魏惺吾

地雄重鎮安攘允賴龍翰天眷碩臣鑲鑰特頒鳳詔
邊疆催動社稷慶流恭惟台臺河洛儲英嶽嵩毓秀

安危注意一方久，覩塞帷文武憲邦八座盡爲推。轂爰受九重之寵獨，提三晉之衡豸省建牙旌。搖落櫬槍之影雁門擁，節鉞坐消關塞之煙。會見折箠以鞭四夷行將歸，袞以報天子不佞。叨役邊隅幸依隣壤，斗山在望喜聞鼎命之新雲。樹相思莫罄豫鳴之悃，敢馳一介敬上八行伏冀台慈俯垂昭納。

答薊遼總督王總督

北門鎖鑰夙推文武之兼材，左輔金湯式荷安養之重寄。萬殊閭憚九鼎尊強恭惟老年伯臺下堪與同氣社稷世臣風猷久著于

循千里先聲寢黠虜之謀爲憲萬邦獨斷折盈庭之議清商傳細柳風雲長護諸陵白羽映長楊星斗自懸三輔捧比極重輪之日撐東隱半壁之天共欽方叔之壯猷行被晉公之新命伏念某猥以通家氏于宸宇素佩師言而祇服遙瞻父執以景行豈洪鈞不棄管蒯之微乃鼎翰特錫瓊瑤之貺感而益悚受之若驚尺楫聊附于回翔寸抱第增乎搖曳有懷敢溯未旣敷宣

答督撫中秋

清秋建纛安邊據虎豹之威明月登臺欵塞落豺狼

之膽驩聲雷動佳景天開伏念某謀非屬國何能尺
組繫名王見泥書生徒以空言格罪戾尚藉運籌之
略少寬斧鉞之誅乃辱台慈過蒙鼎祝金莖玉露分
天上之珍貽桂馥蘭芬望雲中而賡頌敬憑去雁附
謝來魚感愧之私筆楮難罄

與餉部曹還素中秋

老年文手握璣衡心涵宇宙壁輪圓滿精神洞察乎
秋毫水鏡光明度量平分乎灝氣不佞弟幸攀瓊樹
久挹金莖依惟月之清輝借使星之瑞彩玉人在望
珍貺頻施欣歌白苧之章如薦紅雲之會投如明月

報之夜光惟此耿耿願言澄照

與都察院詹賀壽

海屋添籌遐福特隆于栢府台垣絢彩純禧益篤于
商臺喜介高齡敬申華祝恭惟老先生台座天上
星人間名世以四十年甲第耆碩熙朝際五百載昌
期表儀烏署况值萬壽允升之日正當七日來復之
期忠結九重功叅一氣臺中瑞藹宇內歡騰職心切
台階跡羈行部望斗杓而致祝願福履之永綏瞻申
嶽以載呼望天休之滋至商衡夙贊躋千歲而慶衍
長春帝昴常調朋三壽而澤流函夏職不勝欣躍禱

山園集
卷三十一
祈之至

與按院王鏡予

繡斧時巡聲震風霆之烈彤輪報命身依日月之光
績奏澄清恩崇寵眷恭惟臺下氣表山河節堅金石
燃藜鳳閣文章雅重于玉堂列栢烏臺綱紀特伸于
鐵柱鳳九苞而下德共瞻岡上之梧桐豸一角而爾
邪誰採山中之藜藿六轡攬勾餘之勝雙旌澄滄海
之波茲喜及瓜暫遄行李益注棲鳥之眷戀爭得進
馬之威名譽命鼎新褒嘉師錫不佞弟幸隨武節及
河臺班欣看持斧之來莫遂執爨之願故中不獨用
表未將恃蒞藻藻之可羞豈瓊瑤之能報伏惟鑒納不
任瞻馳

壽撫院霍南溟

天開姬曆甫戾鍾崧嶽之靈運啓漢符蕭相應昴星
之瑞屬懸弧之令節當臥鼓之昌期三壽作朋四夷
畢獻恭惟臺下心游密勿道合貞符聖世宗工瑤冊
輝煌于宇宙清時填撫雄風震疊于宣雲祝頌弘深
允稱難老五百年而間出永符名世之英八千歲以
爲春宜享永年之福某欣逢嶽降願祝華封難廣樂
只之章曷罄承筐之獻伏惟鑒登俯賜莞存

山園集
卷三十一
祈之至

與按院王鏡予

繡斧時巡聲震風霆之烈彤輪報命身依日月之光
績奏澄清恩崇寵眷恭惟臺下氣表山河節堅金石
燃藜鳳閣文章雅重于玉堂列栢烏臺綱紀特伸于
鐵柱鳳九苞而下德共瞻岡上之梧桐豸一角而爾
邪誰採山中之藜藿六轡攬勾餘之勝雙旌澄滄海
之波茲喜及瓜暫遄行李益注棲鳥之眷戀爭傳
馬之威名譽命鼎新褒嘉師錫不佞弟幸隨武
河臺班欣看持斧之來莫遂執爨之願故中不
表未將恃蒞藻之可羞豈瓊瑤之能報伏惟鑒納不
任瞻馳

壽撫院霍南溟

天開姬曆甫戾鍾崧嶽之靈運啓漢符蕭相應昴星
之瑞屬懸弧之令節當臥鼓之昌期三壽作朋四夷
畢獻恭惟臺下心游密勿道合貞符聖世宗工瑤冊
輝煌于宇宙清時填撫雄風震疊于宣雲祝頌弘深
允稱難老五百年而間出永符名世之英八千歲以
爲春宜享永年之福某欣逢嶽降願祝華封難廣樂
只之章曷罄承筐之獻伏惟鑒登俯賜莞存

山園集 卷二十一
筴張扼吭拊背之勢豈有微能成運臂使指之功尚
資石畫秋空萬里仰霜鶚以橫飛陶澤一樽效白衣
而上獻用供菜賞特進菊觴伏冀海涵曷任顙望

賀總督馬鳳麓考滿

獨坐天高虎帳雄千年之保障專城地重龍旂肅萬
里之威靈惟有元老之壯猷斯致華夷之率服綏寧
惟德鎖鑰在人恭惟臺下間氣鍾英貞元毓秀制目
中之虜呼韓稽首以獻琛運掌上之奇可汗傾心而
歸市靈旗斜指毋勞漢將增兵銅獸俯臨坐見雲邊
警息功已成于題柱寵方眷于宸衷茲當考績之期
百有剛勲之典殊恩絢綵于竹帛異數超軼于古今
慶動眷紳歡勝海宇其躬逢盛事徼藉洪休莫遂息
趨聊申燕賀

與山西主考

百年文運天開禮樂絢堯階之綵三晉名賢奎聚聲
華軼周室之英會侈風雲光騰日月恭惟老年丈熙
朝威鳳盛世神龍爰樹昭代之羽儀來作斯文之衡
鑑惟 聖天子念文體之口壞孰收砥柱之功使大
宗工挽士習之風靡大破靡虫之技許樞曹之暫擬
秉鉛槧以來臨辨白壁于塵中誰謂目迷五色拾青

錢于選內可憑頭點朱衣詎止王師且之崇雅黜浮
真是韓昌黎之起衰濟弱第省方有媿造士無奇幸
託大厦之萬間叨潤洪河之千里瞻清光于咫尺未
遂樞承走荒牘以逡巡實虞塵溺仰祈淵炤不任斗
瞻

答總督馬鳳麓

明主思危式重枚寧之偉績元臣攘外誕膺崇報之
殊恩寵溢群寮慶騰九塞恭惟台臺一代偉人三朝
碩輔運籌虎帳已銷萬里之塵揚武龍沙聿定千秋
之業軍民獲有安堵廟社倚爲長城今享其休伊誰
之賜微儀展賀輶褻懷慚詎塵台念之注在及
儀之還答重違嚴命肅拜登嘉率勒蕪詞附鳴
伏惟慈鑒曷勝瞻依

與薊遼總督王霖宇

元臣樹闡外之儀光動九邊草木上相表師中之烈
塵清萬里山河穹眷方隆輿情胥賴恭惟台臺德奠
地維位高天柱樞垣運畫提重鎮以控八蠻制府持
衡蒞峻秩以貞百度駿烈嘉元老之壯猷鴻恩錫明
王之異數幹微權銷餘孽軍氓就枕席之安飭憲紀
振雄關將吏肅激揚之度功已成于破虜爵且進乎

通侯九重垂帶礪之盟百世紀旂常之列某才同樗
櫟役在邊陲夙叨福曜之光厚竊天河之潤風高薊
北望中雲樹偏遙日遠遼陽夢裏斗山自繞辱瑤函
之先及欲報德而未能修荒墮以上塵愧享儀之不
及仰祈淵炤無任冰兢

答鄧來沙

九霄鳴鳳檐鳩藉附羽之榮萬里行驄涸鮒慶沾鱗
之潤二天在望兩地與思恭惟老公祖譽重南州名
依北斗負至大至剛之浩氣慷慨埋輪蘊不吐不茹
之高標從容攬轡文采

于栢堂
潤殘之後共披滿路仁風矧俗流混兢之時咸仰在
潤砥柱塗歌巷誦嶽動山摧竹膺鈞軸之司懋建瓴
條之業伏念某躡影後塵受屬下邑沐洪潤豈惟九
里庇廣厦何止千間更辱台慈俯垂存注珍貺遠頒
于塞北瑤函忽墜于雲中踧捧驚慚迴環頂戴寸抱
益增于捶曳尺楨聊附于回翔詞不宣心感惟沒齒
某無任企仰瞻依之至

答禮部林平華

翔鸞集鳳天符開與于一

三異謠興章甫寵賜綸書恭惟臺下器宇玉溫丰神
金粹桑麻無恙歌漢吏之循良桃李不言詠周詩之
豈弟旌書蔚起薦剡交騰函虜臺察之掄揚特簡宸
衷之眷注擬銜蘭省儼冰玉以俱清行晉瓊闈望斗
山之屹重不佞某倖隨藉雋更屬隣氓藉厚庇于二
天沾慈波于九里深懷怙恃久曠馳驅辱鼎祝之先
施荷豐儀之遠及益厯感佩殊切悚惶謹藉手以報
瓊第藏心而刻鏤仰祈崇炤不任下誠

賀撫院薛青雷

重鎮安攘允賴龍韜天眷碩臣從竊特頒鳳詔

聲動軍士驩騰恭惟台臺道匡時合
勁柝孤松節集轟雷掣電才華漢庭高獻替之風舊
知名于瓊闈楚甸懋將明之烈度振采于臬藩指顧
銷橫豎之魂呼吸定逆宗之變揆留皇鑒忠簡帝心
爰晉襍于中台特秉旄于上谷百僚承式萬旅欽光
草木盡偃乎風威夷虜素聞其名姓會見折箠以制
羗胡之命行看舞羽以貽社稷之休不佞某叨役巡
方念瓜期之將及乞靈開府望節鉞之遙臨肅附公
差敬陳私悃尺牘未申夫賀燕寸衷渴俟乎登龍伏
冀淵慈宥其唐突

與撫院霍南溟賀冬

暖浮霞瑄生和氣于乾坤瑞霽相暎揭晴光于霄漢
千祥聯集萬彙昭蘇恭惟臺下正氣匡時至誠知化
安攘功高榆塞壯風雲之烈綏懷德茂栢臺增雲物
之輝躋茲七日之來茂迓九天之眷縉裳赤舄贊大
造以轉洪鈞柔荔芳芸應昌期而引蕃錫不佞某自
慚逐日幸托垂雲喜君子之道亨擬華封之善頌爰
將芹獻奉佐瓊筵伏冀鑒存可勝亦企

與總督馬鳳麓

陽當來復之期紫塞一祥萬物慶人生
之候懽騰夷夏慶溢邊陲恭惟台臺六符
補天安壤功高榆嶺莊風霆之烈綏懷德茂栢臺
雲物之輝序立八風曾得鼎以推策令行四塞爭獻
履而迎祥邊庭無狼虎之煙廊廟盡麒麟之閣某材
慙樗櫟灰驗蕪葭喜陽德之方亨慶台恩之優渥欣
祝赤松而為壽恭獻青芹以表誠伏祈臺慈特賜睿
納願言雀躍可任馳神

答督撫賀冬

紫塞陽回萬彙咸熙于化日洪鈞氣轉千官齊拱手
福星夷夏騰歡地天交泰恭惟台臺譽聞西土鎖鑰

北門丕振乾綱褫虜酋而奪之魄重宣陽德莫赤子
 而使之安磊落掀天折紛糾解如風雨威嚴動地肅
 邊鎮震若雷霆式逢剛長之辰群陰退聽茂擁大來
 之慶諸福駢臻某欣逢佳節緬仰高風方伸至歲之
 儀遽荷先春之賜薰心布謝頓首陳詞伏惟台函不
 勝馳遡

與應天巡撫徐檢吾

建節南畿丕著保釐之緯績頒綸北闕茂膺錫之
 新恩光華近逼乎台垣慶休遠騰乎階塞恭惟老公
 祖峻節凌霄精忠貫日聖澤兼資文武謀猷久繫安

危遂協廷推特承宸簡鎮天塹二百年國憲喜壽
 雁來歸總金陵十一郡臺綱驚見鯨鯢遠遁事權獨
 重名位彌崇福星重耀于雲間化雨載沾于日下伏
 念某偶從御李深荷采葑一厘幸託于趨風萬厦永
 依乎覆露忽聞榮命尤切飯誠少將燕賀之儀竊效
 蛩鳴之響尚願收外治于內治化贊垂裳進介卿而
 豕卿班聯曳履

與代王

南星呈瑞式符玉派之昌期北嶽降神永衍天潢之
 命脈世躋壽域化洽春臺恭遇 殿下千秋華誕萬

福宏開青鸞紫氣當筵擬莊叟靈椿八百文曲長庚
並躍收曼倩桃實三千某荒塞遠羈媿乏瓊瑤之獻
蕪詞竊比聊陳山阜之章伏願令名地久天長遐算
日升川至琪園瑞靄年年披雲錦而獻長春寶殿香
浮歲歲捧霞觴而介上壽

答戶部杜友白

才裕邊儲偉略獨雄于塞北情殷年譜豐儀先逮于
雲中仰仞謙光俯履震揚恭惟臺下清時砥柱名世
寶臣先熊軾而馳聲竹林濟美趨鯉庭而承學版部
流芳希司上谷之儲特被中朝之簡貌師萬旅曾無
朽腹之虞虎甲下屯其載投醪之惠邊庾永賴紳弁
追思不佞某幸通世籍弟兄竊附于同門更藉天緣
公祖實憐于大厦觀風承乏愧揚激之未能計歲閱
勞擬揄揚而莫罄忽承珍貺遠辱溫詞實快踵以懷
慚敢藉手而圖報有同登受仰冀番原臨楮可勝瞻
遊

與通政曲帶河

口代天言作帝王之喉身依斗極敷臣妾之腎腸
至徹銀臺名高玉陛恭惟台臺執心夷粹秉德溫恭
補禁闈之闕遺直節久稱鳴鳳作江淮之保障芳猷

夙著行勳京兆寧數趙張閎闕無論王謝晉司理匪
渙奉明綸命汝納言謀猷入告于后導人使諫膏澤
必下于民在一時爲千載之逢豈九關有萬里之隔
不佞叨役出巡時勤入奏企龍光之在望將燕賀以
攄忱敢藉納交祗修故事伏惟涵納不任瞻馳

與真定撫院王柱石

辟車峻秩風推文武之兼材車庸雄班式荷保釐之
重寄瞻以股肱之首地宜求心膂之世臣竊錫巖廊
懽騰瀛海恭惟台臺昭代正人明時碩望當當特
操持素秉乎剛方濟濟同升簡拔盡由于清秘

南國繡裳之借過膺北畿節鉞之尊允協與情
宸眷寧詎聯垣篋以合奏且將躋鼎鉉以咸登何
熙朝覩茲盛事不佞某才同樗櫟德佩梓桑遙瞻栢
府以景行密邇榆關之丰采敬裁不斐肅致未將聊
申賀厦之忱竊附受塵之誼俯慚輶賚仰冀淵涵臨
楮不勝馳遡

與總督年節

堯年起丙九邊傳鳳曆之書夏正建寅三鎮頌麟圖
之烈福應帝祉喜徧人寰恭惟台臺宵盛章乎才侷
日奠辰逢太簇春布三十六宮符應上台恩覃七十

二侯威行秉鉞寧直宣畫雞之猷恩洽升車不啻普
放鳩之澤洪業久聞於帝座崇階特進於台衡勛猷
勒景襄之鍾姓字著凌燠之閣某役及瓜期芘更奠
朔謹率三朝之典敬獻五辛之盤伏望台慈特加鑒
納

與撫院年節

青陽獻歲千門瑞啓於椒盤紫極回春四始和凝於
栢府欣逢元節宜叩履端恭惟台臺秀毓三光精合
二氣風清紫塞潛消朔漠之寒陰日麗轅門頌起邊
圉之春色四時合德誰云北斗無心萬物生輝信道
東王有脚駿烈同歲功並茂鴻禧與春令俱新不佞
某遙挹陽春敢忘賀厦薄將芹藻效頌椒花伏冀台
慈俯垂鑒納

與戶部曹還素

歲統開端授四時而資始王正啟序布百度以維新
適際亨嘉茂膺多福恭惟老年文望隆山斗德粹中
和勲業匡時信是鹽梅霖雨文章經世共傳白雪陽
春維茲三陽開泰之期正值萬祉其凝之會九天春
色隨麗日以頒來五夜陰氛逐條風而盡歛暖鶯鶯
于喬木婉若揚麻輕燕燕于彫梁依然効順某叨共

事瞻北斗其非遙仰荷深仁與東皇而靡極敢擬陳
筐之禮特效薦辛之遺仰冀涵茹不任瞻企

與總督馬鳳麓生日

弧懸卿月喬雲絢彩於穹霄算益台星福騰輝於制
府紳弁共祈純嘏耄倪胥慶繁禧恭惟台臺振寓人
龍鳴陽土鳳眉山鍾淑氣誕申卓爾多奇錦水孕殊
英生甫居然特異當九重之特注共瞻鎖鑰壯猷作
萬里之長城允愜桑蓬夙志月臨虎建瑞啓麟符太
簇芳辰應桂魄初圓于十五長庚令旦兆椿於允介
乎八千瑞鶴獻靈芝喜伴瑤琴承繾綣祥烏棲古栢

榮開玳宴對綢繆匪直常紀日月之升恒且將永
乾坤于悠久某叨聯籍講快覩等添敬祝華封壽域
芹獻伏願鼎鼐調元鞏固金甌於萬世崆峒問道摩
娑銅狄于億年

賀撫院薛青雷入境

桃山春曉麟符分卿月之輝榆嶺雲開虎節占使星
之動先聲所至諸路騰懽恭惟台臺祥發丹巖靈鍾
赤厓久繫蒼生之望特膺紫綬之徵命下九重共慶
祥麟瑞鳳威行萬里爭看韜虎鈴龍聲動前茅光生
細柳不佞某濫竽執簡祗役及瓜惟願一望下風庶

山園集 卷二十一
幾不負平日盼龍文之紫氣有懷擁篲之私抒燕賀
之丹忱莫勝彈冠之喜敬希下吏恭迓前旌附獻一
芹聊當三接臨風爲溯計日以湏臨楮可勝延佇

賀撫院薛青雷

上任

憲府崇嚴獨坐列星辰之席戎軒赫濯前茅揭日月
之旂道遠曷云能來心夷亦旣覲止欣然倒屣率爾
披函恭惟台臺一腔正氣八面雄才韜鈴兼文武之
資鎖鑰重安攘之託藉旌麾千節鎮總綱紀于蘭臺
輿望咸歸帝心特簡九重延佇可勝計日以湏十乘
放行恍若從天而下軍民惟慶忽聞時雨之來蘇草

木光華頃覺春風之倍煦不佞某幸隨李御
瞻謹消吉以戒賓筵祇齋心而迎法駕席前借箸精
神折尊俎之衝柱下彈冠談笑仰步趨之矩伏惟俞
允曷任顙祈

答撫院王柱石

建節畿南丕著保釐之偉績投械塞北忽承剪拂之
殊榮拜德懷慚開函動色恭惟老公祖臺下精忠貫
日峻節凌霄當安危注意之秋頌文武兼資之略譽
命特隆于八座威稜遠讐乎三垂簡在宸衷式乎與
望惟是狂瀾旣倒誰司世道之奔流砥柱不搖獨藉

明臺之坐鎮伏念某分甘灰沒情切巖瞻偶緣一介
之上通豈辱十行之俯及拜嘉有愧銘鏤無涯幸矣
及瓜將乞骸以歸于隴畝瞻焉列栢恐終身遂隔于
門墻遙仰汪慈祗陳淵悃伏願縉裳倏召總持正綱
紀之衡赤鳥同升並奏吹埴麓之樂

答馬鳳麓賀命公第

朝廷設科目用取璋材闕閱衍箕裘號稱喬木是非
鴻碩易副鷹揚詎意寒門復叨隆選恭惟台臺設空
臺駿誼及屋烏觀人文而必欲假之羽毛愛吾弟不
啻視如手足適館授粲特撫下濟之光按籍同名尚
念同升之雅狂簡無忘于小子遭逢利見乎大人先
甲後庚歷三紀而恰當四戌同寅協丙闈八荒而請
若一家凡茲剪拂之前途靡匪栽培之洪造駒血久
淹轅下壯志堪憐鳳毛載起池邊德輝斯覽若爲兄
若爲弟幸竊過庭之餘至于再至于三益凜循齒之
懼溫詞見藉鼎祝寵頒誦以迴環拜而驚悚居然沾
異渥竟莫報乎瓊瑤何以指迷津幸無遺于金玉肅
伸謝悃不盡馳神

謝馬鳳麓

榆塞觀民深負簡書之重棘闈薦士聿聞奏牘之新

百朋忽枉乎華箋兩鎮遂傳爲盛事恭惟台臺昭代
名臣清門世胄秉笏紹祖孫于三世運籌安社稷于
萬年教本文翁道學已孚巴蜀材同蘇子聲名不減
眉山豈辱獎題幸通講籍鯤之大幾千里而化爲鵬
公其選也鳥之繫累百數而不如鴉僕之謂歎昨者
諸昆羣然偕計夙無操挾庶幾解額之寬積有僥逾
聊奉慈顏之喜乃暗中之摸索忝進士于南宮以直
上而吹噓藉主人于北道特勤鼎使過錫豐儀委白
選以流輝映青箱而動色情敦介弟雁行若切于孔
子之老成爲真願同于出處仁人欲立欲達行所
必至君子善頌善禱何以報之感惟在心謝寧肯口
濡毫草草愧四六之未工東帛表表知萬一之難稱
統祈崇炤俯賜淵涵

與順天樞院劉從善賀子登第

北門鎖鑰方隆制閭之權南斗文章忽動禮闈之色
聿求家學蔚起國禎喜溢簪紳懽騰朝野恭惟老年
伯臺下世業喬木名家龍圖宣黼黻之猷
紹縹緲之緒庚牌布令甲第流芳赫赫上卿勲業與
河山並永振振公子聲華偕日月重新鄉之元會之
魁兩榜冠羣英唾手功名真如拾芥周公前魯公後

三台贊八極盈朶袍笏豈羨分茅君臣五百載奇逢
增輝赤舄父子四十年聯續復點朱衣架上詩書已
作傳家琬琰邊頭節鉞遂成奕世弓裘惟至平通格
于天故盛德克昌厥後伏念某幸徼倚玉快聽泥金
矧魯衛亦忝齊盟將王謝再修世譜其爲懼怵尤倍
恒情敬摠賀履之忱益締通家之誼儀寧及物詞未
宣心伏冀麾函可勝慶仰

與王秉白蕭玄圃主試

玉堂金馬黃扉需鼎鉉之良北斗泰山形管握文章
之命快覩明時之鉅典欣之昭代之鴻儒拜手慶言

傾心後願恭惟台臺文裁帝袞學冠儒縷得全全
萃光嶽未分之氣先覺覺後讀丘索以來之書當弘
文班馬之儔負接武夔龍之望命自天而載錫材與
地以雙清頃闢禮闈丕承宸簡三千禮樂已歸大冶
之鑪錘九萬鵬鵬盡借長風而變化士固伸于知己
忠莫盛于得人豈意寒門亦叨隆選公論咸稱其具
眼五色不迷私衷實倍于銘心百朋莫報久切高山
之景行益懷流水之知音肅勒荒函聊申填奏棟華
韡韡敢云難弟難兄棫樸芄芄勉爾爲綱爲紀庶不
辜春草生花之夢或可酬泰茅連茹之恩意傾嚮而

此國集 卷三十三 三四
彌勤詞鄙訥而難盡敢辭唐突幸賜淵涵

答劉健菴

朝廷設科目用取瑋材闕闕衍箕裘號稱喬木白非
名碩曷副願揚詎意寒宗叨從華選恭惟老年伯臺
下昭代名臣清門世胄文武爲萬邦之憲安攘貽億
載之休令嗣世兄黼藻雄文珪璋粹質省會擅無雙
之譽京闈標第五之名闢天府而開科共稱得雋敞
霜臺而報捷僉曰象賢榜朝出而姓氏夕播于四方
錄一傳而紙價頓增于百倍誠是父而是子希爾公
而爾戾何幸介弟之有緣獲附魁儒而並薦烏之榮
累百數而不如甥尚愧卑棲鯁之大幾千里而化爲
鵬仲看遠徙偶將燕賀轉辱鴻施誦以迴環拜而驚
棟層然沾異渥投桃莫稱夫瓊瑤何以指迷津削積
霜希乎金玉肅伸謝悃不任馳神

答劉遼總督王霽宇

雲邊接戍仰微露庇于周星風憲瓜期忽荷天恩于
曠日漸睽斗望節貢台箋恭惟老年伯臺下堪輿間
氣社稷世臣運貌虎于胸中布龍蛇于掌上白東白
西自南自北安攘夙著于三階議撫議勦議貢議封
孫縱悉裁于獨斷

上國集 卷三十三 三四 三六

朝更美難兄難弟尤昭國憲益茂家猷伏念某稟性
迂疎賦材綿薄濬濟寡效毫無補于官方狂慙多尤
終有慚于言路茲幸得馳重負庶幾獲遂初衣馳御
代更已作歸去來今之賦能光遠隔徒懷矣誰在矣
之章何意卑遐復履高厚損駢蕃之異渥敢不登嘉
拊依估之微悚可勝悵惘肅緘書而申謝惟憑楮以
馳神統冀台慈俯垂崇紹

又

樞極崇懸憲府列星辰之席寵靈遠被通家冰雨霽
之施方切依飯矧厯挹注恭惟老年伯臺下元亦偉
望經世殊勲鎖鑰關門頽息烽烟之警網繆勝戶豫
周陰雨之防名震華戎功高屏翰蓋四夷種落疊稅
素號天驕而九塞錯綜馮翊尤憑地險某以省方之
役實蒙保障之休幸及瓜期敢忘河潤更斲草野終
荷海涵指駒谷以言旋宜安薄劣望龍門而陟絕徒
仰高深何知還闕之期猶切當關之慮先聲破敵足
占元老之壯猷上兵伐謀常操中國之勝筭惟翹首
以需鼎鉉將拭目以觀泰平竊以處堂莛于宸宇謹
端下走肅介微忱詞不盡于對揚心永期于裁佩率
焉手勒悵矣神馳

與總督馬鳳麓

策府書庸炳旂常之日月楓宸注寵煥綺綵于雲霄
燕喜非常龍光有赫恭惟台臺中朝冠履振古人豪
文經武緯之才嶽峙淵渟之度成靈濯濯名王益輯
于羈縻猷績烺烺信史不磨其紀述予曰有禦侮可
戰而亦可和帝謂教公功懋官而因懋賞恩沾四代
徵善慶之豐培命錫九重靈應華之遐邇不佞某欣
逢盛事喜倍恒情不勝區承意式均于雀賀有嚴瓜
代力莫遂于鳧越伏冀塵存有如懽覲

答馬鳳麓

勳紀太常三錫渙絲綸之寵詎叨世講一械將何
之忱豈荷報瓊益慚引玉恭惟台臺奕邦鉅政經世
鴻猷兼文武以摠謀酌寬嚴而布令日成月要歲會
功名備載于春秋王功國勳民庸績叙允禪于社稷
卽勤勞之懋著宜恩數之隆頒台階光麗乎四星崇
秩存登乎八座萃夷忻爨鼎野聳聞不佞某感深慶
靈時愧觀風當茲大慶之辰與有同休之誼偶裁短
楮用布鄙私方慚輶褻之如毛乃辱報將之若響敬
三薰而拜使實百倍其主臣不盡縷衷統惟淵炤

與監院張覺菴

璇霄明法象光膺玉綽以觀風纒斧肅清霜瑞擁花
騶而按部權騰吳越慶溢商民恭惟老公祖正氣峻
嶒貞心粹白讜論力扶國是弘摹丕振臺綱惟九重
獨注于鹽齏乃屢請專承乎簡命權隆司筴澄清滄
海之餘波用作和梅調燮鼎彝彝之正味寧詎福詒兆
姓抑將利賴九邊樹物表之型模動區中之踴躍不
佞某蚊負微材鵷班弱羽幸隨臺案今屬屢歲乃崇
命之初聞實皈誠之尤快肅修短幅薄侑菲菲而申
燕賀之忱仰竇龍光之重伏祈俯鑒曷任

答馬總督

以下歸田

雲文盛德永光幽人增竇恭惟台
名豪道德冠乎人倫事功本之學術聲威赫澤名
益戢于羈縻績績炳煥信史不勝其紀述伏念某
清寡效蕙立多尤偶厠顏行荷推心誼其人非玉指
駒谷以言
士一貴一
忘明德蓋
術之地耿
之悃統祈
崇焘可任
下誠

答霍撫臺

恭惟台臺文武兼資材誠兩合三雲重鎮特隆旄鉞
之司五部名王盡仰冠裳之化虛舟涵茹容千萬斛
而有餘利刃解批更十九年而不折貳而執服而舍
榆塞威行居則愛去則思棠陰惠濟豈意百叅無益
一范不留若非帷幄之籌詎落壇表之膽某倖叨共
事竊附同心恨無策以攀援徒撫懷而激烈道思孔
迫指駒谷以言旋離悰莫伸望燕山而凝佇忽承况
及尤切魂搖况錫類而及祝三沐三薰敢忘明德真
謙而下士一貴一賤乃見交情未知報塞之時惟
是結銜之感耿焉佩戴迷矣瞻馳附將尺立之
整視縷之惘統祈崇昭幸甚

答鹽院張覺菴

馳馬翱翔于曉旬風采傍傳皂鵬奮振于秋空霜威
正布坐見塵氛之滌濯寧惟山岳之動搖四境肅然
萬民祗若恭惟老公祖鼎衡夙望黼藻宏猷一角神
羊抗丰稜于柱下九苞彩鳳振韶律于臺端貞憲度
以無前仰大觀之在上星軺初指磬磬絕鴻雁之聲
風裁自持凜凜奪豺狼之氣國計與軍儲並裕民艱
及商困交紆誠于載之一時實九重之獨簡某浹沾

山園集 卷之三十一 二十九
越渥倍切惟係弟爾不肖之身恐玷維新之治阻脩
竿牘正切逶迤通屏併懷怨未翰脫寵達其質庸知
負譴之深情溢乎詞良荷珍重之厚酬知無地報德
何年不盡贈唯惟有銜結

答趙儕鶴

恭惟台臺兩間瀨氣一代偉人辨官論材惟一毫之
莫爽嫉邪秉正雖百折而不回當已年弊吏之時道
壬人柄政之日憑天威以震撼身退而名益尊仰以
節之峻嶒年久而論愈定掛冠已幾二十載推轂何
啻千百人壘夷咸識其朝野共占其出處不

某材慚樸較性類桂薑矢補牘以昌言願執鞭所
慕益薦賢爲國之誼希效涓埃若痛親知己之懷
勒泉壤而已昨者家兄待罪下邑望鄰燭之借光台
臺推念通家俾堂琴之增響况家齒及尤切心銘幸
削牘之有郵恨識荆之無地敢嫌僭越聊布瞻依伏
冀台台 宗焘

皇蓋朱旛剖竹新乘五馬華兩亦牘折梅遠錫雙魚
深軫陳人曲敦雅好恭惟門下天中峻望日下鴻名
粉署含香播風猷于南國雄圖在望水樂于西湖

慈渥倍切惟懷弟庸不肖之身恐玷維新之治阻脩
竿牘正切逡巡通辱併懷怨未敢脫寵違其質庸知
負譴之深情溢乎詞良荷軫恤之恩酬知無地報德
何年不盡瞻維惟有銜結

答趙儕鶴

恭惟台臺兩間瀕氣一代偉人辨官論材惟一毫之
莫爽嫉邪秉正雖百折而不回當已年弊吏之時道
壬人柄政之日憑天威以震撼身退而名益尊仰以
節之峻嶒年久而論愈定掛冠已幾二十載推設何
害千百人羣夷咸識其姓名朝野共占其出處不

某材慚樸較性類桂薑矢補牘以昌言願執鞭所
慕蓋薦賢為國之誼希效涓埃若痛親知己之懷
勒泉壤而已昨者家兄待罪下邑望鄰燭之借光台
臺推念通家俾堂琴之增響况家齒及尤切心銘幸
削牘之有部恨識荆之無地敢嫌僭越聊布瞻依伏

奠台

皇蓋朱旛剖竹新乘五馬華函亦廣折梅遠錫雙魚
深軫陳人曲敦雅好恭惟門下天中峻望日下鴻名
粉署含香播風猷于南國雄

昌時羨鳳翼之高
譽重地信平力以
小試帝心特簡
皇鑒揆留方欣竊
夫未光乃德之
餘潤溫詞下逮
賢十部之見臨
腆貺逢頒荷五
葉之先饋但慚
衰朽過辱注存
百結深藏一絲
附報實身騰通
曷罄敷宣

與姜養冲

子登科

恭惟令郎老親文簪纓華胄忠孝名家魏科接三世
之傳大業增八座之色瓊枝挺藻久誇譽重南金芝
碗騰輝更羨名依北斗蓋天意未喪斯文之脈豈人
情能及吾道之行若孫繼祖子繼父不過士人常道
之常而巨報君子報親實乃家國稱塞之路諒不望
平生之溫飽猶足寒未死之姦諛不肖猥辱未知喜
聞榮捷相期非淺胥慶何深敢肅致乎菲儀亦少伸
夫芹悃伏祈俯納曷任仰瞻

疏

齋僧募緣疏

蓋聞孔過陳蔡尚爾絕糧佛在王城居然乞食仰稽
菩薩俯應閻浮證常住者爰訖孔糜補尊位者猶假
香節就齋龍海皆種仙禾卽憇珠庭並資靈粟况髡
顯行脚業已輕棄其鄉然離裏屬毛誰非弱喪之子
日之夕矣空憐革履雙携夜如何其未許桑門三宿

祁寒暑雨四時天氣總愁人南北東西萬里關山誰
是主關焉接待念此化離於是有僧某者願以智慧
火燒煩惱薪乞焦穀芽作伊蒲供搯食而日需五斗
米聊復繩繩而繼三百六旬之中合糲而歲得三十
人便可源源而來一萬八千之衆凡施者凡半施者
總是因緣或募者或代募者孰非攀越香厨濟濟何
如劫火蒸沙高廩我我寧俟迦留乞麩行見水乘杯
陸飛錫成赴慈雲佇看鳥投果鹿銜花同餐甘露闍
黎卽次齊鳴鷲嶺之鍾賜燧初升競洗龍池之鉢嘆
大衆如京如坻而如泡如影須知易盡百年不耕不
織而不饑不寒當念難消一粒乞資朱屋徧諭素心
財法雙施人天獲福

攀鼎良因疏

天寧爲祝聖道場楞嚴乃證佛密義寺僧宗遠延請
佛若長老宣揚祝讚功行精虔洵一勝事且以蒼旻
降沴 二聖賓天青海生波萬靈塗地仰燕山而
滄隕望遼水而鳧飛雖草莽臣咸有攀鼎之痛卽
蓋士寧無伏劍之悲特叩大檀齊修小果藉一部如
來之妙諦消衆生已往之叢誓斯亦無漏因緣不可
思議之功德也仗茲諸賢信同發菩提心誰爲善

圓成吉祥願

止園集卷二十三

書

延陵吳亮采于甫著

與晏中尊書

壬寅

不佞其竊聞之父母愛子教之以義方君子之愛人以德夫台臺固豈弟君子民之父母也而于寒家尤加恩顧倍蒙煦育其家則家視之其子弟則子弟畜之二天之庇豈百世之銜結所能報萬一哉然而有不盡然者新進少年血氣未定或大體未能諳練小事不能含忍興詞瀆聽往往有之而台臺又浚維砥

犢之愛曲推及烏之私謂過而拒之毋寧過而聽之此甚盛念也然台臺立心至仁用情極厚得無有以恩掩義而稍稍爲姑息者乎此不佞之所大懼也夫一家之中不佞當通之以情一國之中台臺當裁之以法夫使不佞溺于情而使台臺窮于法使不佞恡于情而又使台臺曲于法則間左細民含冤受痛者不可勝計而其間或有奸人悍僕借之以行其私鴟張狼噬不可窮詰使人敢怒而不敢言不佞亦且得聞而不得禁無論累台臺平明之理傷先君清白之名而得罪里閭造孽子孫釀寒家無窮之禍此又不

佞之所大懼也如某事某事台臺安得不一問也不佞自台臺下車以來幾及六載曾敢以片紙隻字一詞告一人以煩清聽乎未也此台臺之所稔知也橫逆之來背逆而去者亦時時有之而卒隱忍不欲爲台臺言者以爲生事事生省事省卽幸而快心于一擊人將謂我怙台臺之恩以自逞其臆故忍而至此此又不佞兢兢奉法仰承台臺之苦心也今請與台臺約凡寒家事有必不能甘萬不容已者愚兄弟連名進謁合詞具呈聞之台臺然後察之如果不謬然後准而行之卽不然而以單詞庭見情不忍拒

法無所害者亦乞少提罪犯以免牽累多人速賜問
結以免拖累多日或量爲調解以厭其意或薄示懲
戒以全其體此又不佞委曲于情與法之中而亦台
臺恩威兼濟仁義並行之術也夫台臺方以父母之
心恩斯勤斯而不佞輒敢進迂濶無當之論又若矯
激不情之語豈非所謂仰天忘跼背人不祥然而寒
家偶徵天幸濫叨人爵涯分已踰若不痛自貶損而
尚思藉台臺之寵靈以明得意卽台臺必憐而宥之
而盈滿之忌高明之瞰在所不免此又不佞之所大
懼也瀝血剖心不識忌諱惟台臺深念詳察直爲不
佞子弟訓之以義愛之以德共懷子孫長久之計俾
世世受台臺之庇積慶造福傳之無窮則先君死且
不朽不佞某亦死且不朽家門幸甚地方幸甚

與都察院左堂詹

以下按部

職蒙台臺拔擢奉命巡方入境三月例有舉劾職以
地方所轄不遠司府所報多賢不敢苛求致有濫及
昨據兩道申詳二弁一奉明旨一關人命且云兩鎮
耳目難掩二弁財勢甚廣倘有解縱不無嫌疑遂于
本月二日具疏叅劾初不知爲門下之士遂不及全
屋上之烏忽接憲札曷勝惶悚但職止舉司道招詳

原無偏倚且以君命民命爲重遂忘忌諱職之罪職
自知之况台臺乎謹此據實申稟伏惟原而宥之至
于部覆之重輕行勘之虛實職必不敢執成心以負
台命也

與山西布政司

大同府屬向以才望人晉闡者歷歷可指而近數科
遂寥寥矣卽執事簾外者亦鮮矣丙午解額大同無
一人焉諸生不自咎業之不精歸咎于有司之不公
此不足信然而掄材大典卽它省且不吝徵辟豈其
以本省而獨遺之又豈其以有分隸而遂秦越之非
所以昭大公也該府已經申呈按院准行貴司諒必
有復舊制而新耳目者不佞叨攝學政輒復覩縷及
之惟門下裁察幸勿謂雲中無人也

與督撫

不佞戇愚原非逢世之具而加意節省似亦秉憲之
常乃安令不勝悻悻遽欲拂衣是但知鼠之有皮而
不知鼎鑊亦有耳也望輕召侮夫復何恨第不能不
爲憲紀惜耳具疏自劾并直陳始末以俟 聖裁非
敢求多于賢令也事迫不及奉聞率爾之罪又安可
逭惟台臺俯賜原宥不佞卽跼伏田里仰賀曲全之

德無涯矣謹專役齋揭負荆以請

與通叅趙觀一

不佞賦性慙愚不諧世俗稟質柔脆不慣邊方觸事感懷思親成疾昨者具疏乞歸蓋非得已不意彭丈見阻且傳示台諭謂此舉太急不佞夙受國恩素蒙台鑒何忍一旦自廢但世途險側機穽刻深何苦戀此雞肋委之虎吻此又不佞早自引決速求退休之微意也既承台諭當暫隱忍以俟更望翁臺秉持公道以安善類則不佞雖去之日猶榮于三遷矣伏頌瀝衷不勝瞻注

答馬制臺鳳麓

昨駐雲中見中丞總戎津津道封事日暮可就忽有明暗台吉之爭事復中變總之素囊爲之崇耳夫姤不成印必不出王必不封卽勉強遷就爲分析市賞請印襲封之說而空王無益仇殺相尋恐亦非中國之利也說者謂欵貢之約久藉老婦方爲不必然之慮而今襲封之議僅仗病酋又爲未必成之謀當事者安得不爲之蒿目乎操縱予奪台臺必有妙用而且故緩之以示中國無藉于彼之封或別要之以令彼不得不就吾之封則庶乎體常尊而患可弭耳不

識台臺以爲然否茲抵雲朔漸遠台光面吐靡由手
書難罄惟有耿耿而已

答馬鳳麓

從來疆場之事審機宜者少持文墨論議者多所以
邊臣每每掣肘台臺操縱妙用調停苦心真有未可
以語人者所謂難與慮始可與樂成總之封事有定
論而人情自帖服矣兩道被論四印將安所歸地方
之可慮更有甚于荒旱者昨託中丞公請教暫留茲
復僭擬一疏具揭呈覽伏祈裁示

又

伏承台諭原任總兵麻承恩部咨調取聽用查得本
官原係科臣叅劾奉有欽依勘問人犯延捱數年未
結正在催提恐非題請 明旨擅難輕調至于徼丁
寄營業已籍名閱冊無事則張口以糜本鎮之糧有
事則掉臂以赴它鎮之用萬無此理况虜封未定邊
事可虞豈能舍已田而耘人之田乎隨奉台諭行牌
坐營申飭而事係邊務或台臺亦宜一主持之耳兩
道四印委無所着卽去志甚決而該府亦難以一人
兼攝四道也適已具揭請教并此布復

與徐職方躍玉

伏承台札下詢雲中封事仰似冲懷乃小疏之意似未蒙詳察者夫宜大自欵貢四十年來邊陲救寧民物康阜詎曰非欵之利說者必以欵爲和良過小疏但云白言之賞宜革順義之賞宜停革之一字尚不欲加于順義而况曰絕之貢速之携乎雖然釁不可啓而體制必不可不惜名義必不可不正伉儷未就雖曰素囊輩爲梗而縱素囊者誰乎依阿素囊者誰乎夫素囊之爲梗非欲自立爲王也不過欲攘順義之賞耳遲封一年則多攘一年中國雖無藉于虜封而不封終不結局王不封賞不停彼亦何所不利而必擁戴卜曾爲王乎欵貢市冊各有條目不佞之意謂忠順來則賞忠順素囊來則賞素囊若順義無王而復賞之則受賞者何人賞之者何故非所以爲名也若白頭表文可以屢上則欵賜王印當委之于草莽非所以爲體也若夷婦恭順主張欵貢宜領全賞則當時但封一忠順夫人足矣何以王爲非所以爲制也若謂照常開市苟完年例則例復爲例年復一年何時結局非所以爲計也夫封事成他人之功不成他人之罪不佞及瓜而代何與吾事但身在地方稍得情形不敢不一陳其梗概昨曾移書制臺云小

疏所云停賞非謂必宜停也非謂槩宜停也吾且倡此議以聳動之彼且貪吾餌而就吾約但使威出于朝廷而恩加于督撫使不佞任怨而督撫任德操之縱之未必非激發之一機耳制臺卽以此意面諭各夷無不惘然失色若咎素囊之爲梗者語薄喉而不出則其情易知而其欲易參又可必矣若謂上邊要挾恐致人心疑駭則邊臣所以安定人心者惟恃一貢市而已乎非不佞所敢言矣不佞常自笑愚戇多言言未必中而又不肯不言真是一癡然咽中有梗必吐而後快卽使言之不當以此獲罪實所甘心非台臺品鑒在風塵之外推心在肝膈之間必不敢以此言進惟台臺其財擇之

又

原任總兵麻承恩向以行賄爲錦衣所許孫掌科所叅奉有欽依勘問延捱數年未結正在催提問忽接制臺書謂貴部移咨調取薊鎮聽用詳玩來咨亦謂聽勘未結難于破例第以薊門多事不得已而應之耳夫旣奉有明旨會勘或須請有明旨免勘而後可調取乎奸弁玩法抗旨何所不至所幸今日內外鉅公皆抱元老之壯猷軫安危之深慮借才破格絕無

山園集 卷二十三
嫌疑恐爲異日開此一竇而不佞不能爲朝廷守此三尺則所爲惴惴不自寧者耳伏祈臺下再爲斟酌明示以便遵行至于原養家丁寄食各營已籍名大口待哺以糜本鎮之糧有事則掉臂雄行以應他鎮之用有是理乎况雲中夷釁漸生虜封不定備禦尤急調發非宜此則必不能曲徇者也臺下居中籌畫東西肘腋皆屬一體諒溥同仁而不佞爲法紀爲地方輒復芟芟統祈崇炤

答馬鳳麓

前者小疏停賞之說見雖迂繆心實無他荷蒙台臺垂諒可幸無罪而省中謂其輕言挑釁機關頗惡昨回鎮城崑爲束裝席藁之計卽擬乞罷又恐留中不報將爲兩道之續欲懇台臺及中丞公以病亟代題而中丞公尚未見允不敢遽聞不意台臺復加之貶也感悚且滋甚矣不佞原係書生何知邊事強欲哆口以佐未議徒取悔尤故有寧負台臺下問之虛懷而不復敢輕言者酋長謀動干戈得無挑釁之左驗乎而台臺且以夷狄相攻爲中國之利夫台臺果以爲利職方必不以爲憂長城倚賴實在台臺倘封事

一脅而成不佞卽九死有餘榮矣直吐愚誠仰祈矧宥

與馬鳳麓

目今二運愆期三軍缺餉旣不能神輸于上又未免耗蠹于下實爲大患前守口張憲使來別曾傳示台臺之意謂廢閒將領虛冒糧餉法應釐革事在直指不佞一聞台諭急于奉行不暇問事之宜行與否可行與否其果出于台臺之意與否遂檄各道查行迄今數月不報始疑其事之未必宜行未必可行未必出于台臺之意則不佞孟浪甚也且此事係舊制臺所爲貴衙門必有成案可否虛實自是瞭然乃不請之于台臺而反求之于各道倒持太阿而授之柄誤矣茲特端官請命倘以爲果宜行果可行果出于台臺之意乞明示之不然不佞亦姑置之不敢多事以招尤也謹布腹心惟台臺指教

又

麻承恩事原係撫按會勘昨請之連中丞中丞云聽勘官勘問未結難以起用此定例也昨復移書職方求其明示倘可中寢更省一番議論不然亦須請旨註銷前件而後不佞與連中丞可無辭矣台臺或

暫停起送以俟論定數日猶可待也或傳諭承恩速出完勘以便起用半月便可結也不佞非求多于承恩不過欲早結公案以免考成之罰而已伏祈垂矧幸甚

答蘄遠王制臺霽宇

遠左危急上貽君父之憂凡爲臣子者恨不奮身行間滅此而後朝食有如東西易向彼此分歧是不忠之大者不肖某亦且有血氣義所不敢出也台臺爲國用人至公至當何嫌何疑但麻弁抗匿已久催提甫下一聞調取自謂莫櫻爲之上者不但有奉旨不

結之懼抑且有執法不行之耻或亦台臺之所同惡也昨者請餉疏未微言及之聊以折其汰驕豈能沮其嚮用乎台臺不知其未結偶爾移調不肖又何敢言若謂征倭征倭征播拔之戍錮出之囹圄事誠有之恐亦須一請明旨耳况台臺忠能格主力可回天請餉請兵請甲請馬無求不得何難釋一罪弁倘藉寵靈轉達樞曹題覆旦夕得旨免其勘問特爲起用則東虜可靖前案可結不肖且釋重負遣于考成之罰而又可少效被髮櫻冠之誼實至幸也伏讀大疏尚多寬假更蒙台翰鄭重遠及不肖惟有汗顏屏息

泥首席樂以謝警戾而已

與徐職方躍玉

向者咨調麻承恩事已承臺下開諭備悉始末可以無言昨因清查邊餉此弁占役獨多而屢次提勘抗匿如故遂憤其良法一併及之非敢有他疑也王霽老書來謂不知其未結偶爾移調此老成真實之論若謂征倭征畔征播拔之戍錮出之囹圄此卽臺下咨調廢將不可僂數之說不佞亦聞之熟矣但不知彼時咨調亦曾一請明旨否不佞于麻弁何嫌何怨妄謂朝廷之法宜如是耳倘貴部題覆乘此機會請旨免其勘問卽爲起用則遠左既有得人之慶不佞可無失職之辜邊事國法兩無所害亦便計也諒臺下必有定畫而不佞僭陳鄙見剖白初心如此惟臺下原啓

答霍撫臺南溟

不佞沕闇疎鹵無當于廉察而大計重典何敢自用且以台臺衡鑒在上師保在前而不求就正折衷是又自外于教誨也伏承台札評品精嚴不佞當奉之爲司南矣日以計閔在邇無知武弁營案竿牘無日無之不佞痛憤陋習凡有囑託者俱刻置而不意

吾輩中亦有自揣瑕疵通行請謁者謂可以取縛不
俟之手足而不知其不盡然也自前朝後事即件貴人
之意弗遑恤矣不識台臺以爲何如

與陸道長瑞庭

向承台諭沈青霞公祠宇已行佑葺且爲之清占地
追風逋矣昨校諸童得一佳士析卷填名爲沈存胤
卽青霞公之孫復許之幫廩應試在弟原非有私然
亦可占忠義之餘慶且可副臺下惓惓衆梓之厚念
也因便附聞

答大同府高

鄉賢大典最宜慎重况由邑而進之于郡乎貴府品
騰極當但查前代諸賢有僅以保障稱者宜列之于
武功僅以治行著者當祀之于他邑與鄉賢稍不涉
而懷仁兩公錄錄未有表見或以邑無祠而姑收之
乎鄂國忠于世民亦所謂周之義士也幸再酌之以
俟商確舉行何如

與南科黃雨石

起廢之舉疏幾克棟而穎且髡矣竟不能一回天聽
殄瘁謂何然而求志達道在春秋時已難其人矧涉
叔季之末流乎年丈欲于訪冊之外搜羅遺逸誠敷

求哲人之甚盛心也據弟耳聞臆見如原任巡撫王繼光以忤婁江去原任太僕寺卿王明以忤四明去皆未究其用而原任巡撫許弘綱原任太常寺少卿史孟麟又大節表表者也至于清修恬雅心行粹白如原任按察使梁祖齡原任叅政李汝相原任副使歐陽東鳳原任知府曾阜原任知縣鍾允復皆宜及時起用謹爲年丈誦之以自附于舉爾所知之義惟高明裁之

與霍南溟

廢將冒糧積耗三載人知之而未必肯言不佞言之而未必可行乃法之不行執法者之羞也輒爾總陳一疏以可行與否聽之廟堂蓋不佞之言盡而不佞之事畢矣他非所敢計也謹希官具揭呈覽伏祈睿照并賜裁教幸甚幸甚

答馬鳳麓

不佞第于官評賢否不敢曰知而去任者尤不敢自用但據該道所揭奉而行之或有縱舍恐謂弟有所庇也舊延慶治狀在台臺必有灼見近日相知中亦有爲之地者弟終不敢以私囑廢公揭以臆見棄風聞意相知者必能諒其不得已之情耳若湯質老之

厚與否第不敢知不敢聞昨且有奉質老之手書來者第亦不敢徇意質老以道義相成或能諒第之執法而不見罪也延慶之事惟台臺酌示可否第信該道又不若信台臺之深閱冊雖完疏草通未料理欲俟遠左先報而後從之亦受事之序宜爾不識台臺以爲何如

答霍南溟

不佞淺見闇識原無當于激揚疎節直腸更不善爲藏蓄一念執法秉公之心但可以對天日不敢求人知也此中去輦轂最近竿牘踵來若欲徇人之情必且盡人而舉無一列白簡者而後可台臺以爲可乎不可乎不佞卽執此以定人之品凡恬靜無求者必其守分奉法者也凡夤緣有路者必其積垢叢庇者也近據各道揭報其所稱不肖者大約此輩若徇徇人之情必且盡棄各道之公揭獨行其意而後可台臺以爲可乎不可乎且不佞以此臧否人人卽以此臧否不佞稍有不當溺職何辭昨有相知爲人關說者不佞直對之曰如係他人之升沉無不可委曲或係自己之利害恐亦當體諒相知者無以應茲敢爲台臺誦之

與孔紹虞

按臣持斧一方文武將吏皆得糾劾從未有掣其肘杜其口者有之自今日始夫遠將功罪誠不可知而按臣詳述申文稟揭似亦萬不得已乃復謂其承望纂造迫脅羅織必旁觀者爲審而當局者爲迷必目擊者爲非而耳聞者爲是則凡有大奸大貪據揭論劾者皆得以此抹殺而顛倒之恐將來一事不可行一人不得論目今大計誰復敢形察列誰復敢報賢否是不獨係衙門體面而所關於世道治忽不小也此說若新進者言之似涉黨同在台臺言之實裨國是伏讀台臺近疏屹然砥柱輒敢僭陳狂瞽仰祈垂察

與馬鳳麓

前承台諭舊州之事候命數日未蒙開示豈以不佞第之有成心敢于違台命乎第原無他腸深欲爲曲全之計但因各道揭報相同而府廳中且有以得人爲快者吾輩偶居人上雖操可用可舍之權實立共指共視之地不佞尤畏義畏法不敢不兢兢也如果有挾讐誣害之事第謂宜行該道一究揭之所由來庶可以表循吏發宥謀而吾輩之心事亦磊磊落落

有辭而無可疑但恐該道之體稍不便耳不識台臺以爲何如

答懷兵張翼明

舊延慶有說側聞輿論頗亦相同而制臺終以修邊鹽菜一節疑有讐誣欲再覈訪此亦慎重之意不佞竊謂廟堂不信撫按撫按不信鹽司則彼此耳目無已時也門下何以應之幸速議見報以便會行

與霍南溟

舊巡道之事初有一二未妥蒙台臺開諭業已釋然旋被科彈深爲扼腕說許閱叙中爲之伸雪新巡道見在可問也乃其後最可駭者縱令金瑄脫逃與之並駕而去此該道面對不佞言非風聞也未幾而託敝鄰父母以書一封折儀五兩公然投遞閱其副啓卽該道親筆問其差人卽該道承舍遽欲發覺恐傷雅道姑返其璧而善辭之又未幾而三千里外貴人之書復從該道郵筒中來矣夫不佞所佩服者台臺肝膈之語所期許者新巡道意氣之知固非可以勢劫可以私干者也且不佞有法而使人撓有然諾而使人不信此無他或猜不佞太深視不佞太小而侮不佞亦已甚矣故人知君君不知故人不佞負該道

乎該道負不佞乎不佞慙直招尤無能諧俗不計利害何論恩怨獨以仰負台臺倦倦之意終不自安輒爲詳其顛末如此白臺試以此質之該道恐亦無以自解然則該道負台臺乎不佞負台臺乎想台臺亦必能諒之也

與馬鳳麓

上谷官評仰藉台臺指教且各道濟濟任事可幸無繆雲中乏人遂未免煩咨度矣舊巡冀之去第頗惜之而去後屢^乞人書來若疑第之有他而劫之以不得言者第頗不能甘况其物議固非無因也藏垢納污台臺若命之矣先見不知呂獻可愧哉愧哉

答馬鳳麓

弟庸人也慙人也初聞陽和之書不察其本而疑斥弁之與弟敵輒形之論劾一悞也既見台臺之揭不意其誤而疑陽和之與弟敵又急于自劾再悞也總之涉世未深見事不定弟之宜去自知之審矣雖然大揭之發抄台臺亦謂其中有故適接陽和稟帖且謂部覆有妨于憲體則就中作用業已安排弟之宜去又豈特自知之而已哉若台臺視弟如手足弟亦戴台臺如父兄始終不敢有一毫疑貳此則弟自知

之可與天日共知之者也惟台臺俯察而終教誨之
第雖去可無憾矣承示大疏謹謝教

答陽和道

門下毀出求全孽非自作但聞言引咎亦長者之道
不佞謂宜杜門謝事非謂宜辭印印境也不佞今且
自効猶然未去豈不知明旨之當候耶部覆有妨憲
體門下何以預知之則不佞之當去更宜不俟終日
矣

與馬鳳麓

弟生平慙直不能輕徇人亦不敢輕疑人况台臺粹
行坦衷和風皎日原無纖芥可疑而反使在旁
操縱之說以簧鼓其間弟將負不義之聲于天下故
亟破疑關令彼曹子咋舌愧心耳台臺補天浴日威
望不減張德遠其于彈壓羣夷倚毗社稷固自有聖
明簡注今一出而將士勇氣十倍豈慮虜封之不就
乎吾儕小人何知謀國但求無愧本來青天白日之
肝膽而已台臺稱引古人過爲獎借或亦勉勵之意
非弟所敢當也再辱翰教益仍中懷謹歛衽九頃以

謝

答巡口陳靜臺

寧遠草場失火初議官民分賠雖有舊例細思之終是不妥且守備半賠罰亦太重貧弁可念而窮軍更可知也據鄙見以十分爲率守備其償三典守軍士償其一而其六令堡軍以暇日採青補之或二年或三年如其額而止則軍出力而不用財官徵草而不扣價且補以漸出不急于旦夕或亦公平仁恕之法也至于叅罰姑置槩以天災不虞宥之昨商之中丞公亦同此意惟門下與該而而議之何如

又

承諭採草變價尤見深畫但聞邊地之草每束值銀一分二厘折價給軍每束發銀三分五厘今議變價將照時估折納乎將照庫例折納乎况既責其打草又令其變價彼游惰者且以銀折草掙剋者或因草扣糧弊端又從此滋矣及查寧遠堡東南至靖胡堡二十里支草馬三百十八匹西至滴水崖十五里支草馬一百八十一匹北至長伸堡十里支草馬九十七匹每月應支草五千九百六十束則寧遠六分之餘草僅可當三堡六月之正支或令各軍隨便採入三場或令三堡馬就近支于寧遠但欲其採之有漸不思其積之無用也徵銀終不若採草爲便惟門下

再酌之何如

與署院孫

職本豎儒不諳世務職生南服不慣邊方叨奉簡書
勉竭駑鈍任勞任怨職分所宜多悔多尤職心所諗
茲當差滿理合候題何敢瑣瀆緣職有迫切至情不
得不哀鳴于台臺之前者職母今年七十有一衰老
侵尋念職孤身遠塞日夜憂慮眠食不甘職又連喪
兩妻踵生九子大者未婚小者在抱職奉差離家付
託一二老嫗撫養出塞之後已殤其一伶仃孤苦無
母靡恃職每念及心刺魂飛忍死延捱積月成歲而
今杜門望代度日如年欲具疏乞休則天聽高遠欲
解官自便則憲紀森嚴惟冀台臺俯賜題請苟完代
事職得早離地方早見母子一日雖長伏草野亦無
所恨而台臺老老幼幼之恩且施于不報等于罔極
矣職非不知前差未俞後疏無望迺今日之事正如
密雲不雨大旱屯膏田師必且荷鍤佈穀以徼天澤
于萬一此亦職萬不得之妄想苦心也伏惟台臺矜
憐而省納之無任懇切哀籲之至

又

職不揣卑渺遽以鳥鳥禽犢之私仰于清聽荷蒙台

臺不加督過俯賜矜憐許以單本序題閏月可代不勝感激隨接邸報見皇上有每差一本以便點用之旨深服台臺之高明先得宸衷之淵邃乃山東差本又復留中不勝惶惑或者聖意欲各差另本一時並題以憑隨意點用未可知也職見銓部推陞一正一陪或先或後同請互進俱得俞旨似可做而行之且各處按差如山東湖廣報滿踰年淹留已久如蘇松廣東例轉候代跼踖無聊又如遼東熊御史盡心盡力任怨任勞而虜攻之于外人攻之于內前跋後疐左枝右梧台臺試一體念忍不早令之弛擔乎若職之苦情雖則迫切猶可排遣不足言矣爲此借陳愚慮仰候台裁至于宣大一差置棋不定尤非憲規併祈鈞斷職臨稟無任恐懼悚久之至

又

昨接邸報見十四差一日同題捧誦大疏詞極懇切仰戴台臺垂念羈人俯從末議如此而猶不得俞旨進退死生一聽之于天意矣台臺總憲一秉成規何嘗不定職亦何敢以傳聞之誤輕責崇嚴查得憲規一欵差滿前三日稟堂明白差滿次日具簿送堂定差此舊例也職差滿時因試御史未准實授無人可

註及二月初奉旨實授有人矣遲延一月尚不具簿
送堂職問之經廳聞有互換之說職謂應換與否亦
宜明白稟堂台臺必有裁斷豈持兩可致紊成規則
職所謂不定者自有在也且職差報滿在正月二十
二日經廳吏書徑註二月初二日或係差錯亦未可
知職請經廳查對堂呈方與改正職奉差經年何在
于旬日若論憲規月日難改如此下情豈能一一上
達而况遠在數千里外不及知無由訴者更可念也
職凡事認真矢口招忌大率類此情苦病劇亟思引
退但以王命當終憲規難越苟得代而後長往于心
稍安勉爾濡忍若誤聞輕瀆萬罪何辭卽台臺赦其
妄而職固不得不吐其實也爲此席藁瀝血陳稟職
無任惶悚隕越之至

又

職奉職無狀逢時不辰兩鎮被災萬民銜恤請蠲請
賑籲天而天不聞號食號衣罪歲而歲不應職恨援
手無策若將納于溝中雖幸息肩有期可忍置于膜
外竊思贖緩久貯之府庫原備凶荒今日不用之地
方何取朽蠹亟懇發散少拯顛連若露章以沽名職
所不敢卽矯制而獲罪職所自甘伏乞台臺俯垂憐

山園集 卷三十三
察特准便宜職愚幸甚民生幸甚

答守冀道郭同竹

賑饑煮粥多有不佞不佞亦稔知之故于宣鎮所捐贖緩徑抵灾免屯糧蓋以民而納之官未免加耗以官而散之民未免扣除惟一抵而出入所省軍民陰受其利矣大同之議煮粥因彼中原有此舉不得已而因之其實非不佞之初意也承諭尤見體悉民隱但開報給散之間更須一留心稽覆耳榮任未久慨捐廉俸且能使屬吏慕義承風仁人之利溥哉刻揭四冊奉覽并以示之同好者

答霍南溟

人世浮榮誠如泡影天性至愛乃爲真樂不佞上有老母盼盼倚閭下有八兒熒熒在抱苦莫苦今日隔樂莫樂兮相依候代無期守株何日業已束裝移駐行且冒罪入關矣倘從擯斥實遂歸休而乃以小人之心度君子之腹竊意台臺戲綵弄雛之樂觸藩羸角之苦亦必有下同于不佞者具疏代懇但知爲台臺計而不知爲地方計罪矣罪矣台臺不以爲罪而以爲知己之言所謂他人有心予忖度之者聊小詩二章欲當書之行卷置之笑中久矣茲未敢呈姑

山園集 卷三十三 二
俟異日馬首東去可任馳依

答吳玉田

不佞疎節直腸似謂無當于世而門下真心勁節若有合于臭味之投者相與數月辱道誼之愛不可名言適接上署院孫老先生書尤見曲全至意感刻感刻不佞拮据勞苦一年有餘不意臨行遭此困厄命之窮也夫復何尤前承教先告署院而後可行誠爲周慎復念告則不得行不行則事多掣肘况臺員匱乏見有九差無人可駐豈復有來代者遲與速等去耳與其遲而終無代期孰若速而早離苦海乎至于署院或諒其不得已之情而姑從薄罰惟門下之賜卽不然而降調之擯斥之適遂不佞還山之願亦甘之如飴矣行期已定行意已決未審再得一晤以罄縷縷之衷否

與薛青雷

不佞罪孽積逾進退狼狽欲行則明旨宜候欲止則冊揭已發擅離任固不可久戀任尤不可况直言多忌漏網難容勢不可留義不可辱又不佞所當早引決耳私情未敢據陳正欲開續陳之路若但請旨復命而不請告乞歸人將謂不佞急弛擔負覲入國門

則病疏萬不容已于今早馳奏昨具稟署院蒙許題
疏下另爲酌覆或有放生之機若潘兄之來否可存
而不論矣總之徘徊顧慮只爲一官畏路榮途一了
百了又何三尺之爲拘拘也仰恃台臺骨肉之愛輒
布狂言端使見存勒之五內倘有高明之見幸終惠
教以牖顛愚固所願也

與王衷白

昨者不揣卑渺僭易奏記重辱還答拜而迴環驚喜
過望茲啓不肖叨役已竣逢時不造僣言尤叢集病詬
交侵事勢兩難督撫司道皆知之而衷情萬苦非骨

肉懇視不能悉不敢告也屢陳疏揭已蒙總憲孫老
先生十分體恤然猶未慨然允放第曰姑徐徐云爾
夫不肖今日非敢懷希榮干進之心又非敢辭畔官
溺職之罪但欲求一去而已求一早去而已似亦可
俯從者鬱鬱杜門以日爲歲思親痛子必發狂疾台
臺元化在手大生爲心或有一夫不獲之念輒敢披
瀝乞鼎言于總憲特發慈悲早爲裁奪不肖死且不
朽夫台臺位尊禮絕不肖交淺望深誠不自量然亦
計無復之不得已而哀鳴于仁人之側冀其萬一之
援手也

答薛青雷

以下歸田

不孝其狂戇多尤澄清寡效既揣不諧于流俗輒甘
自擯于長林然亦戀母懷歸棄官扞罔不虞罪孽深
重禍延先葬 又周星倏焉見背君親兩負忠孝全
虧若不孝者豈可復容于覆載之間哉惟有泣血待
盡而已台臺望重三陲名馳四裔旂常鍾鼎之業社
稷是毗且聞虜封有期足慰聖明西顧崇階特眷更
當游膺三錫晉登八座矣而于戎務倥偬中猶然垂
注淪落之畸人孤窮之孽子也吊奠遠及恩哀備隆
真所謂一貴一賤乃見交情者乎三獻三號敢諉明
德第未知銜結之報在何時何地耳

又

憶不孝將入關時荷蒙台臺勤勤勉留若將拯之
穿休戚之誼等于骨肉不孝卽有胸無心敢不悚佩
然使不孝而稍爲濡滯貽老親以倚閭之憂卽竭
歸子舍而不能從容躬湯藥親含歛雖牲鼎在列今
且謂何此不孝所爲三公不易九死靡憾者也不孝
與世多忤罪狀自知立仗之鳴不斥不已然使不孝
而稍有沾戀視一官尚可瓦全真然餘盡又何必飄
然掛冠忻然接浙不俟終日乎此又不孝所爲三黜

自甘一往不返者也君平棄世而後世乃棄之無足
怪矣過辱言存不覺吐露山林狂態惟台臺一笑置之

答葉二菴

不肖迂翹不識忌諱疎庸無所建明惟是知止知足
不諂不驕素奉教于君子矣昨者偶有感觸颺然掛
冠當入關時業已置升沉榮辱是非毀譽于度外彼
鷄肋何足以縻我腐鼠何足以嚇我乎此等見解無
論俗人不識卽素稱有道之士恐未能窺不肖之藩
養冲丈曾述老表伯云云先已付之一笑矣不肖歸
來無日不接客但不接俗客不接貴客耳且遠出乍
歸母子啍啍昏定晨省之外或偕諸昆或携幼子棹
孤舟挈棋枰徜徉笑傲于郊坰林野之外若必欲守
一室候重門效世俗倒屣拂座格套有所不能此則
承顧失迓之罪不得自文者也台教實獲我心敢不
拜賜秋風漸爽容躬叩草堂劇談農圃之事卽寒暄
塵坐之語諒老表伯所洗耳不欲聞也小刻附呈亦
可先當一面并致友人書一章欲令達人知吾心耳

答劉本如

弟慙直迂疎原無逢世之具兼以母老子幼福薄量

上國集 卷二十三 三十八
盈偶有感觸甘心引退其于烏鳥之私鼯鼠之分籌
之審矣乃若少長道鄉稍知嚮往或不貽正人君子
之辱所謂蓬生麻中者乎歸里杜門傾想高誼顧蒙
垂念良用生色惟是始終提誨俾不墮落朝聞夕死
又何憾焉此亦拂衣修初服之微尚也

答薛玄臺

第嚮道之心甚切棄官之意謂何況辱涇翁接引再
三敢不潔已以進奈兒病沉綿無母何恃日理醫藥
旦夕憂惶未能頃刻拋捨且弟林居之日正長請益
之期有待若曰人以藉口依附見諂而姑爲是次且
焉弟之所深耻也馮兄事未知其詳然弟亦不敢與
聞鄉鄰之事久矣并此復

答宋別駕

敝邑縉紳不能治生且不敢玩法故富厚鮮有而花
詭絕無卽有應當差者今年見役恐難紛更來歲改
僉自宜斟酌太尊之意正獲上治民之大道也老公
祖以有事行其無事以新政付之新官或亦人情政
體所宜然要非以難遺後人也辱垂問敬陳鄙見不
識高明以爲何如

與鄒南臯

不肖不能仕又不能學天壤間棄人也顧不見棄于
大君子之門時勤誨諭若越千里而提命之喜可知
也郡志新成殊未愜輿望不得已有人品記之作若
遜世一編用表微尚而已敬因便羽附呈裁正向辱
台翰兼拜大章義莊當藉以不朽謹西嚮九頓以謝
與鄭明初

不肖弟戇直迂疎寡諧于俗惟是二三兄弟氣誼相
收至與令兄尤爲契厚以肺腑相託者也今春令兄
忽有出世之想遂爲駭世之事弟始而羨之旣而疑
之又旣而惜之他有喜談樂道者弟不敢隨聲卽有

忠告善道者弟未敢錯趾蓋謂偶爾眩惑旋當醒悟
至于幃閨啓釁柘捲失恩絕不關聞毫無干涉詎意
疑忿日深禍延不肖雖其說甚怪誕甚鄙俚不足置
之齒頰而以肺腑相託之親猜以骨肉相殘之行其
間構鬪實藏機械又似稍有根因不可測識者不肖
弟不難引決永絕高門消此夙業而尊翁年伯明見
顛末無俟湔雪故隱忍而至于此適辱仁兄手教猶
以一體相關兩情莫逆嗟嗟弟卽有胸無心何敢忘
賢橋梓如天之誼乎哉惟是令兄之疑不釋淫人之
計不寢當更有不可測識者如何如何若仁兄倚關

手足雖抱隱痛身膺民社豈容息肩歸來之說萬萬不可萌此念况覲期在即奉尊慈爲畫錦游且有日乎適晤錢啟老云不惟不可亦不必想尊翁亦必力止仁兄無疑也積有不平之感遂申無諱之衷統恃仁慈特賜鑒在

與劉府公

蔣氏之事弟初謂世禎宜一處者因其亦在倫序之中又當貧病之際而吳婺堅執不從故欲少借威靈易爲調停耳昨承台命與諸親友商議及查律例所載繼子不得于所後之親聽其告官別立又立所親愛不許宗族指以次序告爭則世禎于法不得立而妻父憲副公有親筆遺囑極恨世禎防其構訟則世禎于情又不得立而弟爲世禎之初念于是乎窮矣萬不得已曲處五十金稍贖其乏而世禎偶聞德意遂起貪心弟再三諭之畧不見聽此丘氏之所以復有詞也弟謂承嗣者欲受人之產業必與所後之生者死者有一毫情分而妻父視世禎如盜賊吳婺視世禎如寇讐必欲以田房處之生者豈能甘心死者豈能瞑目弟雖欲強吳婺以曲從而必不忍負妻父于冥冥之中也謹以近日議單并向年遺囑錄呈台

覽老公祖倘不以第言爲謬乞賜採擇仍拘面審先
決斷以杜其爭而或量處以厭其意則官法與家法
並行人紀與人情兩盡第亦可以不召兩家之怨無
負九泉之知而老公祖所以保惠不肖第者卽九鼎
百朋不足爲重矣伏承再諭直披悃誠毫髮有私天
日爲鑒

上萬府尊公書

竊聞皇甫氏云世有不能已之情而後有不得已之
言故仁人之門不拒浚恒之求于命之請所以廣先
容之路達幽隱之衷也生等素守固陋于一切公府
之事不敢僭易陳說而今有情不能已言不得已者
合詞上懇惟仁臺一垂聽焉訪犯董某憲副某之孫
蔣某憲副某之子也論世皆縉紳之裔居鄉無匪眚
之嫌而四壁徒存甘心落魄一經尚在妄意埋頭詎
料孱弱之豎儒忽遭窮奇之慘禍若云自作之孽學
實無因或者天降之殃命虞叵測闔門逃竄通邑驚
惶夫使世祿之家果自踰閑而滅義則執法之宰何
難引繩以批根惟此二孤罹茲三尺又乍見孺子之
危所爲怵志凡從大夫之從無不寒心者也伏乞仁
臺洞燭覆盆弘施解網十世在宥俯憐簪履之遺九

上國集 卷二十三
死迴生仰荷旃幟之造卽尼父之矜治長郭公之廉
孟博何以加諸方斯蔑矣嗟嗟訪察之法所以待元
惡戢巨奸也邇來造訪公行無辜濫及非賣菜傭必
守財虜耳一經捕逮立見覆亡行道之人皆爲扼擊
仁臺明並日月威肅雷霆當使魑魍獻形檮杌屏跡
此亦萬代所瞻仰而生等尚有所囁嚅未敢深言也

與劉太尊

巷詠塗歌蛙鳴蟬噪乃至動居高之聽虛盡下之懷
矇眊無知芻蕘忘忌罪不容于誅矣先君一節自矜
萬死不悔得列郡乘敢不銘心但于節義之中又附

建言之歟豈建言不足以當節義乎抑建言者自附
于節義乎別立名目似覺駢梅王吏部就學雅好清
修共推廉幹驗糧典禮以及司鈐革常例革班銀皎
皎不污彰彰可述忽爾削籍實忤當途若攀送梓宮
一疏是其末節未受奇禍附之建言非其倫矣薛憲
副應旂理學節氣悉有足稱縣誌列之文學其孫敷
政敷教嘖有後言幾于削木善乎顧光祿之原草畧
以類從不爲品限庶幾無獎抑見靡爭矣大抵此事
必非一手之力亦非一蹴可成雖戒築舍之謀宜廣
合宮之察台臺以爲一郡之史而操管者以爲一家

之書孔作春秋未聞爲叔梁紇立傳若乃錢糧徭役
難紊毫厘水利兵戎實關沿革成書旣布明例永垂
又非可草草從事者也雖然位卑而言罪矣成事而
說贅矣猥承下問敢布其區區如此

余偶作園居詩劉公見之謂有
意于郡史移書見詢遂有此答

崇祀先賢公書

郡國祀鄉賢所以崇德也維風表俗典其綦重矣晉陵
祀先賢所以明道也開來繼往義有取焉故非此科
不必並進非其人不得濫入又當察之士論質之公
評者也敝邑錢啓新先生

聖代圭璋人倫冠冕

在 朝廷則侃侃危言削籍而不辭居鄉黨則恂恂
厚德循墻而罔越臣言忠子言孝家示儀刑田讓畔
行讓塗俗成揖遜廉貧折券待舉火者百家倡義施
棺獲就木者千口蓋善善而爲善非皦皦以殉名事
大夫于邦無以尚矣祭先生于社有何忝乎若廼闡
明聖學興起人文緒績濂溪統承伊洛析義利公私
之辨探身心性命之微注易象衍範疇抉千聖不傳
之秘溯道源沿儒滙開一宗不二之門羅萬象于心
胸振六經之羽翼寢無愧衾行無愧影徹夙夜以兢
兢口不絕吟手不停披窮歲年而屹屹初終一節表

裏相符崇正闢邪奉王文成再接西江之脉考德問
業偕顧光祿狎主東林之盟世或效羣犬之吠聲公
獨抱潛龍而無悶流行坎止存順沒寧都講取斯曾
見諸生立雪受靈傳是當今百世聞風况合俎豆于
澤宮茲實權輿乎秩典理宜叅伍議實會同昨聞邑
文學之公呈特荷縣父母之詳勘生等未窺學閥曾
側講堂既目擊而道存肯肯而論定此外冠紳相
望未敢因藉爲援其他衣鉢未真何敢阿私所好此
又合詞之本意從祀之公案也伏祈俯採并賜轉申
斯道幸甚斯民幸甚

答公周庭

齊山吳水渺渺各方怒如之懷曷可云喻丁巳之春
聞仁兄幾爲左右手所中暫養時晦以避狂氛乃長
公忽不少延天何奪之酷也家弟龍溪令以不獲上
掛冠歸今夏五亦遂棄世人琴之痛正難爲情視仁
兄更有同病之憐矣純所亦自粵東返初服此賤兄
弟拙宦之明效也惟是不肖弟泉石之癖已痼膏肓
魏闕之思杳如夢寐聊從負郭別構小園稍圖偃息
以畢此生但覺天地之闊日月之長而不知風波之
從何處來也東事決裂未知稅駕漏舟敗屋薄海皇

皇違之一邦亦復如是近憂遠慮此又高明之士宜
擇地而蹈之時矣敝鄉小小田宅時時有之但不知
仁兄所需應若干金之產必欲卜居更須相時成事
正未可踰度也仁兄倘肯命呂安千里之車第亦何
難虛公孫一區之宅耶幸決早計以慰勤思勿終託
之空言也

止園集卷二十三終

止園集卷二十四

延陵吳亮采于甫著

憲約

爲摘要約以便遵守事

照得本院猥以菲材叨茲重鎮不習爲吏何知觀民
矧當秋比歲閱之期兼有衡文振武之責日夕飲冰
惟弗克肩是愆所有應行憲務具載巡方總約者業
已犁然而時久則今昔宜通地殊則邊腹宜審案牘
可覆管見偶窺畧約三章聊攄一得願地方同事諸
賢督率文武將吏實心遵守加意振刷本院且藉手

此園集 卷二十四
以冀澄清于萬一矣

一重官評夫致理莫先于察吏知人卽所以安民
行部激揚賢否爲急本院哲未能周而愚不自
用惟是託心膺于道府不能寄耳目于旁蹊恃
諸君子之不誤本院而已否則有近例連坐之
典在

一咨民瘼夫天下風俗不同凡人知識有限况于
邊地之瘠寒本院之寡昧乎如有見聞不妨陳
告至于職掌所在尤宜條析詳明卽在冗秩卑
官本院且爲聞善之拜矣

一稽公案夫詢事必期底績率作惟在省成矧缺
差二年積案千計倘不立法稽考安能依限完
銷各衙門奉到事件務須分別緩急着實勾稽
毋憑吏胥浮沉以致延閣卽有事重未結年久
難完者亦須明白申報以便奏請開除不然考
成之罰誰執其咎

一戒冗費本院素性澹泊自甘况于邊陲凋疲尤
甚不能爲地方造福何忍以口體累人坐飯毋
過五肴中火止備一點已經揭示自合遵行或
不相諒而復加繁縟所至騁騷是輕百姓力而

以本院爲貌言也少一事省一事之費多一分損一分之福願諸賢深體而共勉之

一諭有司邊方已極苦寒軍民頗知守法各官須愛養休息無得密罔苛求撮其大者與各屬約刑法不可濫施詞訟不可濫准錢糧不可加收罪名不可多問科罰不可妄行發落不可遲滯佐貳不許受狀待百姓不可不寬待衙門不可不嚴負此約者定以三尺從事

一諭府佐各路各廳之設原以稽覈糧餉撫恤軍民而弊習未流間有視爲奇貨因之染指者將領何觀邊事奚賴今後各官務須自愛諸將有餌慎勿吞之厥或不臧白簡具在

一諭佐貳首領驛遞倉庫各官爾等自分前途有限多只苟且一時不知大小總是命官何苦不自愛惜前程得之甚難一筆勾之甚易近時佐貳等官多出空選貲本已奢或係效勞機關更熟誅求無厭放肆無忌莫此爲甚而此輩與民最親害民尤烈一方群虎百姓何堪今後如有不遵禁約貪酷縱橫者告發訪聞責戒拏問決不姑息道府尤宜加意廉察從實揭報此亦澄

清第一義也

一諭教官各官出身正途誦法先聖每以日暮途遠或至倒行逆施名爲師儒何自菲薄各宜正已表率盡心勸課卽邊方人文稀少務要因材作養更須鈐束諸士毋令出入公門武斷鄉曲方爲稱職至于修脯贄儀尤宜崇尚雅道德行文學經師人師于各官有厚望矣

一諭王官

代府親藩諸宗

帝胄本院叨奉

簡命但知展親况有賢藩檢束諒無扞罔但蕃衍不無敗群左右或多撥置長史教授等官須宣雲密邇尤易往來武弁無奈情分科歛餽遺稍不厭心復肆謗毒本院疾首此風不難爲諸將任怨今後各守口將官不許縱容一人闌入或有潛行託宿者各官卽時揭報以憑驅逐容隱不舉一體根究治罪

一恤驛站兩鎮往來接遞多係戰馬軍兵疲繭損傷不虞何賴至于派撥鄉夫尤爲白役苦累今後應差遣者務須加意節省不應差遣者不許徇情應付文武衙門人等但有索要折乾恤馬等錢及走傷頭畜者赴院呈告以憑追賠違例

枉道擅馳遁者查出定行拏究

一恤罪囚兩鎮地方軍民愚悍動因小事赴院興詞及批發問官無論貧富槩擬有力得罪之人有爲贖緩變產者有因紙價揭債者一朝之忿負累經年殊非本院哀矜庶獄之意今後問官所擬有力無力俱聽本犯自己招認大都以開釋免科爲主本院因不藉此錙銖以敲民之骨髓也各官自審詞狀亦宜深體痛懲留有餘以還百姓或亦積德施仁之要乎倘有濫科定從劣處

一驗市貨國家羈縻慮首惟是市賞一節各官銜求領買任意侵漁以致貨物粗惡夷人藉口殊爲可恨今後須擇廉明有聲者差委貿易貨到之日仍聽本院不時盤驗如有央求囑託希圖領買取利致悞市賞者重治不宥

一慎防範宣大兩鎮與虜爲隣方今欵和夷人領賞買貨出入內地居處城堡軍民結識視爲奇貨夷人投餌巧于窩藏潛聽消息游行街市我之動靜彼無不知我之道路彼無不熟倘有他釁寧無隱憂昨據獨石議修月城安插夷人良

亦有見各該市口邊堡及鎮城俱有夷人討賞
行住去處如進城止許由一路行走從一門出
入仍令通丁人等把口跟押併諭住夷店家不
許交通窩藏倘致失事責有攸歸應議處者通
詳呈請

一清占役營伍之蠹私占爲多蓋奸軍每投勢宦
及聽用武官作爲伴當名色而管軍官擅將所
部派撥分送名曰雜役每月扣除糧銀名曰買
人此利有餉操演久缺營伍盡
虛宿弊積習牢不可破今後但有占役納辦軍
丁盡數撤回入營隨操如仍前不悛許諸人訐
告坐贓重處

一清冒糧兩鎮官軍數十餘萬各有糧額事久弊
生事寄空名糧無實數且如一官陞遷必有隨
任家丁數百信憑自報照數關支及遇點查多
屬雇倩又有逃故軍丁不卽呈報按月冒支又
有將逃故雙糧軍士止給單糧頂補餘糧抵克
私用近該戶部楊查究龍門衛說冒情延捺
不報此類甚多法應稽核該道嚴諭軍官除已
往不究外今後軍士務要正名實數糧銀不許

虛冒重支一切宿弊悉行查革本院巡閱簡核倘有訪聞或被訐告罪不爾貸

一清屯租查得贍軍屯地給軍有數兌糧有數責印屯等官徵收以完欠多寡爲殿最不無掩飾參罰以一地而兌兩軍之糧有將本軍遺地召人承種既收其租又扣其糧甚有管屯百戶擅將地租軍糧不奉批呈在其昂抑或侵收使費或藉名拖欠或那移頂補情弊種種今後須設法清理其地有租不必扣糧有糧不必收租至于扣糧分數先呈該管衙門明註某人應扣某年分屯糧銀若干計數登簿照數扣除不得仍前侵收混扣致滋弊孔

一清牧地宜大兩鎮皆有牧馬草場先年邊警頻仍俱附郭牧放便于傳調自欵夷歸馬趁草遠放所遺牧地率多耕墾盡成肥饒有量行起科者有指初墾無糧者有被勢豪侵隱霸種賄囑打點以多報少以有作無者近且爲奸弁妄稱閒田徵收籽粒屬之稅監進奉矣夫 聖明停稅有日一旦蠲還兩鎮以資牧放固可翹跂待也獨無奈勢豪積蠹牢不可稽耳近經撫院

連查出牧地數十頃明立界石以防侵占殊費苦心而其未經查出者尚多也各道能仰體此意用法稽查或許諸人呈首則塞淵不虛而驟牝其有賴乎

一查堡寨城堡之設所以保障居民邇因烽火不驚民多散處山谷岩墻坍塌村落荒涼而各鎮畫圖列障粉飾丹青具數報修開銷錢穀卽有頽垣敗壁聞焉無人名存實亡緩急何賴本院歲閱在邇寧厭周巡各道預查所轄宮民城堡各若干除堅修固守外但有傾圮速令繕修如果工力浩煩不妨申請區處限一月內造冊呈報此亦未雨徹桑爲地方長久計也

一墾荒地兩鎮荒地甚多開墾未廣蓋因畏避起科加差帶徵舊負以致民不盡力地有遺利深爲可惜矧今邊事久謐生息日蕃招撫開荒誠目前首務也各道督率司府州縣衛所掌印官揭諭遠近流移土著軍民人等將空閒無糧荒地聽其盡力闢治給與優免印票永不起科本管官里不許追索舊負坐派雜差每季終將墾過數目收過戶口造冊呈報本院將此考驗實

政慎毋視爲泛譚

一嚴捕盜兩鎮軍民雜居盜賊潛伏劫竊時有巡捕爲何今後捕盜官兵將所守信地分屬晝一晝夜巡防遇有盜賊生發併力擒拿有功照例給賞官仍紀錄但不許指賊嚇詐生事害人及剋留盜賊受賄賣放每季終該道將地方提調巡捕員役失事次數及曾否捕獲名數揭報如三次無獲各員役招解掌印叅處有隱匿不報及報不以實者訪出一併叅究

一禁窩訪本院職司彰瘡間有訪拿原爲衙門奸胥地方豪惡而設乃兩鎮各廳路多有窩訪人役一經委託四出詐騙元兇漏網反將一二猥瑣暗陷塞責或挾讐肆毒羅織坑砌殊可痛恨今後各官務要留心體察不得委任積猾尤不許干連人衆貽累無辜如解審誣枉決要根究原報之人從重坐罪

一恤行戶官價之名濫爲民害各衙門及首領等官每用貨物不給現銀率以票帖賒取遲至數月或給半價及至領價又有吏書門皂使費以致闐闐咨嗟折本罷市更有買辦員役指官私

用者今後各衙門俱要先給現銀責委殷實員役兩平交易毋虧小民仍置簿將取過物件有無給銀登記明白送查

一蘇民累宜鎮召買糧草先係委官領銀收買近來攀及街市鋪戶多致賠累傾家自後仍前選委職官領買不許攀累街民但米豆亦須依時估價不得減少以累委官如有收受勒索者告究

一蘇軍累宜大兩鎮營路軍丁凡有倒死馬匹合營攤派不足本軍包賠及至到官估驗印烙務爲減削以致苦累有鬻賣妻子傾家喪命者殊爲可憫前院湯曾經查處該道覆議終屬具文竟無長策惟是稍爲通融別求津貼或亦甦息貧軍之一端也

一崇學校士類矜尚名節砥礪貴嚴官司愛惜人材培養宜亟故士行毫不可渝而士氣亦不容挫也除諸生有越禮犯分喪檢敗羣者訪實另行究黜外其或被入告訐或因事干連非奉本院批詳不許擅自勾攝集從淹禁卽係大逆重辟亦須一面拘候一面申呈各衙門招擬報允

之日仍詳本院批准除名蓋廣厲樂育不妨並行而本院視學觀風實所兼攝故于欵末尤致意云

學政

爲學政事照得幫增舊例必考居一二等者方許申詳而邊地少文科舉數窄諸生偶遺額外不得一望廩增殊爲可憫且各學虛廩尚多不贍諸生更復何用本院深念寒苦設法疏通其考居三等前列者酌量給賞准附二等之後挨次幫補或亦憐材稱餽之一端也但須聽本院臨案裁定毋得一槩濶擾自取

感荷以負作興之意

又

照得歲貢舊例必屢經科舉者方許起送但邊方科舉數窄一誤三年有終身食廩而不得貢者前院間有通融終未畫一今議歲考曾經三四次考居一二等者雖未觀場姑准美科舉一次起送或亦拔淹優老之一端也其未及三次者不准

又

照得衣巾舊例必青衣考復者方許查給但寒儒末路日暮途窮自揣荒疎亟求引退似與冒昧頑鈍者

不同查無過犯姑准衣巾終身照例優免或亦獎恬恤苦之一端也但須未考預呈若發案之後已經斥革者不准

禁約

爲禁約事照得國之大事在戎兵之大命在食方今邊陲多事卒伍少糧勞瘁倍常困窮可憫所賴諸將領加意撫恤與同甘苦感恩用命惟爾之功如有沿襲獎規尅減糧餉者許軍士據實首告或本院別有訪聞重則叅題輕則究革大閱在邇功罪昭然三尺無私決不姑息

關防

爲關防事照得本院原藉江南距塞北三千餘里家世業儒素性寡合並無子弟在外遠遊亦無星相從前熟識如有棍徒探知來歷假借名色有所營求卽係詐僞仰該地方擒拏送官究遣阿縱不舉訪出連坐不貸

門牌

一本院耑奉

憲綱兼司文命矧當大比大閱

尤矢極慎極公且兵饗各有成案官箴自有公評文章原有定價三尺具在一毫難欺至于招

移試卷本院親手裁決虛心品衡並不旁落吏書曲徇津要如有不安義命不遵憲規鑽刺打點者自取罪戾毋貽後悔

一本院素甘淡泊最厭繁華取給幾何供應易辦俱委官發價置簿現銀平買並不虧擾行戶如有勒取措欠者許被害不時稟告其出巡經過中火止備一點住宿坐飯無過五肴吐棄有餘糜費無益有驛州縣不許重送下程小飯徒滋煩擾違者提吏究治

一本院職司彰瘴義切惻瘳一切地方利病民生休戚未能洞悉實所願聞凡官吏軍民鄉耆人等果有真知確見不妨據實陳說以憑裁酌施行至于巡歷所臨嫌疑宜遠凡有書帖不許稟投縉紳勿枉先施事畢自當踵謝其經過使客隨時擊鼓傳報悞者查究

一每日辰時開門回風吏領牌簿收薪水放投文門吏預將投到公文置簿掛號詳驗件數開寫明白另具小帖隨牌呈遞唱名查收應見官員總具面帖先呈依次稟見申時先領文後解審畢繳牌簿如有邊警京報督撫會稿隨時擊鼓

傳進放告日期照舊規行

止園集卷二十四終

止園續集

延陵吳亮采于甫著

詩 壬戌以後作

親于弟少余一歲今亦六十矣生同元正幼同
學壯同舉老同林下先人同為太史公情見
乎詞聊博一笑

一年以長亦隨肩六十侵尋雪滿顛士譽龍頭同桂
籍宦情雞肋共桑田樽開獻歲偏宜栢燭秉先朝舊
賜蓮莫道池塘無好句陽春草色已油然
壬戌元正再賦一首似親于弟

回首風塵久息肩頭顱如許盡華顛買山有意留雲岫謀國無能笑石田折得一枝林是桂種成五樹社名蓮翻欣甲子從仍數與爾靈光並巋然

郁君孝行

郁貢家聲魯國儒多君高誼比黔婁悲深瘞鹿松因茂淚灑聞雷栢欲枯三釜自憐虛祿養一經聊足守遺模 聖朝日有維新詔不獨旌書錫大夫

夏日園居沈伯和詒詩見存次韻

移家宛在水中央一日清閑兩日長末路不堪荆棘滿小池時送芰荷香悠悠物論元相煖耿耿心期未許涼塞馬向來終是失軒毫莫問蕭爲驪

那得剛腸繞指柔福心偏易觸虛舟疑城未破先除障慾海初離忽起漚世事倦來惟杖屨人情險處盡戈鋌知君久閱滄桑變此際應須下一籌

偶有足疾董釐卿以叩竹杖見餉賦謝

生來獨立骨峻嶒筋力垂衰惜未能豈是羊腸難厠足願將雞肋任麾肱頻修丹竈燒紅葉閒步蒼苔倚赤藤却笑老夫真潦倒提攜今日藉良朋

次韻書懷

龍門何必太峻嶒千頃汪汪叔度能幻劫總輸彈一

指禁方須是折三肱心交未許傾葵藿口業從教斷
葛藤莫道翟門交盡絕開軒猶有月爲朋
相知對面隔峻嶒此事人能我不能安得三緘籠是
口何如一覺枕爲肱已栽陶令門前柳誰識丁公石
上藤肯以幽居嘆離索由來君子本無朋

蔣澄吾七十

幽居畏壘學庚桑墜戶偏依薜荔墻身寄一塵猶未
穩業拋三徑已全荒西河帳下傳經術北海樽前賦
酒狂七十縱稀何足道與君還醉十千場

董釐卿五十

百年生計漸蹉跎五十如流忽已過握筆共推珠
落銜杯時見玉傀俄風波眼底多消受壘塊胸中未
耗磨酌酒自寬應不厭榮名人貌奈君何

壽釐卿得險韻再用書懷

青山卜築已蹉跎獨寤衡門矢弗過人事豈堪多錯
迕世情應只在昂俄忽驚此物奚宜至須信斯言不
可磨縱使幽棲近卑濕莫教對酒飲亡何

賦叩竹杖得險韻吳子行屬和絕佳再次奉謝
筆山百尺駕峻嶒佳句驚人陋薛能諸世憐余無媚
骨御風羨爾有奇肱彩毫賦就傳淇竹白練書來勝

山園續集
刻藤試向中興論大雅幾人文友更詩朋

烏啼曲

城頭頭白烏夜深啼嗚嗚反哺養不終有子胡爲乎
不如梁間燕啾啾時相呼嗟彼絕裾人不念母氏劬
風木有餘恨寸草寧及圖拊心自迴環鮮民生也夫

結交行

良友貴忠告不可義當止淡交忌苦辭隙末在謀始
噐鼠未易投路馬固難齒而况毛裏親肺腑安可
鄰父致狐疑家翁習狙喜故諺亦有之人莫知其子
得南小儀報述懷二首

歸來著論擬潛夫再奉新除是舊都

舊都濟鐵

骨繁霜先已點衰顛冥鴻肯逐

前鳳振鷺還驚臺

上烏爲道山公勤啓事何當物色到菰蘆

謫籍初傳下七閩量移旋已荷重綸固知推轂群公
意敢負懸車十載身先達幾曾甘小草後來應自愧
前薪何如白社藍輿穩不踏丹陽道上塵

先學士以 日講建言蒙 恩卹錄志感二首

遙聞優詔下長安日月重新雨露寬一代孤忠思汲
黯 三朝舊學念甘盤池頭接武仍延世地下修文
復拜官莫道承恩頻送喜九原應有淚難乾

一疏陳情叩帝闈，忽驚綸寵賁衡門。微勞啓沃心猶熱，直節褒嘉語更溫。敢謂伏蒲能悟主，須知式穀可詒孫。清朝縱有維新命，安得涓埃答聖恩。

重構梨花雲亭落成二首

十畝寒林一草亭，芙蓉爲障竹爲屏。亦知蝶夢如花夢，安得身形似鶴形。香比金蘭同入室，光依玉樹盡克庭。却憐日暮羅浮客，多少塵勞喚未醒。

東閣重開結構奇，欲從北渚問南枝。垂簾城上青山色，對酒樽前白雪詞。幾度巡簷成獨笑，何人折簡寄相思。野夫一片空心在，莫遣津頭驛使知。

壽魯于第五十

兄弟相隨歷歲年，幾人青眼到華顛。池塘有夢同開徑，城郭無營半在田。漸卻俗緣聊復爾，得全清福豈徒然。持杯欲效如陵頌，喜見南山近席前。

送柔兒之任黃田時值余初度且爲余勸駕

青春結綬向闔天，彩服稱觴戀別筵。推轂尚虛稽叔駕，鳴琴應奏宓生絃。其誰事業當今世，乃爾功名起古田。報國承家無限意，但將青白比韋絃。

送賀賓仲北上謁銓

世家胄子舊簪裾，籍甚才名十載餘。臺畔龍媒稱上

駟懷中鴻寶抱方諸文星此日移南斗烽火頻年發
左間羽獵誇胡應有賦只今誰肯薦相如

再奉司封之命二首

肯容偃蹇臥柴荆一歲三遷荷
主明敢謂物情推
簡要自慚臣職負寅清都人共識驄還避園叟寧誇
鶴不驚衰鬢蒼浪頻自笑漫言恩重覺身輕

尺一初傳枕自高忽聞申命領南曹
遯思吾已拋鷄肋鼎實誰當薦
雉膏賸有封章仇澤淮久無書札到
山濤白門見說多閒曠吏隱何須賦廣騷

恭謁 孝陵二首

五夜傳清漏三峯起瑞烟
重闔千柝靜嚴道一燈先
定鼎乾坤正遺弓雨露偏
陵原瞻望處俛首意悽然

二

放逐安衰蹇遭逢自
聖明萬方同玉帛四野遍弓
旌清簡宜銓署艱危重鑄京鍾山
祥濬發拭目望昇平

彭旦陽計部同日謁 陵記丙午典試辭朝今

十八年矣

中州東土共招賢同日辭朝十八年名世文章元卓
爾憂時鬢髮已皤然丹心戀
主真堪許白首爲郎

山園續集
祇自憐莫道陪畿稱仕隱依稀猶在五雲邊

午日同寅招飲文部園泛舟一首

微雨涼生白苧秋况逢佳節
帝城遊清曹敢並裴
王駕逸興還同李郭舟五月榴花紅雪染萬年松樹
紫烟浮偶從澤畔行吟後黯黯猶懷楚客愁

初赴留銓過高座寺次壁間韻

乍雨乍晴日正長忽聞臺上雨花香官閒偏喜過僧
舍吏隱何妨入
帝鄉樹老不堪頻繫馬竹溪應許
暫棲鳳莫言小草甘遲暮蕭艾由來共一囊

升署

柱下舊名聊衙官亦自甘不堪寧止七所就豈須三
小票催跟辦長單放報參須臾堂事畢掌故可曾諳

公餘

十載投閒又起家自慚衰髮客京華憂時未蓄三年
艾對景猶看五月花日落空庭無宿鳥雨餘荒署有
鳴蛙明朝欲訂尋山約乞得山公早放衙

夜坐

兩道徵書一紙憑衙炎促駕到金陵傳來宦舍渾如
客鎖却官衙澹似僧對月遙憐小兒女看雲忽憶舊
賓朋北山猿鶴應無恙爲問遺文勒未曾

山園續集
楊冲宇使至

鄉園敦夙好與爾倍情親有酒時同醉無文不共論
招邀寧隔日離索忽經旬珍重開械意相思莫重陳
蘭民部六一張國博圃田皆余所掄魁也白下
晤從喜作一詩贈之

肯因留滯嘆周南忽漫相逢合舊簪時論已歸天尺
五材名並許象魁三江山勝跡容清隱風月良宵縱
劇談莫笑楊玄今尚白不將餘草付桓譚

姚允初招集園亭二首

豈謂繁華地坐來生隱心青簾垂隔岸白板護中林
愁緒丁年別雄談子夜深一尊聊取醉不必問元心

二

倚檻俯清流林塘面面幽江湖沉是陸宇宙拍皆浮
柳暗朝烟合花明夕照留風塵元不染清夢落滄洲
謝明選文學張元素山人見訪

不是憐寒暑誰來慰索居晴雲傾蓋滿夜雨入窓虛
劍氣張華合詩才謝朓餘聊將白門酒相對酌枯魚
涂映薇世丈招游燕子磯病沮賦謝

如水門庭好客稀世交情重故依依千秋諫草名猶
在六代詞華事已非風月平分牛是渚波濤獨撼燕

爲磯却憐興盡供多病悵望江邊一鳥飛
病中喜恭兒至

旅愁容易病况乃意牢騷骨肉何曾遠腰肢可耐勞
微軀須藥物雅志在蓬蒿莫作還家夢江頭問客舸
喜柔兒閩中書至

三春成間別千里報平安江海同爲客風塵各殫官
舊游懷攬轡新沐想彈冠弩力猶強飯將無愧素食
恭聞 諭祭先大人有日矣呈 堂請假一首

儂裝何太急奉 詔敢云遲匝月官資淺數天 帝
力私已多京兆日肯後尚書期未效涓埃報卅心矢
不移

留別岳太常石帆

多少東山起謝安蒼生有淚未曾乾冠彈末路新知
易柱砥中流古道難百日清齋烟突冷千秋勁節斗
芒寒羽書南北須前箸莫向鍾陵拄笏看

別同寅諸丈

仙都群彥集何幸得同游四署官聯切三堂客禮優
銓衡秦水鏡詞賦晉風流別後書難寄浮沉在石頭
出都排律

十年甘遯野一月強之官盛世 思綸重開曹法網

寬鄉書原易達別酒未會乾掃徑園丁駭遯門稚子
歡北移銷鶴怨南徙息鵬搏鶉火應無改蟾光豈再
圓暫將劍佩拔聊取匣琴彈流坎吾何意長言咏伐
檀

送王砥中奉母之任將樂母且以節受旌矣

世家才子拜新除捧檄真堪慰倚閭忽躍雙龍依煥
劍更將一鶴引潘輿三遷苦節留魚釜八座高門待
駟車况是清朝容獻納承明計日下徵書

和葉相公韻贈南二太中丞

幾年隔面悵天涯營柳遙看映轡絲秉鉞龍門遊獨
早給綾鶴署對偏遲青箱四世聯虜似玉帳千山
鼓旗蘭籍雖云頻附驥羨君棠棣遍成碑

久因鱗隱敢吞鯨君獨慙慙問酒兵風月聚談慚右
闈海山專閩藉長城雪峰坐對消烽影微極班高識
履聲功偃靈旂登鉉路豈徒闕甸將星明
兒輩叨題鴈塔名五花飛鳥自神京風霜一席推元
老桃李千蹊屬後生未入呂公衣上袋先驚杜相庫
中兵不難宇下分餘照燭影雙雙已在旌

刻帶竹贈蔣列卿

宋人刻玉象楮葉莖柯繁澤莫可別公翰削木合天

機鵲成三日不下飛古來絕技類如此日鑿一竅混
沌死晉陵奇士蔣列鄉別具一種天聰明用刀刻畫
如用筆切玉鏤金不見屑模形肖像宛若生智力敢
與造物爭鼠膽虫臂繭絲細鋒殺毫芒盡如意五日
一水十日山粗描淡抹直等閒我奉新除帶一束非
金非犀亦非玉倩君刻之百日餘枝枝葉葉皆扶踈
葵忠萱孝蓮與菊秉節持廉若相勗玉棠蓉桂芝蘭
芬馥郁應添刺繡紋何物運斤煩妙手自愧折腰郎
白首與君解帶臨清風高牙大壽寧熱中更有裏言
何君說造化精靈忌宣洩雕琢雖工太樸傷從來大
巧不如拙

范太滌乃翁八十

當年花縣暫棲鸞今日丘園賦考槃髮爲憂時宜早
白心因許國正留冊青藜已賜山公杖黃紙應加尚
璽冠倘發非熊明王夢肯拋渭水舊漁竿

叔祖菊軒翁稱七十壽時先大夫曾有詩爲壽
得仁字韻今歲 敬軒叔登八表年彌高慶彌

長矣爰步先韻奉祝遐齡亦見仁壽之義云

宗盟勿替共依仁壽域曾開憶所親叢菊留香根正
茂蟠桃結實葉逾蓁肯隨羽翼商山老寧羨熊羆渭

水人不獨五湖稱社長問年應與廣成隣

奉送李明府蓼水老父母暫歸豐城詩三章有

明府來茲一 幾及三載才優百里政表列城水

比臣心不改鄭子游之市霹隨公手肯燕裴司戶

之鋒塞竇維風亦拮据而成緒據案削牘真剖決

之如流促柱則少和聲鳴琴自若盤根以別利器

奏刀砉然祭彤方舉於鉏姦即墨遽從而起謗令

尹無愠色亟歌歸去之詞童子有仁心應動巡行

之嘆官評若此公論謂何不惟士泗而民眺行見

轅拔而轍臥曷禁太息託承言愛之莫克助之

但何謂德老矣無能為矣何敢言哉

憲令表循良豈謂翻成貝錦重側目道不

李傾心境內憇甘棠蒼蒸已沐三春露白簡成

丹霜回首章江烟水濶漫勞憔悴向沅湘

馴飛麥雉遍原田屈指三吳爾獨賢共羨虛懷明似

鏡那堪強項直如茲斗邊紫氣留孤劍橐底清風騰

一錢 明主定須封即墨况當吏治中興年

從政三年吏所師一清猶自畏人知肯緣請託投橋

餌忍為催科柝繭絲錦有萋菲寧足信囊無恙敢詎

須疑謾言去後思何切千載延陵口是碑

山園續集
謹翁董老親丈七十壽詩三章

一星南極近南山避世龐公遠市寰天地容吾生白
髮風塵任爾駐朱顏三湘結綬曾分刺六詔投簪早
閉關諸少更聞推競爽亭亭玉立戲斑斕

向來洛社好彌敦此日靈光爾獨尊今是僅存三曲
徑古稀迭見幾曾孫小春逢閏風光媚大稔占年咲
語溫多少賞心堪取醉洽比寧惜倒芳樽

莫道漁樵計已安勞人生事尚多端一身堂堦貽謀
苦十指饔飧斫著難隴上勸耕勤蠶展窓前讀史
熊丸知君已作千年調好向丹梯駕紫鸞

奉懷大中丞綿翁周老公祖詞宗請正其志

閩海詞壇獨擅場朱旂獵獵出天間交非隔面商
雨官耻呈身栢有霜名冠千人舉桂錦座成三獨弄
麻黃夔龍四海歌霖楫南國姑垂召伯棠

元老時推有壯猷東南節鉞衛神州飲醇惠比投醪
洽可直功憑操墨收推赤蠻方求款塞佩蒼禁地尚
泥樓早開鉉路需公輔未許吳中有袞留

久訝雲泥路已岐忽從幕府望威儀會看射弩消鯨
浪乍憶連鑣謁鳳墀斷鞞自慚供奉日建牙正喜策
勛時驅車又悵關河隔好藉梅花寄遠思

山園續集
甲子元正九日起家赴 闕憶癸亥送子柔思
赴古田任亦以是日寄懷一首

去歲茲辰送子行吳山閩海不勝情 聖朝求舊招
蜚遜王朔更新拔彙征三命右丞猶似祖一官長令
豈慚卿相期謁 帝承明殿爲問循良第幾名

余以庚戌謝宣雲之役歸田有十二年壬戌蒙
恩起家留曹郎癸亥晉光祿丞甲子赴 闕再
過新嘉驛次前韻六首蓋不勝升沉存物之感
矣

是非元不定否泰若爲分幸睹重輪日遙瞻五色雲

新猷真曠見舊事豈堪聞無限憂危意斜陽酒未醺

二

世事虞難料人情忌太分鞠躬惟省月回首尚懷雲
謀國材無補匡時道未聞大官何以報作醴或成醢

三

至尊憂社稷猷念有誰分每美登車范空懷折檻雲
燕怡滋後患豐裕惕前聞醇酒何妨飲難容此日醺

四

年華踰一紀春色又三分耻逐隨波水聊舒出岫雲
音書何處達烽火不時聞多少關情處愁來意若醺

五

昔年同愛弟今日死生分已溘青潭露猶眠白晝雲
琴亡音寡和草就夢稀聞猶酌杯中酒淒其不忍醺

右念亡弟龍溪令世子

六

憶昨京江上群兒首重分爾心依永日吾意任浮雲

鳧影龍樓望鴻名鴈塔聞倘沾燕市酒相對且醺醺

右憶諸子

次韻奉答許定宇親丈二首

青山無限薜蘿情谷口傳書聽友聲
殊賞每逢思許

椽窮交未報愧虞卿山公不改依親樂廷尉虛聞下

士名最是羈人秋興發何時樽酒對孤城

憂時涕淚總關情易水時聞擊筑聲民且為魚焉用

相君將使鶴孰為卿賜環未副東山望請劍爭留北

闕名况是四郊多壘日不知誰可任干城

次韻寄懷青門第二首

六十功名計已遲強支病骨叩彤墀亦知竊祿慚無

補敢謂明刑稱有司猿鶴依依懷故國夔龍濟濟赴

昌時念君雅抱經邦畧欲借前籌保未危

莫云國事漸陵遲暇豫群公滿玉墀
是說東西頻喪

地更聞南北已分司 冲皇正值多難日衰老都非
少壯時未許名園耽獨樂佇看赴闕矢憂危

奏疏

懇乞恩卹疏

天啓二年四月二十日

奏爲

皇仁覃被敷天解澤尚遺草土懇乞

聖明俯念先臣講讀微勞建言大節特賜

恩卹以光孝治以勵忠貞事

臣

父吳中行隆慶辛未

進士改翰林院庶吉士授編修萬曆五年以建

言故相張居正不奔父喪

廷杖削籍後蒙

皇祖召復原職歷陞右春坊右諭德兼翰林院侍講

克

日講官又以上言等

主權明臣義一疏觸忤當路四疏乞歸奉

皇祖聖旨吳中行准回籍調理着馳驛去該部知道

欽此又奉

聖旨吳中行係日講官賜路費銀貳拾兩紵絲貳表

裏禮部知道欽此後蒙

皇祖起陞翰林院侍讀學士掌南京翰林院印信再

疏乞休吏部覆奉

聖旨吳中行既稱有立朝大節依擬在籍聽用欽此

越一年

臣父病故撫按具奏

賜諭祭一壇臣父之叨沐

聖恩亦既優且渥矣又何敢有他覲近覲

皇祖遺詔

皇考恩詔其於建言講讀諸臣存者擢用歿者卹錄

雨露之澤無微不至

日月之光無幽不闡又見原任吏部侍郎趙用賢

子趙隆美疏乞

恩廕奉有

俞旨於是乎蠖蟻之私不得不一控陳于

君父之前矣臣父當年建言與趙用賢及今見任都
察院左都御史鄒元標同事而抗疏獨先受禍
尤慘出一生于萬死蒙再起而三黜晉秩不踰
五品服官未及兩年直道難容公論共惜而用
賢蒙

恩贈廕以及

賜謚易名皆溢于三品常格之外豈非以其大節可
錄

異數洵加備極

榮哀均霑存沒

臣父志節實與相同事例或可相此

而三十年久鬱之忠魂億萬載難忘

曠典臣倘復以淪棄有所囁嚅生不得比人子死何

以見臣父此臣所以瀝血陳情不敢避僭越之

誅也伏乞

勅下該部查照

恩例俯賜

卹錄至于易名一節不獨用賢又有羅倫建言奪情
五品與謚之例是在

閣部採之輿論請自

特恩更非臣愚所敢自行陳乞也臣不勝哀願懇祈

山陰續集
隕越惶悚之至

患病乞休疏

天啓四年六月遺疏未上

患病不能供職懇

恩回籍言

臣以一介草茅三朝恩遇繇進士濫

竿中舍任御史按節西陲祇因戀母懷歸遂至棄官獲戾屏居田野十有三年自分此生永作溝中瘠矣恭遇我

皇上御極握符

親賢圖理搜羅遺逸振拔滯淹

臣亦起自謫僚流

陞今職

臣父中行復以建言

日講荷蒙

郵錄備極

息哀

高厚難酬消疾未效敢萌去志仰負

洪慈緣

臣

素稟虛羸久居湫濕四體雖具一足不仁

近於六月初二日偶遇老醫特施鍼砭方在茹茶灼艾而初八日廁名公疏隨衆趨

朝不敢越趨頓忘躑躅以致前疾增劇後效難期因而伏枕捫心觀時審局何以數月之間老成稟阻興瞻烏爰止之嗟忠正危疑結携手同車

之想以識不通方韻非諸世如臣者置身其間
即無大病竊有隱憂而况榮衛乖違胸懷鬱邑
肌膚漸削神氣不充倘未能保鰥鰥之生將何
以圖犬馬之報伏乞

皇上俯垂鑒察曲賜放還庶幾進退不苟慙拙自全
將微臣未盡之年皆

大造更生之德矣臣不勝激切待命之至

序

何郡侯榮滿馳贈序

三代而上有世祿有世官諸從布衣崛起者父子自
為貴賤不相授受其後稍稍得推恩所生然無常制
明興以孝治天下制大定公卿有任子做世祿之意
而靳其官父為士子為大夫得疏爵貴其父而或父
秩加于子子秩埒于父者子奏最得進父階一等以
示家不踰尊國無溢寵德意甚盛制甚善也曹南何
氏自廷尉乾室公崛起而今郡侯太瀛公接武登第
非世官而有世祿且稱世家矣廷尉公以名御史晉

丞棘寺未竟其用而我郡侯郎版部以考績奏最
天子予之告身階承德郎而贈廷尉公爲奉政大夫
母袁孺人爲宜人綸命煌煌賁相望于道而侯之喜
可知也諸在侯宇下者喜又可知也縉紳學士將效
一言之頌于侯不佞授簡揖而進曰君臣之義甚重
矣禮使忠事各有攸當夫 聖天子不受爵祿不惜
綸綍以寵賚臣下而復錫類推恩顯揚光大如揭日
月一命再命猶響答桴所以體郡臣者至矣寧詎萃
膺是崇亦惟是修職抱功展采錯事爲 國家宣力
四方無負一人寵靈毋論爲人臣者委身事主義

所避卽爲人子而微難得之恩圖罔極之報情亦無
所解卽今三韓多虞夷氛不靖 天子拊髀蒿目卒
未得一實心幹濟之士乃以不佞所覩記若我侯父
子皆大有造于遠者也夫遠之不造非一日矣稅璫
驛騷殘憊已極皮之不存毛將安附廷尉公按遠爲
軍民爭旦夕之命與惡黨作難叩闕抗章幾不免虎
口藉令當宁幸早聽公培養生息何至一旦潰敗不
可收拾如是我侯綺歲成進士服官戶曹潔已奉公
直于庭授河西一權與遠餉相爲表裏耗蠹蠲叢弊
孔百出擇便者望而卻走侯慷慨請行先後兩司權

務不避艱險諸凡持籌筭縉爲裕國卹民計殫極心力邊儲以裕庚癸不呼卽侯之庖必新發于礪已隱然奠盤石之安負于城之望矣又藉令侯得當三韓一百足餉足兵豈憂遺事哉制詞所稱父子分猷後先著績夫豈虛語而侯所以懷明發副寵命者豈肯苟焉而已侯泄吾郡未暮月而惠心德意灑潤流膏士慶于庭民歌于市商悅于途農安于野且未敢更僕數而報政奏治平當爲天下第一洛濱甫餞賜錢趣裝之詔匪朝伊夕田牧伯而銓宰由銀青而金緋黃麻紫泥隆施洵被 聖天子當不恡褒四世錫九章所以寵侯者未有量而侯之報一人以顯兩尊人者正未有艾也今日龍章初錫無亦世官世祿之嚆矢也歟諸縉紳交相賀洗盞爲侯加爵請藉斯語修飾之以附于何氏世家不佞曰唯唯命胥吏載之以俟後命

賀靜吾七十壽序

聞之養生家曰無勞爾形無搖爾精必靜必清乃可以長生此與吾夫子仁壽之旨頗相合夫仁樂山山主靜靜徵壽然則壽顯屬之靜歟非也天地幹運動靜互乘地爲坤維專翕主靜永奠無疆天之爲乾運

也剛健主動日一周無停晷竟亦終古不毀如必曰
彼靜壽此動夭吾安見夫斷滅者之至今存而不黔
煖者之皆殤乎矧人稟天地之氣葆德順之性其體
粹其神靈體欲常存神欲常運自然之理也余蓋觀
靜吾翁之壽得天道焉翁生而敏特少趨健壯益英
果任俠自喜少徇人緩急所振人饑寒婚媾歛葬之
無資者不怯傾橐人人稱爲長者是謂健于義意有
所可否議論颺發往往屈儕偶翻窠臼以伸其獨見
是謂健于談性善酒興更豪舉每會酣暢輒手巨觥
大聲疾呼連嚼無筭是謂健于飲其治生也雖不屑

屑瑟瑟較量錙銖而感獲數千指無徒手田園廬舍
無曠土耕稼墾膏廢箸質劑無失策是謂健于家居
恒有尚平五嶽之願嘗登嵩嶽朝岱宗浮荆湘上秦
和昨歲猶單車裹糧探慢亭九曲之奇子弟力挽之
不少沮是謂健于遊壯歲任光祿丞夙夜勤志例蠹
必滌大有能聲是謂健于官既量移洛下叅軍非其
所屑也委而去之自放于山水管菟裘矢終老焉是
謂健于退夫翁之一生自少而壯而官而家而四方
今且老壯敵少年一體天之健行之不少休動與靜
必有分矣乃知天厚翁之儲以爲用也而又永翁之

年以爲大用也疇曰動則耗靜則息乎而不聞戶樞
不蠹水流不腐乎疇曰柔則寬剛則摧乎而不聞鈍
者必屈堅者不磷乎疇曰無用則全有用則折乎而
不聞散木不材終其天年舍人之雁以能鳴獲全乎
如必株而守槁而寂雌而伏以善保其存亦何足以
云壽余故謂形全而不壞何如神運而不停靜存而
無益于生何如動用而有裨于世余羨翁之得全于
天而且善用乎天也然而翁之自號曰靜吾何也夫
動未有不根于靜者也動而不根于靜是謂躁動動
而躁未有能久者也分陰分陽天地之所以大也根
陰根陽天地之所以大而久也聞翁爲童子時數數
夢從道者游行一山中峯巒窈深林壑竦秀石洞砢
開有龐眉叟衣冠甚偉授翁詩一章清迥超妙非人
間語然則翁固王喬彭錢容成洪崖浮丘子之流其
于動靜之旨必有妙契夙授超出于嘘陽翁陰餐風
飲露之外者由此而期願大齊不足爲翁并數而七
十云乎哉余蓋觀靜吾翁之所以壽得天地之道焉
敬因仲先兄之請次第其語籍之以侑三爵

陳母高孺人七十貞壽序

吾邑茂才以文名噪海內薦南國賢書第一而其母

以貞節特聞者一時蓋兩人焉一爲余友張鮮民母陳安人一爲陳伯玉母高孺人迺兩母蚤歲失所天咏栢舟而矢靡他皎于白日其矢志同也家業衰薄茹冰蘖而厭糠粃慘于凄風其攻苦同也撫遺孤而幾幾望成如望歲斷機和熊旌降延傳玉子于成卒爲髦士升于天衢其取效同也然張母以天年不逮養令子有風木之恨陳母眉壽無有害子之獲雋于身親見之其愉怫異矣張母越在閭井幾于堙滅鮮民叩闥泣血以請而後得之陳母月旦蚤孚鄉三老校官諸生以母節聞于臺使者上之大宗伯 天子

下尺一表宅里將揭日月而行中天其勞逸異矣然則母之食報于子庶幾不孤而天之所以胙母者不其單厚乎哉今歲壬戌母春秋登七十諸與伯玉念者將致祝焉屬予行詞余固論伯玉而因悉伯玉母之賢竊取義于易母蓋有四德焉其一在恒之六五繇之辭曰恒其德貞婦人吉象曰婦人貞吉從一而終也母生于桑樞窮巷非聞家萃胄素嫻女史而能忍萬死狗一坏以存六尺之孤外無疆宗懿戚爲援而奉老哺幼理勞難歷艱苦從夫從子有死無二此一德也其二在家人之彖彖之辭曰利女貞又曰家

人有嚴君焉父母之謂也夫父義母慈嚴于何有乃母而不嚴家之蠹也庇子弟之惡弛帷簿之儀叢鄉里之謗有哲父所不及察者母督子嚴于父而子奉母教惟謹卽衰然首賢書逡巡退讓毋敢錯趾宅日一再命必不至壽張爲幻而車上儻也者此一德也其三在晉之六二繇之辭曰晉如愁如貞吉受茲介福于其王母晉下體坤坤爲母明出地上其德乃光母以中正柔和之德處遘閔受侮之時險阻尚存而子若孫多材慧富文采顯名于邦國此一德也其在坤之六三繇之辭曰含章可貞無成有終又曰貞之吉應地無疆夫陰雖有美含之地道也妻道也亦母道也無成而曰有終有終而曰無疆坤之爲儀匪僅僅一無成而已母柔順靜專闔戶垂幃足不越戶外飭蠱持危勤於未勸成其家成其子而因以成其子之父遐齡應地不蔡可卜此一德也修此四者懿鑠乎賢母哉世不恒有矣而猶未也夫壽者身也壽者名也身壽有量也名壽億萬斯年無量也祝母壽而先之以節是爲善頌善禱非余一人之私言也易又有之曰天地節而四時成夫四時錯行乾坤所以不毀也節之時義大矣哉請以是終易之義廣壽

之說以復諸論伯王者

許母錢太宜人七十壽序

今天子冲聖嗣無疆大歷服如旭始升照耀寰宇百爾卿士依日月末光沾被汪濊凡所爲顯親計無不人人屬厭也間有咏陟吧嘆靡鹽者天子且曲就其意予假省覲俾獲展其知年愛日之誠斯亦錫類之曠恩體臣之極際矣今歲壬戌吾郡縉紳家以太君膺綸命稱七十壽者二人一爲余從母史太恭人一爲銓部郎許母錢太宜人兩母生同庚同月先後不日刻亦一奇也余弟上下以大司成再疏陳情得請

歸省觴太恭人於堂所所如也銓部君聞鉉聞之以請告還里奉太宜人膝下懽三載餘矣太宜人以封公見背時所不足于七表者僅四日甫公除不忍觴一切筐篚餼牽戒門者拒弗納銓部君重傷母意謹謝客諸縉紳相顧徘徊足逡巡不敢進四越月而後謀所以觴太宜人者謂余小子屬在蘿蔦宜效祝噎之役而余有感于銓部君善奉太宜人之訓也蓋銓部君器識介特風韻修雅弱冠成進士拜大行人其歌皇華懷靡及非一日矣天子加其能晉銓部郎佐其長澄叙流品簡汰貪冒摘發諸吏舞文犯科若而

人條銓司便宜若而事其於諸曹郎名實無兩此雖
封公之教爾鉉之能蓋亦有內則焉太宜人嘗曰婦
道臣道豈有兩哉女入官見妬士入朝見嫉人情類
然周頌樂只求賢審官無險陂無私謁究且百斯男
三十卜世此不妬之明效也爾鉉謹受教登延直節
多聞之士孜孜如不及太宜人又曰噐惟求新人惟
求舊子初生必擇於諸母中可爲子師者其次爲慈
母爲保母非寬裕慈惠溫良恭慎者不得闖其室爾
鉉謹受教身早貴不替年徵召不遺耆安車賁相望
於道太宜人又曰貴不期驕祿不期侈后脫簪珥妃

治葛覃婕妤辭輦荆布搯作之婦不以逸豫滅德保
有厥家令聞長世爾鉉謹受教晨起策羸馬入署治
事歸閉戶手一編謁不得通其門如水居恒布衣蔬
食無異寒畯蓋太宜人之訓而銓部君所以服膺之
者如此嘗考晉韓康伯爲尚書進用吳處默爲廣州
刺史不以貪泉易心顯名當世實由康伯母殷夫人
在丹陽時知處默賢預戒康伯汝若爲選官當料理
此人後康伯果爲冢宰錄用處默則殷夫人不第知
處默賢且先知康伯貴也古今筭黛之流有慧心卓
識負人倫鑑如殷夫人者無有哉又聞山巨源爲吏

部郎雅操邁時資用多乏晉文帝致錢二十萬穀二
百斛以巨源母老特賜藜杖一枚當時侈爲盛事太
宜人賢明仁智不減殷母爾鉉雅操視巨源有過之
今天子新崇孝理建極錫福藜杖之頒當與爾鉉環
並賜則爾鉉一日之養即不肖以三公易其將能乎
客有爲余從母觴者稱引蘇易簡母召入禁中賜冠
帔命坐張齊賢母晉國太夫人天子手詔存問以爲
重余小子亦何敢爲卮言惟是山母藜杖爲太宜人
加一康爵蓋宅百揆統百官秉鈞持衡國制兼重與
茲選者並稱華要爲語爾鉉上于無徒戀膝下歡策
名清時勉樹勲伐仰荅主恩則兩太亦永有聞於
世哉諸縉紳先生曰善兄弟既翁昏媾孔云遂授簡
祝史以進太宜人歸而爲余從母誦之

淳古陸老親翁八十壽序

蓋嘗聞之元命苞曰張北有一大星爲老人星治平
則見而爲保章氏之說者曰星今見牛女分以故江
之左多上壽云余猶憶先學士居恒頌說先魯王父
秋厓翁壽八十膺先符丞尚書郎封旣拜命束冠裳
度之高閣敦龐樸茂有無懷氏之遺世遠胄遙質行
不少概見而以余耳目所睹記近事縉紳稱八十壽

者有如太常凝菴唐公憲副毅齋蔣公大令雲河馬
公白菴李公中翰二樂毛公不十載凡五見士大夫
相與歌僊而誦祝之羔鴈酒醴踵相接背相望里閭
詫爲盛事蓋亦多上壽之一徵也今上冲聖天啟銳
意治平黃河清鳳鳥至而淳古陸翁以南極一星適
當弧北歲登大耋一陽初吉其攬揆之辰士大夫修
故事稱兕觥歌僊而誦祝之者若加於曩日業有如
椽之筆張翁之懿嫩不啻更僕而余小子亮涓家季
玄與翁之子若孫有肺腑之誼寧能無一言從諸大
夫之後夫世之欲全其天年極壽命之數者必恬與
愉相資而後可故巖居川觀鶉居穀食茹百物之精
華循四時之冲和充然自得無羨于外是之謂恬適
離休運馳鶩泰階湛息浹於羣品功列表於來茲聲
聞無窮憫然滿志是之謂愉然得全全昌者鮮矣如
前所稱唐蔣二公紹家聲登甲榜敷歷中外衣緋橫
金出其身爲世用詎不愉快而寵祿名位養其尊聲
色臭味備其奉究其所以爲之者或未必無焦思紆
體俯仰倚伏之機少滑其和毛公入貲起家垂白列
禁籞亦足明得意而積錙銖設筴持籌以保有其
家者或搖其精馬李二公舉科第稱循良吏成功蚤

退優游自娛視三公稍恬適而愈斯失羽驟負爲勞終有不能釋諸懷者信乎恬與愉不可得兼也以今觀於淳古翁何如哉翁弱冠誦法詩書佩服仁義慨然有當世之志爲博士弟子數十餘年文名籍甚才非不饒時非不偶委而去之放於林泉終老焉有子奉常公以進士高第典禮主爵位至列卿念翁春秋高暫歸省覲旋奉徵庸節越統均之席虛左以待而翁觀於有爲之竅躡乎無欲之根敦若樸曠若谷明若昧質若渝屏世之靡麗芬華苞苞溷溷充然自足而浩然莫得其津涯又以其未究之蘊託之乎其子

人知奉常公能而不知其率翁之教也會天子新即位推恩朝衆翁晉爵秩三等采章物服得與子同書錦宸綸輝煌相映猗歟盛哉夫翁有寵祿名位之尊無予奪黜陟之慮有聲色臭味之奉無奸黷蹴躡之勞游於物不害於性樂於外不特其中新陳代謝之故樊然百變於前一切順應無所畔援歆羨而子孫滿前蘭芬竹立執經而趨舞斑而嬉斌斌如衍衍如也身際五朝之昇平目睹三世之濟美恬與愉交相爲用行年八十而顏色潤澤步履矯捷視聽聰明不減盛年此豈無本末經緯以全其天年極壽命之數

者哉毋論先曾王父不能望翁萬一而以前五公視翁何如也抑不獨此也翁固世所稱封公者也今之封公乘勢恣睢殫財役貧問舍求田網羅漁獵間黨爲之傾意有所欲請謁挾持三尺不得問即不然而鮮衣怒馬大蓋高車漿酒藿肉喧呶沉酒而翁有一於是乎無有也怡愉悃悞不設城府行游阡陌間與禍父田僮牧豎馬走周旋揖讓濡弱如處女束修如書生而六戚四封之衆不敢躡影以驚依聲以譁于以表率家庭化誨邦族此又所謂高者下之損者益之天之道也以翁所爲根深寧極雖與自然齊光不嶽長存豈有量哉孝廉楊君亮孺陶君嘉仲皆以姻婭胥命消人聞之而慨然曰古之治道者以恬養知以知養恬知與恬交相養而和理出其性老氏亦言保此道者不欲盈夫惟不盈故能蔽不新成吾聞子之言得養生焉可以祝矣遂授簡余兒寬屬序史載之遍入爲壽修爵無筭

清裕堂集序

吾儕兄弟承祖父詩書之澤叨列賢書登仕版者一時有九人吾兄象于蓋稱巨擘云吾兄弟性多執而寡合質近魯而少文廼服官盡職硜硜守尺寸心必

欲以矜激自見不肯徇俗時而操弄筆墨又沾沾以柔翰自喜各有撰著卽費紙丈梨不敢藏垢此皆其所短也兄弱冠爲諸生聲籍甚舉甲午繩吾祖武上春官不售司教添園竊比蒙莊有逍遙草旣令渦陽潔已愛民馳譽循良有逍遙續草貳守延州督餉神木逞神木守率以墨敗不能及一考兄銳意更始釐革宿蠹飲冰茹蘗歷五年如一日軍民建祠立石巷詠塗謳兄公餘攬灑遺興紀游橫槊揮毫亦復淋漓成帙茲以屢薦高等擢貳閩離不改素節案牘稍閒吟咏自如暇日哀集先後所撰著合刻之名清裕堂集夫清以聖稱猶病其隘廉惟不劇乃爲能廉裕以隘與劇之反也兄堅白自守不磷不淄有孚惠心寧厚毋薄故服官盡職未嘗徇俗亦以硜硜自見而初無一毫刻礪忿戾之意蓋古之矜而廉非矜而激也以此裕國施乃饒以此裕家積乃厚若宏中彪外發爲文章如萬斛之泉恢恢乎有餘地裕可知矣此兄以清裕顏其堂并以名其集之微指也吾儕兄弟硜硜然小人哉其何能望兄之萬一

灌叡吟草序

今之詩人我知之矣其好爲名者如徐備長所論多

識流俗粗通詩書託之博文居必人才游必帝鄉託
之觀風而其下者行卷充贄市譽借交曳居侯門彈
鋏幸舍彼曹徒取世資烏知風雅乎哉友人許錫蕃
氏治博士言籍甚逢掖不以帖括妨嘯咏而其薄游
京師日與諸賢士大夫抵掌下上于世故朝典靡所
不曉暢今觀其近刻淮貳吟宛宛有材情樂府擬選
能於古調中作新語歌行放浪自賞近體觸景寄興
無角險以求勝大都擬古十之六七自十九首而下
及出塞從軍名都美女諸篇無不闡漢魏之藩以自
攄其慷慨之氣它與諸士大夫唱和郡邑所藉手者
悉付之祖龍真不錄其意致孤遠所謂與古爲徒者
耶余笑謂錫蕃君貧士不欲與今爲徒不能如陳射
洪書百行卷請以此刻爲射洪琴園諸名士集而碎
之則何如遂弁其語於首

醉石軒詩草序

今天下春春多事不患無才患無通才耳夫所謂通
者非恢張於氣宇取辦於口給也吾嘗遐想虛揣其
人必有深心有遠神有勁骨而後可與言天下事蓋
才根於品品歸於真真則未有不能通者故嬉笑怒
皆文章涕唾皆神理屐屐皆幹具而鑒品徵才者

每于立談傾蓋得之解衣盤礴識真畫史床頭捉刀
識真英雄彼其相視莫逆固有索於形骸之外者矣
不佞遜跡山中無意當世不復相天下士昨者小草
一出濫竽留銓識王未凝先生始見之標解清令墨
塊有正骨而深心遠神隱隱躍躍若在眉睫之間及
其發言遣辭往往有情致真率少許足對人多多許
至讀其評外篇醉石軒諸藁雅變不拘史玄並作極
命草木掀採苞符合體要以皆諳肆滑稽而是道斯
亦所謂擲地成鏘雕章爲繪者矣閑居蕭淡理詠不
與氣所噓爽喉作響有不容色取貌襲也者一旦
起而當天下事其骨力之堅凝神情之淵著應之將
迥然而解當今國事錯愕病在綆短有如淹今貫古
不欺臆臆浴白日而澄青海豈異人任哉次公彭伯
與不佞同辛丑籍其深心勁骨多有不諧于曹偶者
今日犁庭掃穴直以指顧成不世之伐君子所爲固
亦可以常情測也請以是爲未凝前茅

蔣羽公詩序

公從余游甫燥髮每結撰語多創獲余心異之既
以公車又家漸落意氣不少沮酒後耳熱時時擊唾
或以自見淋漓感憤傍若無人貂裘敝牛衣泣者屢

矣猶不減翩翩裘馬風余心益異之去歲慨然破產
入貲爲背城借一之計棘關得雋如執左券乃知英
雄自有真賢者固不可測也今讀其白門燕山諸作
因愁邊憤幾于痛哭流涕皆勞人遷客所敢怒而不
敢言即忠臣烈士所敢言而不敢盡者噫嘻羽公而
其敢也昔韓魏公平日謂成大事在膽未嘗以膽許
人余向序羽公文惓惓于義理意氣之辨謂文以理
爲主以氣爲輔理生氣爲純氣勝理爲客然而客氣
不可有正氣不可無今由意氣識羽公膽他日備
官使得當一面其言人所不敢言任人所不敢任犁
庭掃穴斬樓蘭而封狼居胥必屬之羽公無疑矣

楊晉卿試草題辭

余友楊晉卿同年振之子也振之從先大夫游與余
兄弟才相伯仲辛丑之役余不自意先振之一鞭不
勝我輩登科之愧晉卿從余游與余兒兄弟才相伯
仲辛酉之役次兒又不自意作晉卿前茅則不第愧
而且疑矣放榜後稍稍流傳晉卿卷已入胡司理彀
中擬第一以他有牴牾擯弗錄司李持其卷不勝憤
恚憐才之甚至干淫淫淚下天下有知人愛人若司
李而受人知若晉卿者哉虞詡有言天下一人知已

足以不恨晉卿之遇合司李精神孚契當有不期然而然者成名蚤莫各自有時以晉卿瑰材積學天將大舒之以補振之所不足其終必脫穎無疑也余獨怪夫皮相士者一膜自封四聰不達羽毛痕疖加臆墜淵即摧國棟殄國寶畧不顧惜雖尺蠖必伸而屈者已先屈矣余聞司理持平廣陵亦稱治行第一忽中蜚語不與徵召衡文銓吏得失大較豈有二哉唐人詩云賤目豈殊衆貴來方悟稀請以爲是晉卿告又云流俗多錯悞豈知玉與珉并爲司李先生誦之淫淫之淚能無失笑否

墓誌銘

太平縣學訓導二思毛公暨配孫孺人

誌銘

吾母太恭人之家曰毛氏在邑東南劉村里國初有祖福四避元亂徙居焉五傳而爲黃門古菴公起家登甲第以忠直立朝理學翼世禮讓範族其子孫篤行好修多足稱者而吾外王父學古公有五子充尚敦睦二思公其第三子也字希成初號怡思識何怡之感旣失恃更號二思示明發之懷云公少奇穎五歲就外傳十六補邑博士弟子員試輒高等廩于學

官凡七上京兆不得志晚膺歲薦授寧國府太平縣
儒學訓導終焉公之領學博凡四年軌端表正經明
道尊諸生悅而從之脯修之費一切置不問有貧不
能力學者捐餼廩佐其急至談說經義纒纒不倦人
人虛往實歸也公家不乏餽粥何意竊升斗祿自以
勤職造士冀徼一命爲二親榮而卒不可得遂拂衣
歸棄之若遺廬矣蓋公性孝友父歿嘔血數升水漿
不入口者累日母病痿在牀蓐十餘載公調湯藥不
少懈後得瘥以天年終猶然孺子慕哀毀骨立三年
不御酒肉伯兄希兌厄于黠里公爲匍匐訴官道寃
得白公性伉直與人交絕無脂韋人多憚之而公之
鄉尤工撫拯偶有佃瘠死群兒構煽中公奇禍及對
簿又彊項觸令公怒幾陷大辟先大夫爲發憤訟寃
以百口保之至投牒于神以自矢令公悟始得免若
動苦節齋固公家世所素習也拮据治生而賈其餘
力以治經生夙而興日出而率臧獲課耕織卽炊浣
米鹽絲枲瓦木織悉儉瑣必當其擘畫日旣晏復手
一編伊吾佔俾至丙夜不休以爲常公于服食嘗從
樸儉無華腴之奉而性豪于酒對客供具致用鮮腆
酒後耳熱時時擊唾壺以自感慨撫諸子甚慈不加

官凡七上京兆不得志晚膺歲薦授寧國府太平縣
儒學訓導終焉公之領學博凡四年軌端表正經明
道尊諸生悅而從之脯修之贄一切置不問有貧不
能力學者捐餼廩佐其急至談說經義纒纒不倦人
人虛往實歸也公家不乏餽粥何意竊升斗祿自以
勤職造士冀徼一命爲二親榮而卒不可得遂拂衣
歸棄之若遺廬矣蓋公性孝友父歿嘔血數升水漿
不入口者累日母病痿在牀蓐十餘載公調湯藥不
少懈後得瘥以天年終猶然孺子慕哀毀骨立三年
不御酒肉伯兄希兌厄于黠里公爲匍匐請免之
得白公性伉直與人交絕無脂韋人多憚之而公之
鄉尤工攬挹偶有佃瘡死群兒構煽中公奇禍及對
簿又彊項觸令公怒幾陷大辟先大夫爲發憤訟寃
以百口保之至投牒于神以自矢令公悟始得免若
動苦節齋固公家世所素習也拮据治生而賈其餘
力以治經生夙而與日出而率臧獲課耕織卽炊浣
米鹽絲枲瓦木織悉儉瑣必當其擘畫日旣晏復手
一編伊吾佔俾至丙夜不休以爲常公于服食嘗從
樸儉無葷腴之奉而性豪于酒對客供具致用鮮腆
酒後耳熱時時擊唾壺以自感慨撫諸子甚慈不加

譙讓昆弟間或有交相諭者弟愀然以色示之無不相顧而化怡怡如初公博極羣籍過目不忘卽通鑑綱目極浩繁矢口成誦而尤熟于左氏所著有左傳屬比行于世蓋公枕經籍史腹笥便便此僅見其一斑而已長材短馭厚蓄薄施卒慳一第不得自攄其蘊抱豈不惜哉公生于嘉靖壬辰八月二十五日卒于萬曆癸卯十月二十日享年七十有二大父古菴公諱憲正德辛未進士歷官禮科右給事中事行詳人品記公孝友伉直有祖風附記中父學古公諱誠以仲子中順入貲爲武英殿中書舍人贈徵仕郎如其官母陳氏贈孀人配孫氏丹心望族溫恭淑慎元閑婦道識大體克勤小物一切燕享賓祭之需靡不順指辦者事舅姑孝處妯娌和馭童婢靜而理待諸子女愛而知勞與二思公白首相莊無悶言竟以鄉人構禍鬱鬱不樂萬曆戊子七月五日疽發背而卒詎其生嘉靖辛卯某月十三日享年五十有八子三長應辰邑庠生娶秦氏次應庚邑庠生娶王氏次應慶郡庠生娶董氏繼娶王氏女六一適黃裳景州州判一適胡汝節萬載縣主簿一適任與春光祿寺署丞一適馬希尹太倉州學訓導一適唐泰徵一適董

一適馬希尹太倉州學訓導一適唐泰徵一適董

德驥孫男六長元震郡庠生娶白氏庚出次念特邑
庠生娶張氏庚出次旭升娶劉氏次旭益聘蔣氏次
旭鼎未聘俱辰出次元雷未聘庚出孫女五辰出者
三一適吳儼思郡庠生卽余姪以先大夫建言直講
勞廕恩生一適蔣世濟太學生一適惲南初邑庠生
庚出者二一字余從弟宗亢塲一適蔣鉷邑庠生曾
孫男三曾孫女一墓在橫山之新阡合葬以其年某
月某日迄今若干年矣而墓中片石尚虛外兄弟以
爲余小子亮再三辭不獲謹爲誌之而復系之銘銘
同歸斯丘垂裕爾昆

太學生研亭安公暨配吳孺人合葬墓誌銘

毘陵人品肇稱黃門世德作求薦生聞孫詩禮弗
孝友克敦名附聲施不朽者存矧有淑儷洵惠且溫
同歸斯丘垂裕爾昆

明興風雅莫盛于嘉隆靈秀獨鍾于吳會蓋自王司
寇元美主盟詞壇一時薦紳學士結軫而修竹素壇
藻墨若皇甫司勳子循劉食憲子威文待詔徵仲祝
京兆希哲胡侍御原荆鄒學憲彥吉王上舍百穀張
先輩伯起葉山人茂長前輝後映左提右挈皆足並
驅中原而安君懋卿亦壇坫中一巨擘也

容十有八年矣其子玉瓚等生也晚幼而孤今始勝
衣冠紹弓冶克襄大事介余弟親于來請誌銘余辭
不忍謹按狀君姓安諱紹芳懋卿其字世居無錫之
膠山山有滌研亭因號研亭而以懋卿知名于世世
多稱懋卿云安之先本黃姓蘇郡玄珠里人有黃茂
贅于安明善因爲之後黃之以安稱自茂始也茂四
傳而爲國國有子如山登嘉靖己丑進士讀中秘書
出守裕州僉雲南憲致仕年不滿德爵不逮貴其未
竟之緒孕爲聞孫風流文采照耀江左安之以詞翰
稱自懋卿始也懋卿生而韶秀捷悟僉憲公箸鄉口

授書卽成誦長治博士業發上世所藏書丙夜讀至
盈寸僉憲公座上客多名雋每奏懋卿文一座盡傾
又攻古文詞間遊戲丹青研究聲律于文愛咸陽西
京于詩好開元大曆書法宗洛神曹娥繪事倣元鎮
公望叔明諸名家揮灑盤礴無一不妙天下十七補
郡諸生試輒高等性好客思與海內賢豪長者游乃
以例入太學交道愈廣文日奇進丁卯試棘闈同舍
生作奸扞罔波及懋卿見坐爲黨懋卿牢騷歷落幾
不欲生乃益縱情詩酒迷花醉月于烏衣白門之間
以自舒其憤懣酒後耳熱擊唾壺泣數行下有荆卿

漸離燕市悲歌之致衆皆憐之時南大司馬劉公憲
謙光祿張公肖甫結社徵詩英彥咸集引懋卿爲忘
年交廣筵刻燭分題授簡無不人人心折也辛未走
闕下上書訟寃當事者無不憐懋卿才而燭其枉乙
酉事得白復入北雍辛卯爲房考馬公主考馮公所
賞識草榜列名八十一以同考周學博爭卷甲乙遂
兩置之放榜知爲懋卿失一名士又無不人人扼腕
也懋卿嘆曰吾嚮者名幾毀而獲全茲者名幾成而
僂失豈非命哉吾卽不得微一進賢著作金馬之處
遂中不律固無恙安往而不得千秋業也所著有青

萍芳草二京諸集詞林贈炙紙價爲貴所居膠峯下
有西林一區山負辰水拖紳林木蔚蒼曠吠翼如庭
宇榱角殖殖如琴樽彝鼎法書名畫几案間位置都
雅秩秩如亭臺池館逶迤天驕景凡三十二王元美
爲之記客至命鹿車載穀核嬉遊溪谷中有自度新
聲調法部絲揚肉馳飛白捲波竟夕忘勸望之若神
仙中人噫嘻懋卿亦足了此一生矣當會憲公家居
入勢宗人無賴者螫其長君少峯實懋卿父內訌外
譁幾不可解懋卿潛爲防杜橫逆盡釋介叔小范登
嘉曆丙戌進士以司封建言直聲振宇內欲倣文正

公置義田贍族懋卿捐貲佐成之雅好施與里中藉
以舉火者指不勝屈先是艱于子既連得五雄珠輝
王潤人以為厚德之報事父母至孝四十年孺子慕
如一日奉伯兄甚謹兄歿無嗣中懷於邑兼以繇重
歲侵逋積產減居恒鬱鬱不怡偶示微疾惟掩關靜
攝擊清磬以自娛時弄雛含飴以為樂戚執問疾猶
應接不暇然而精氣耗矣疾大漸召兒瓚前摩其頂
以有欲言者數相視以目乃瞑嗚呼此其無解于心
言而喻者耶時萬曆乙巳八月初十日距生嘉靖
甲正月二十九日得年五十有八配吳氏余世父

八史後菴公長女幽閑貞靜不苟嘖笑卽娣姒妯娌
相見頭目盡赤必俛首蔽其面性尤儉素衣不襲帛
食無重肉與懋卿白首相莊無褻容侍翁姑夔夔齋
慄亦鮮愉色孤子性成終其身無所出生于嘉靖戊
申十月二十四日卒于萬曆戊戌六月二十四日得
年五十有一男五長殤次璜今名玉瓚補常熟邑庠
生側室吳出娶秦氏孝廉鴻一公女次珩太學生側
室唐出爲伯研泉公後次琚吳出娶浦氏太學生完
亦公女次琫側室凌出娶吳氏衢州守求峯公女女
一唐出適太學生孫源平吏部侍郎柏潭公子孫男

二殤孫女三一字華浴日太學生檢我公子次俱未
字玉璫等卜天啓壬戌十二月廿三日合葬于朱材
橋祖塋之穆禮也余既誌復系之銘銘曰

大雅作嘉隆際此子才安其氏文代興軼元美窺四
始追六季挾二西游三昧老逢掖足名世惟不試故
多藝窮益堅挫弗替馳兩都慳一第惜無祿幸有嗣
晚已陳魄猶滯十八載乃襄事同所歸偕厥儷閱九
京寧千禩銘者誰舊柱史嘻懋卿曠可矣

太學生學思惲公墓誌銘

吾邑薦紳冠絕項背相望而宏覽博物著書滿家以

文獻蓋代者自唐中丞薛憲而後

先生指殆不少屈云先生有子曰應族少

父書多聞

兒不凡字以順德取毛詩語又曰聖人論思與心不

可偏廢不者殆罔乘之遂號學思皆先生命也余追

憶弱冠獲交順德維時沈伯和應奎鄒正之學孟皆

同研席不第

存諸皆余所兄事而諸君亦畜之迄今四十年往矣

順德捐賓客八年今始襄事其孤毅初日初猶尋夙

雅來請誌銘余何忍辭按惲之先系出漢梁王相國

子冬宋有名文者官著作佐郎始遷邑南胥城里國朝有諱禧者以季子釜貴贈戶部員外郎生子鉉鉉生訓以叅藩貴封刑部主事叅藩諱紹芳登嘉靖丁未進士歷官福建布政司叅議生順德順德生于京師叅藩宦游閩楚間皆著膝以從年十四補邑諸生聲籍甚試輒高等郡侯施公闢龍城書院遴六序名士課文稅順德亦在彀中丙子丁母黃安人艱已卯將入棘會叅藩病劇自白下起歸侍湯藥不解衣者浹旬竟不起順德哀毀踰禮已稱家督有當室之憂蓋叅藩有七子長蚤世次順德雖仲寔伯也諸叔季

笑笑在疚未能成立順德撫之誨之館校娶婚授居授廬誦讀授胸脯而又節口體示之讓嚴上下示之法間語諸叔季曰先君不幸棄諸孤蚤諸孤少不更事或佚蕩失檢漸靡俗好貽先君羞皆伯氏責也我不敢以怡怡故狗汝輩詞嚴色莊總持家揀無少貸家庭之間儼若朝典諸叔季亦廩廩奉教惟謹至于囂侮翹集情有弗堪徃役磨至力有難任順德獨以身當之諸叔季奠于覆孟寧于貼席初不知有擊撼震撞之虞皆順德庇之也順德爲人沈密饒有心計遇大事能曉究竟策善敗皆中欸出納不煩載籍

腹經臆緯歷歲時無遺忘臧獲不敢慢居恒儉約不
妄費一錢至賙急施予無所靳族子逋官糧急代之
償故居廢復爲託處有弟出繼產薄割已產益之有
痼疾者月給錢米以爲常有女不能嫁爲擇婿歸之
女弟貧迎而養之比歲儉諸族戚待而舉火叅藩物
有主藏豎以百金抵順德杖而遣之曰安得以私嘗
我我豈忍以秋毫傷一體其晰于義利如此先是順
德艱于子西河之淚幾枯弟敬止有子甫孩襁負而
乳哺之撫愛特至長就外傳督課甚嚴卽舉止衣冠
少不輒于程務爲繩約不渝尺寸最後貳室生一子

有夢日入懷之異憐愛有加提掖有子長而
此吾兒他日父兄事也既而弟中分爲兩無所
有勸順德稍爲幼子計者順德笑曰釣吾兒也厚
何爲且吾欲貽兩豎子安耳卒不聽順德素以文自
雄視一第不啻芥拾五舉不利志不少挫甲午猶子
朕初舉于鄉後成進士順德喜曰吾先人弓冶業已
有託可弛于負擔矣遂入貲游成均或勸之仕則又
笑曰頭顱如許聊以息吾足豈屑折腰五斗哉於是
決意釋業杜門理家治第舍拓隴畝或時花種竹疏
泉壘石鑿定古法書名畫客至命壺觴嘯咏以爲樂

謂可優游永年乙卯同母弟縉思公卒順德哭之慟
 神色為瘁越三月遂至大漸猶扶病呼二子授以遺
 言自祭享婚嫁以及棺斂喪葬無不周悉條畫而後
 瞑嗚呼是可以觀順德矣然余于是而深慨世風之
 日波也輒近宦子翁藉口于濁世翩翩跣弛自放蕩
 廢先業不數年盡為執家所漁獵而其狡刻者藉祖
 父權子母壽張為幻放利無厭不漁獵人不休順德
 所授產不甚腆從積纖累微以起其家饒于中人之
 業構若肯而加潤故若履而加闢里中絕不聞有斷
 之聲是謂能于一宜誌兄弟履行耳既翁且就式相

于好而或關弓不免于垂滄懿親遂廢于小忿加大
 陵長虧恩絕愛往往有之順德身為伯長居然以父
 師自命訓勵嚴切無所遜息諸弟稟承謹凜罔敢違
 越卽封公縉思貴重矣行年相若執禮尤恪人以此
 多繹思之克恭而益重順德之施于有政是謂能兄
 二宜誌世之以嗣續者序相及貌為親耳不屬不離
 愛于何有卽有所出視嗣子不啻弁髦棄之鰥負烏
 哺先後生心啓釁召爭敗無日矣順德撫長君子方
 壯恩勤無異所生產幼子于將衰儀度同歸于一鳩
 鳩之味寧多讓焉今二子友愛篤摯畧無間言是謂

能父三宜誌余蓋三復龔孝廉應谷所爲狀謂順德
父父子子兄兄弟弟皆可師法而深慨世風之日波
也匪直修風雅且以坊末俗誌順德者非余其誰哉
公生于嘉靖戊申十二月廿三日卒于萬曆乙卯八
月三日享年六十有八配胡氏太保忠安公女孫子
二長穀初邑庠生卽所撫敬止公子娶孫氏次日初
側室張出娶龔氏女三一適太學生李邦桂胡出一
適邑庠生鄒忠溢一字謝邦球皆張出孫男三燿燦
穀初出聖日初出孫女七穀初出者五日初出者二
墓在邑東南許聖村葬以天曆二年十二月二十三

日余旣誌而後系之他日
士有大維廉耻禮義公維是張不來不枝家有大有
父子兄弟公倫是敦克孝克倫文獻足徵儀刑勿替
無忝所生以光厥世施于子孫俾爾昌爾熾

錢母曹孺人墓誌銘

今海內稱信道力學著述滿家敢諫直言廢錮罕世
靡不屈指錢啓新先生而不知其刑于曹孺人咸有
一德也歲丁巳先生捐賓客余不斐以伯子參藩命
狀先生凡七千餘言未有當也今復以孺人闡懿屬
余誌益惴惴懼弗任辭再三弗獲勉用誌之謹按狀

孺人姓曹氏世居太平鄉黃堰里父思樓翁里中稱
爲長者生孺人有奇兆最憐愛之慎簡美對嘉靖間
倭奴闌訖自浙屆吳麾城衛邑鄉人多駭走是時啓
新先生財十齡謂父龍沙翁曰寇深矣一旦不戒將
曷歸莫若母與姊暫徙以避而吾父子居守以寧幹
止翁曰孺子言甚善爾有堂姊適黃堰曹可依也於
是陳孺人挈女避于曹而曹母彭與陳孺人時相遇
從孺人在閣中婉變端靖動有常度前所依堂姊與
彭妯娌也見孺人非凡女陰脫手上鐏繫之以告陳
婦人曰是息女足當佳婦陳孺人亦心儀之既兵燹

蔓延村莽爲墟獨啓新先生與龍沙翁相守數椽無
恙倭不一涉其地人咸異之思樓翁亦知先生非凡
兒得委禽焉孺人年十九歸先生先生已隸博士下
帷攻苦孺人勤繅績佐厥勩隆慶庚午先生舉于鄉
萬曆癸未成進士令廬陵孺人從先生奉翁姑如廬
陵先生拮据政事孺人代供菽水懽無內顧三年政
成受 敕命封孺人已丑先生膺 簡召爲臺官直
聲大振旣按西粵以 國本抗疏奉 旨削籍孺人
喜曰進盡忠退盡養臣子之職可兩無憾矣時伯子
舉于鄉旣成進士亦爲邑令亦 簡召爲臺官直節

讜言亦與先生無二卒以觸時忌出叅閩藩孺人復
 喜曰答主恩承父志作述之際可兩無愧矣孺人
 勤勵習儉素東方未曙即起盥櫛米鹽井臼無所不
 營綜逮老猶先力指操作不休服取布素敝則澣而
 綴之食不兼豆即就伯子養日猶尸饗以飽諸臧獲
 慮執爨者失畧漏期且不釣也其曲體人情如此生
 伯子獨也身乳之然不以姑息晚歲孫曾濟濟箸膝
 前分甘含飴以為樂數勸諸孫力學稍逋蕩必訶詰
 閑家有法不以嘻嘻易高心性頗弦少含茹亦不
 善蓄藏一切橫逆完對人

姬過欸欸授餐歸必納餞饌其和中曰歷而嬰孺子
 善諧人意又如此伯子奉先生諱宅憂三載公論
 也即家起叅浙藩念孺人老徘徊久之會 光宗皇帝
 帝有 詔卹錄建言 國本者亡何 今上皇帝登
 極 覃恩錫類典甚盛孺人呼伯子語曰汝即念我
 獨不念先君子抑鬱三十年淬勵一節倘異數為泉
 壤光非辱之大乎伯子謹受命起家泣括蒼亦以孺
 人素彊飯不善病或火發于股時見紅腫孺人曰無
 庸將自愈伯子瀕行孺人猶將之金閭以示矍鑠居
 八月前疾復發以天年終嗚呼伯子其能免于終天

之痛乎哉孺人生于嘉靖丙午五月十一日卒于天
 啓元年六月初一日享年七十有六子一即伯子春
 甲辰進士福建道監察御史今任浙江布政司右叅
 議兼僉事分巡浙東道娶董氏贈孺人繼娶張氏封
 孺人孫男五霖國學生娶張氏應霍邑庠生娶賀氏
 霽郡庠生初聘萬今娶余姪女應都初聘蔣今聘余
 女應部未聘孫女四一適董遇乾一適余兒恭思邑
 廩生一適鄭邴邑庠生一字楊某曾孫男四尚賓娶
 白氏尚質聘荆氏尚貞聘秦氏霖出尚實聘余孫女
 霽出曾孫女八霖出者六 適賀王盛新舉孝廉一

字吳堽之一字堵景澍餘未字霽霧出者各一玄孫
 女一尚賓出俱未字葵以是年十二月某日與族新
 先生合兆于新塘鄉西灣山之東墩禮也是宜銘銘
 曰
 為侍御婦為侍御母克相厥偶克開厥後琴瑟斯友
 荆布自守言澣言否無譽無咎禴翟珮玖第祿綬壽
 俾爾單厚祁祁孔有其德靡疚其貽可久西灣之濃
 東教之阜既載廣柳同歸丘首我銘匪苟千秋不朽

行狀

荆母賈孺人行狀

吾母太淑人生於毛嬪於吳而其同母季女也於有
者行十稱十姨與吾母肩相隨心相愛兩家門閭各
相當居恒姨母謂吾母曰它日吾有女以字而子母
曰幸甚既而不偶則又謂吾母曰它日吾女有女以
字而子之子伴世世相及毋相忘母又曰幸甚於是
吾兒毅思獲委禽於荆則吾母之命而姨母之意也
今所稱賀孺人由賀嬪於荆爲太學生凝公之配諸
生瀨明等之母與余不肖爲中表昆弟微獨託肺腑

蓋亦稱手足焉夫婦行不踰閭以余所聞孺人嬪則
毋儀雖外家猶之乎內閭也狀孺人者舍余其誰謹
按灑明等所撰行實稍銓叙之爲狀以胥命於名世
君子備采擇焉孺人賀氏大父曰康憲澹菴公父曰
鄉進士仰菴公母曰毛孺人舅曰學憲養吾公賀與
荆並以令族甲雲陽姻連奕葉矣會學憲偕廉憲同
舉於鄉子若女同舉於家齒相若相厭攸宜莫如茲
妃也善遂繫纆焉孺人育承鼎貴婉嫕夙成語引不
妄十餘齡深閉奉女紅中庭絕履綦跡稍長幹治家
秉悉有調理時大母鄧恭人在堂閉家孔嚴孺人敏

給當厥指代莞歲誕鑰靡不願指辦仰菴公遊南苑
學之偕往左右就養贍以周學憲公任留銓居相詎
僅百武賢聲籍籍聞於邸第於歸後舉所以事父母
者羞棗栗於尊章協雞鳴盥漱之節而賢可知也荆
太恭人亦賀出喜謂孺人曰淑哉女亢吾宗稱吾家
婦吾孫獲此令德其胤錫之徵乎始生女再生男愛
憐之特甚躬冒其劬自爲哺乳而以稟脆弱不能兼
卵翼皆驟折痛悒不自勝頃罹血症越數年漸瘳復
舉丈夫子若灑若澹太恭人又喜曰吾婦貞淑固上
其後之蕃衍必也亡何太恭人患瘵寢每發痛幾絕

孺人涕泗泫然直欲分其痛不得顧天容禱願哀已
筭以益姑年而太恭人竟不起卒違閔凶街恤積毀
未幾而學憲公繼之又未幾而太姑繼之三喪溢遭
五內咸割里黨姻戚集而吊且唁者輪錯舟比太學
公方偕伯兄謀治喪而兄復告變哭泣之位笄然子
立一切庀筵量用程庫庖漏猥瑣旁午還應立辦孺
人綜理綽有餘材然而裹抱大戚躬閱諸籍力不知
幾百殫而情受傷血基耗矣乃孺人猶然力疾起治
家杼繡而織一絲鬻炊而餽一粒悉注其神以經畫
不敢不盡瘁更爲嗣續久遠計勸太學公擇良家子

惠溫者爲貳而以膏沐飾之有身庭思所訓訓爲
護持自是庶孽接踵差肩均拊以鳴鳩之愛含飴也
分甘移溼也共燥庶孽昕夕狎其慈竟不知誰母氏
鞠也平居深以門祚爲念繩督諸子罔替諄諄矢戒
曰若小子繹敬姜之訓習勞可無淪沃土之淫維陶
朱之喻厚壁可無蹈季俗之恍父若茲無忝爲名家
子而大父箕裘有耀矣諸子稍拂旨輒加譙讓色厲
終日不少霽灑明等兢兢恪守無敢隕越今皆恂恂
德讓有萬石風寔孺人以慈佐嚴以威克愛之明教
也學憲公雖宦游所任皆清秩受室廬不甚爽塏而

山園續集
湫隘是仍比因諸子逆婦稍從丙舍鱗次規棟宇一
椀一杙出自孺人縮衣節口以營而究幘幪之宅是
何一孱然婦肩肯堂肯構之勤乎日用薄于奉服謝
統綺味捐肥腴與諸子婦媵妾共恬於澣濯之衣藜
藿之食曰令若輩範吾儉母勤而後渝也至延師款
客務極鮮腴紡紝緝身先婢媵至龜手不遑恤以
故遣女時布縷悉取諸筭綦組成出其手不假給於
市肆其勤若此先是內外家析箸了無競心簪耳筐
篋一受其故且敝者曰敝器吾所習操也見地頗慧
事動中肯綮遇內外姻戚有懷剖以相喻有倫叙

以相秩有句貨急以相副群從中疾雷剝喪需而
需黔突各視願力所及龜勉贍之循斯軌也黃純於
潛不見其畛而化在噴用之以襄爾君子倘易詩所
稱無非無儀無攸遂而敦代終之誼者耶孺人素服
西竺古先生教朔望必持齋六七必禮斗又好施予
凡名山古刹捐貲相助毋少愆彌留之際心依淨因
絕無辛楚惟合掌誦阿彌陀佛數聲復瞠目語諸子
婦曰汝等無號慟以但化殮必以布毋以寸絲腊吾
體布吾手所經心所安也言訖而瞑嗚呼此其達觀
了識超出於塵情幻緣之外豈烈丈夫所能窺其藩

者乎孺人生於隆慶丁卯十月八日卒於天啓壬戌三月十六日享年五十有六男六人長瀨明邑庠生娶金壇王氏南安令曆昌公女南京右都御史恭簡公女孫次澹明郡庠生娶同邑湯氏四川布政使是弦公女次澍明邑庠生娶無錫周氏太學生炳烈公女吏部左侍郎贈太子少保禮部尚書文恪公女孫次洞明聘武進陳氏進士美道公女次澡明次派明皆側出幼未聘女五人一適丹徒衛經歷徐檉禮部郎中希孟公子一適武進吳世胤江西叅政之弟次子一適余兒毅思翰林院侍讀員外郎士贈禮部右侍郎復菴公孫一適金壇王虞蒸都司都事廷銓公子一適金壇邑庠生周鐸南京刑部主事廷侍公子孫男五人孫女五人瀨明等奉太學公命擇天啓四年三月十八日郊時卜葬于丹徒桃山之新阡坎穴即太學公所自定也余辱瀨明諸君之命適以小草起家卒卒未報余兒緘書請曰外母衰有日矣聊從車塵中捉筆狀其大都如右極知不斐無能闡懿微然不敢阿私所好世有龍門公不虛羨者片言華衮尚考鏡于斯云

祭文


宗祠祭文


我吳積善二百餘年慶垂於後祐篤於前詩書鵠起
科第蟬聯二世八榜勲名爛焉柔兒連捷初授古田
捧檄握符茲且錦旋惟有祖德爰啓象賢敢忘所自
罔極昊天聊陳薄奠用寫微虔

甌山墓祭文

柔兒之生方在襁褓吾父吾母憐其弱小育之亞聞
攜持抱保惟疾是憂靡神不禱一痘幾危幸而完好
長習章句文理粗曉兩闡連捷致身頗早適遇恩覃

陳情奏討曠典備隆孤忠標表不圖一旦光施幽
伏遇 聖明仰酬祖考欲報罔極侔於蒼昊捧檄南
還墳塋瞻掃追慕勤斯怒焉如擣鬱鬱荒楸妻妾
草鑿于無文終其有造





卷之六